

গান	শ্রীস্ববোধ চন্দ্র	৬৬২
ঐ	শ্রীনির্মলচন্দ্র বড়াল	৭৮০
গুরুদেব	শ্রীবীণাপাণি দেবী	৬২
গুরুশিষ্য (কবিতা)	শ্রীমতী প্রফুল্লময়ী দেবী	৪৮৭
গোপন কথা (কবিতা)	শ্রীগিরিজাকুমার বসু	১০৬৮
চ		
দেশ বাঁচবে	শ্রীবীরাজ কুমার ঘোষ	১১৪
চাকরের ছুটি	শ্রীউমাচরণ চট্টোপাধ্যায় বি, এ,	৫৪০
চিত্তির গুচ্ছ	শ্রীশচীন্দ্র নাথ সেনগুপ্ত	৪৬৮, ৬৬৬, ৭০০, ৮৩২, ৮২৬, ৯৭১, ১১২০, ১১২০, ১১৭৭
চিত্র	শ্রীঅনাথ নাথ বসু	১১০
চিত্র পরিচয়	৭৬৮
চিত্র অভিসার (কবিতা)	শ্রীকালিদাস রায়	৪২
ছ		
ছায়ানট (কবিতা)	কাজী নজরুল ইসলাম	৩৩৩
জ		
জগৎ জুড়ে ইঞ্জিত	শ্রীবীরাজ কুমার ঘোষ	১০৭৭
জড় বিজ্ঞান ও জীবন	শ্রীঅতুল চন্দ্র দত্ত	৩৮৬, ৪৫৫
জাগৃহি (কবিতা)	শ্রীশ্রীপতি প্রসন্ন ঘোষ	৮৩৮
জাতীয়তা ও দেশ	অধ্যাপক শ্রীমোহিনী মোহন মুখোপাধ্যায়	৫২৫
জাতীয় শিক্ষার গৌরচন্দ্রিকা	শ্রীঅরবিন্দ ঘোষ	৫৫৪, ৭২৮
জিউ জিৎসু	শ্রীহেম সেন	১২৪০
জীবন তরী (কবিতা)	শ্রীবিনয় লাল চট্টোপাধ্যায়	১৫৬
জীবনের পথে	শ্রীঅনাথ নাথ মুখোপাধ্যায়	৩১৩
ট		
টঙ (কবিতা)	দয়বেশ	৪৪২
ড		
ডাক (কবিতা)	শ্রীনির্মল চন্দ্র বড়াল বি, এল.	২২৬
ঐ	শ্রীসরসীকান্ত দত্ত বি, এ,	৫২৪
ত		
তগধ্ব (কবিতা)	শ্রীকালিদাস রায়	১৩৩
ততোজয়মুদীরকণ্ঠ	অধ্যাপক শ্রীপ্রিয়রঞ্জন সেনগুপ্ত	৯০৪

জ্বর মনোকথা (কবিতা)	শ্রীবারীন্দ্র কুমার ঘোষ	৩২
তিলেক যদি টান হত (কবিতা)	দরবেশ	২৩৫
তুমি (কবিতা)	শ্রীমতী চারুবালা দত্তগুপ্তা	১১৩৮
তুমি যদি রঙ কাছে (কবিতা)	শ্রীনির্মল চন্দ্র বড়াল বি, এল,	১০২৪
তোমার হাসি (কবিতা)	ঐ	৫৮
তৃতীয় দৃষ্টি (কবিতা)	শ্রীমতী লীলা দেবী	২১৫
ত্যাগ ও ভোগ	শ্রীউপেন্দ্র নাথ বন্দ্যোপাধ্যায়	১০৪
দ		
দহল মালা (কবিতা)	কাজী নজরুল ইসলাম	৬৬২
দাম্পত্য বন্ধনের কথা	শ্রীনলিনী কান্ত গুপ্ত	৭৬৯
দীপ লক্ষীর আবাহন (কবিতা)	শ্রীমতী রাণা নিরুপমা দেবী	৭১২
ছই প্রণয়ী (কবিতা)	শ্রীক্ষেত্রলাল সাহা	৩৫৮
ছথিনীর ধন (কবিতা)	শ্রীমতী সরলাবালা দাসী	২২৫
ছর্গোৎসব (কবিতা)	শ্রীমতী প্রফুল্লময়ী দেবী	১১৮৭
ছঃখ সাধন (কবিতা)	শ্রীমতী রাণী নিরুপমা দেবী	৫৮৩
দেখিয়া শিখিব কি ঠেকিয়া শিখিব	শ্রীদ্বিজেন্দ্রলাল ঠাকুর	২২৭
দেশের কথা	শ্রীনিরদ রঞ্জন মজুমদার	৭০২
দ্বিমল কমল	শ্রীবিভূতি ভূষণ ভট্ট	৪৫০
ধ		
ধর্ম ও জীবন	শ্রীউপেন্দ্র নাথ বন্দ্যোপাধ্যায়	৫৬৩
ধর্মের বনিয়াদ	শ্রীমতী সত্যবালা দেবী	৬২৫, ৮৮৬
ন		
ননু কো অপারেশন (গল্প)	শ্রীমতী প্রফুল্লময়ী দেবী	৫৬৯
নর-নারায়ণ	শ্রীবারীন্দ্রকুমার ঘোষ	১০২৫
নারায়ণের নব বর্ষ	ঐ	২
নারায়ণের নিকষমণি	২৬, ২২১, ৩২৩, ৪১৭, ৫২৯, ৬৫২, ৮৩৩, ৯৫৮, ১০৫৪, ১১৪৯, ১২৩৬	

নারায়ণের পঞ্চপ্রদীপ :-

উর্দু ও বাঙ্গালা সাহিত্য	২৫৬
পুত কংগ্রেস	২০
চাই স্বাধীনতা	৮৫৫
ছঃখমার্গ	২১৬

দ্বিধা	৬৫১	
ধর্ম ও রাজনীতি	৩১৭	
নিগ্রোসমতা	৫২৭	
বাঙ্গালীর পেট্রি মটিক্স	৪২৪	
বাঁধন হারা	৩৪	
যন্ত্রপাতি ও তর্কবুদ্ধি	১০৩৫	
রূপান্তর	১০৫০	
সহজিয়া ২০৭, ৪৩৫, ৫৫২, ৬৪৯, ৭৫৫, ৮৪৭, ৯৫২, ১০৩৮, ১১৩৩, ১২৩২		
সংঘ কি ?	৪৩১	
স্বরাজ ও স্বাধীনতা	৬৪০	
স্বরাজ কাহার রাজ ও কোন্ রাজ	১০৪৩	
সাধকের প্রেম	৩১২	
নারায়ণের ৭ম বর্ষের বর্ণনাত্মক বিষয় পুঁচী	১২৪৯	
নারী মঙ্গল	শ্রীউষানাথ সেনগুপ্ত	৭৭৬
নারীর উজ্জ্বল	শ্রীশুরেশচন্দ্র চক্রবর্তী	৪০২
নারীর সমান অধিকার	শ্রীমতী সত্যবালা দেবী	১৩৪
নিকুঞ্জ (কবিতা)	শ্রীশুরেশচন্দ্র ঘটক এম্ এ	৫০৭
নিরুদ্ধেশের যাত্রী (ব. উল)	কাজী নজরুল ইসলাম	৪৭৮
নির্দাসিতের আত্মকথা	শ্রীউপেন্দ্রনাথ বন্দ্যোপাধ্যায়	৪৩, ১৩২, ২৫৭, ৩৪১, ৫০৫, ৫৮০, ৭১৩, ৮০২, ৯৩৮, ১০১৮, ১১০৪
নিশ্চিন্ত (কবিতা)	শ্রীবিজয় সেনগুপ্ত	২০৬
নীলবে (কবিতা)	শ্রীমতী প্রফুল্লময়ী দেবী	২৮০
প		
পঞ্জিচারীর পত্র	শ্রীবারীন্দ্রকুমার ঘোষ	৮৬২
পতিভার সিদ্ধি	শ্রীক্ষীরোদপ্রসাদ বিজয়াবিনোদ ৬২৩, ৭৩৩, ৮১৬, ৯১৩, ৯২২, ১১৪১	
পথ (কবিতা)	শ্রীশশীকুমোহন চৌধুরী	১২২
পথের গান (কবিতা)	শ্রীনিরুপমা দেবী	৩৬৮
পল্লী সত্য কি জনপদ সত্য	শ্রীবারীন্দ্রকুমার ঘোষ	৪৬১, ৬৫৭
পূজা (গান)	শ্রীনলিনীকান্ত সরকার	৫
পূর্ণতা (কবিতা)	শ্রীমতী লীলা দেবী	১১০৪
পেটের দায় (কবিতা)	শ্রীকালিদাস রায়	৪৫৪

প্রতিকার প্রার্থনা	শ্রীমতী প্রফুল্লময়ী দেবী	৩৬৯
প্রতিবাদ	শ্রীঅতুলচন্দ্র দত্ত	১৪৭
প্রভাতে (কবিতা)	শ্রীসরোজকুমার সেন	১৭৩
প্রভাতে (কবিতা)	শ্রীমতী বিজনবালা দেবী	৩৭৭
প্রভাস-কিলনে (কবিতা)	শ্রীমতী প্রফুল্লময়ী দেবী	৩৬৯
প্রলক্ষণ (কবিতা)	শ্রীরবীন্দ্রনাথ মিত্র	৭৩২
প্রিয় (কবিতা)	শ্রীকৃষ্ণদয়াল বসু	৮৬০
ফ		
ফাল্গুনী ও কর্তমান সমস্তা	শ্রীশৈলেন্দ্রনাথ গুহরায়	৪৯৯
ব		
বঙ্গভূমি (কবিতা)	শ্রীকালিদাস রায়	৩৩৭
বঁধু দলশনে (কবিতা)	শ্রীভূজঙ্গধর রায় চৌধুরী	৪৬৪
বঁধুয়া (কবিতা)	শ্রীহুশীল চন্দ্র ভট্টাচার্য	২৬৫
বদন ভঙ্গি (কবিতা)	দরবেশ	৬০৬
বর্তমান সমস্যা	শ্রীললিতা কান্ত গুপ্ত	৪৪২, ৪৭৯, ১১৫৩
বর্ধার গান (কবিতা)	শ্রীনিগোপাল ঘোষ	৯৯০
বাঙ্গলার সাধনা	শ্রীউষানাথ সেনগুপ্ত	৩৩৮
বাঙ্গলা কাব্যে একটি নূতন সুর	শ্রীহেমন্তকুমার সরকার	৮৬৭
বাঁধন হারা (কবিতা)	শ্রীসুবোধচন্দ্র রায়	১০৮৪
বাঁশরী (কবিতা)	শ্রীসুরেশ চন্দ্র চক্রবর্তী	৫৭৩
বাঁশী (কবিতা)	শ্রীস্বধাকান্ত রায় চৌধুরী	১৮৪
বেদনার দান	শ্রীবিভূতি ভূষণ ভট্ট	৬৭৫
বিচারক (কবিতা)	শ্রীশশাঙ্কমোহন চৌধুরী	১২০১
বিদায় চাহনি (কবিতা)	শ্রীকনীন্দ্র নাথ রায় বি, এ	২৭৫
বিপরীত (কবিতা)	শ্রীমতী লীলা দেবী	১০৫৬
বিফল নিশাথে (কবিতা)	শ্রীমতী কালি দাসী দেবী	৬৩৮
বিনিময় (কবিতা)	শ্রীমতী হেমলতা দেবী	৬৯৯
বিরহে (কবিতা)	শ্রীশৈলেন্দ্র নাথ ঘোষ	৫২৮
বিলাপ বিধুয়া (কবিতা)	শ্রীগোবিন্দ লাল মৈত্রের	১৬২
বিশ্ববিদ্যালয় গীতি (কবিতা)	শ্রীসুবোধচন্দ্র রায়	৮৯২
বিশ্ব সন্ন্যাসী (কবিতা)	শ্রীসাবিত্রীপ্রসন্ন চট্টোপাধ্যায়	৬৯৩
বিশ্বের দরবারে ভারত	শ্রীহেমন্তকুমার সরকার	৫০

বৃন্দ	শ্রীসত্যবালা দেবী	৫৫১
বৈদিক ভাষায় স্বর-প্লুতি	শ্রীবসন্তকুমার চট্টোপাধ্যায় এম,এ	৩৫৮
বোঝা (কবিতা)	শ্রীমতী প্রফুল্লময়ী দেবী	১
ব্যথিতা (কবিতা)	শ্রীগোবিন্দলাল মৈত্রের	৫৬৮
ব্রাহ্মণ (কবিতা)	শ্রীসতীনাথ বন্দ্যোপাধ্যায়	১৪৫
ভ		
ভাব সময়	শ্রীনীরদরঙ্গন মজুমদার	৩২৯
ম		
মনস্তত্ত্বের দিক	শ্রীমতী সত্যবালা দেবী	১১১০
মনোহর (কবিতা)	শ্রীপ্রিয়দেবা দেবী	৮৩১
মনোহারী সত্যতা	শ্রীনীরদরঙ্গন মজুমদার	৭৮
মহানৃত্য (কবিতা)	শ্রীমোহিনীমোহন মুখোপাধ্যায়	১২২৯
মর্মে ও বেদনা (কবিতা)	প্রসাদ	৮৯
মান্বথানে (কবিতা)	শ্রীশৈলেন্দ্রকুমার মল্লিক	১০২৮
মান্যবাদ ও অহেতুতত্ত্ব	শ্রীধীরেন্দ্রনাথ চৌধুরী	১১৬৮
মায়ের পরিচয় (কবিতা)	শ্রীশশাঙ্কমোহন চৌধুরী	৫৯৯
মিছে (কবিতা)	শ্রীকালীপদ ঘোষ	৯৯০
মিলন (গান)	শ্রীললিতা কান্ত সরকার	১১৩
মুক্তিগাথা (কবিতা)	শ্রীসুরেশচন্দ্র চক্রবর্তী	১১৭৫
মুক্তির গাথা (কবিতা)	শ্রীসুবোধচন্দ্র রায়	৪১৫
মোড় ফিরাও (গান)	শ্রীললিতা কান্ত সরকার	২২
য		
যমুনার (কবিতা)	শ্রীগিরিশচন্দ্র আচার্য কাব্যবিনোদ	৩৯৩
যাত্রী (কবিতা)	সাহাদৎ হোসেন	৪৯৭
যোগ বিরোধ	শ্রীরাজকিশোর রায়	৭৮১
স		
রাজা সন্ন্যাসী (কবিতা)	শ্রীসাবিত্রীপ্রসন্ন চট্টোপাধ্যায়	১১১৮
রুধির রঙে ফোটা (কবিতা)	শ্রীশশাঙ্কমোহন চৌধুরী	১০০৯
ন		
নীলা (কবিতা)	শ্রীকৃষ্ণদয়াল বসু	১১৬০
দ		
শমন দূত (কবিতা)	দরবেশ	৬৭৪

শব্দ সাহিত্যে মাতৃভাব	শ্রীউমাচরণ চট্টোপাধ্যায় বি, এ,	১৯, ২৩৭
শাকর দর্শন কি স্ব-বিরোধী ?	শ্রীউপেন্দ্রকুমার কর	৩৮১
শাল বিচার (কবিতা)	দরবেশ	৮৪৭
শিকার 'উটল' আদর্শ	শ্রীপ্রফুল্লকুমার সরকার	৫২১
শিবভক্তি (কবিতা)	শ্রীমোহিনীমোহন মুখোপাধ্যায়	৩২১
শিন্ন	শ্রীঅতুলচন্দ্র গঙ্গোপাধ্যায়	৩৩
শিন্ন ও স্বদেশী	শ্রীনীলদরঞ্জন মজুমদার	১২৪২
শিকার নবীন সৃষ্টি	শ্রীবীরেন্দ্রকুমার ঘোষ	৩২৪, ৫৩৪, ৬৬২
শিশুর ভিক্ষা (কবিতা)	শ্রীসুরেশচন্দ্র চক্রবর্তী	৩৪৮
শ্রাবণে (কবিতা)	শ্রীমতী প্রফুল্লময়ী দেবী	৮৬৫
সন্ত-সার	শ্রীমতী বনলতা দেবী ও বীণাপাণি দেবী	৬৭০
সত্য ও সৌন্দর্য্যবোধ	অধ্যাপক শ্রীরামপদ মজুমদার	৩৬১, ১০৫৫
সমাজ সংস্কারের ভূমিকা	শ্রীঅক্ষয়ান দাশগুপ্ত	১১৬১
সমাজের কথা	শ্রীনলিনীকান্ত গুপ্ত	১২৫, ২৮৭, ৬১৬
সহজ দান (কবিতা)	শ্রীসুবোধচন্দ্র রায়	১৩৮
সংক্ষিপ্ত পুস্তক পরিচয়		১০১, ২২৩, ৩৩৪
সাহিত্যে অহুত্ব	অধ্যাপক শ্রী রামপদ মজুমদার	৫৯, ১৬৩
সাংখ্যিক ছর্গোৎসব	শ্রীনলিনীকান্ত সরকার	৭২১
সিদ্ধি (কবিতা)	শ্রীমতী লীলা দেবী	১১২
সিনফিনের জন্মকথা	শ্রীউপেন্দ্রনাথ বন্দ্যোপাধ্যায়	১৫৭
সিনফিনের পরিণতি	ঐ	৩৭৯
স্বপ্নের ঘর গড়া (উপভাস)	শ্রীঅতুলচন্দ্র দত্ত ২৩, ১৭৩, ২৩৭, ৩৫০ ৪৮৮ ৭৪৯, ৭৮২, ১৮৭৫, ১০২৯, ১০৬৯, ১২০৩	
স্বপ্ন ও স্বরলিপি	শ্রীমতী মোহিনী মেনগুপ্তা	৫৩৮, ৫৮৪
সৌন্দর্য্য সাধনা	শ্রীবিনয়চন্দ্র সেন বি, এ,	১৩
স্বরলিপি	শ্রীনলিনীকান্ত সরকার	৩৩৫
স্বরাজ (কবিতা)	শ্রীমতীলীলা দেবী	১২২৪
স্মৃতি	শ্রীমতী বীণাপাণি ও বনলতা দেবী	২৬৭
হাজিরা (কবিতা)	হ প্রসাদ	৭৪৮
হাত হ'খানি	শ্রীবিভূতিভূষণ ভট্ট	৫
হারামণি (কবিতা)	কাজী নজরুল ইসলাম	১২১৬

নারায়ণ

৭ম বর্ষ, ১২শ সংখ্যা] [কার্তিক, ১৩২৮ সাল ।

বর্তমান সমস্যা

[শ্রীনলিনীকান্ত গুপ্ত]

জগৎটা সে বড়ই খাপছাড়া—out of joints—হইয়া পড়িয়াছে, সে বিষয়ে আজকাল বোধ হয় আর ছুই মত নাই। কোথাকার কি যেন ভাঙ্গিয়া গিয়াছে, খিল ঢিলা হইয়া পড়িয়াছে, সব গোলমাল এলোমেলো অবস্থায়। মানুষের জীবন কোন দিনই একেবারে নির্দোষ ছিল কি না সন্দেহ, অনেক খানেই হয়ত জোড়াতালি চাপাচুপি রফারফি ছিল; তবুও মোটের উপর একটা বেশ দৃঢ় বাঁধন নিবিড় শৃঙ্খলা শাওয়া যাইত। কিন্তু এমন স্পষ্ট বেস্তুরা বেতালি অবস্থায় মানুষ বোধ হয় এই প্রথম পড়িয়াছে। সুখ সে হয়ত কোন দিনই পায় নাই, আজ কিন্তু সে স্বস্তিকে পর্যাস্ত হারাইতে বসিয়াছে। পাশ্চাত্য বৈজ্ঞানিকেরা হিসাব নিকাশ করিয়া দেখিয়াছেন যে বর্তমান যুগে অ-ধাতস্থ লোকের (unstable mind বা neurotics) সাদা কথায়, পাগলের—ভীষণ প্রাচুর্য্য হইয়াছে, এমন কোন দিনই ছিল না। শেষ পুগলামীর যুগ গিয়াছে, ইউরোপে ফরাসী বিপ্লবের যুগ। কিন্তু তখন বায়ুদেবতার রূপা হইয়াছিল বিশেষভাবে ফরাসী দেশের উপর—আজ কাল সমস্ত জগৎ ভরিয়া তাহার ওলট-পালট চলিতেছে।

বলা যাইতে পারে, নূতন সৃষ্টির নূতন সৃষ্টির এই হইতেছে পূর্বাভাস। কিন্তু তাই মনে করিয়া ত চূপ করিয়া বসিয়া থাকা যায় না। গাছ বা পাথর বা পশু নিশ্চিত হইয়া থাকিতে পারে; কিন্তু মানুষের পক্ষে তাহা সম্ভবও নয়, উচিতও নয়। মানুষের ধর্ম হইতেছে সজ্ঞানে সৃষ্টির কাজে সহায়তা করা—

এইট সে যতখানি করিতে পারিবে ততখানিই তাহার সার্থকতা স্মতরাং আমরা দেখিতে চেষ্টা করিব, এই সঙ্কটাবস্থায় কি করা মানুষের উচিত, কি না করিলে হয়ত নূতন সৃষ্টির নূতন শৃঙ্খলার পরিবর্তে জগতে ঘটিবে শুধু প্রলয় আত্যন্তিক বিনাশ।

জগতের কলটা বিগড়াইয়া গিয়াছে—এটাকে সারিতে হইবে। অনেকে তাই নজর দিয়াছেন, নেহাৎই কলকজার দিকে, বাঁধন গুলি আটয়া দাও, পেরেকগুলি কসিয়া দাও, তাক্সা মরিচা ধরা পুরান যন্ত্রপাতির পরিবর্তে নূতন যন্ত্রপাতি বসাও। অর্থাৎ আইন কাছন করিয়া বিধি নিষেধ দিয়া বাহিরের কর্ম প্রতিষ্ঠানগুলির সংস্কার কর, নূতন ব্যবস্থা মানুষের হাতে তুলিয়া দাও। স্মৃশঙ্খলার, শ্রায়ের প্রতিষ্ঠার জন্ত সভা সমিতি কর, কর্তব্যের নিয়মাবলী বাঁধিয়া দাও, কার্যের ভাগ বাটরা কর, দায় ও দাবির যথাযথ পরিমাণটা মাপিয়া জুখিয়া ঠিক করিয়া ফেল। তাই সমাজের মানুষ-জীবনের কত রকম ছক আকিয়া system তৈয়ার করিয়া যে সম্মুখে ধরা হইতেছে তাহার ইয়ত্তা নাই। প্রেসিডেন্ট উইলসন চৌদ্দটি স্বতন্ত্র জগতের দিব্যযুগের চমৎকার একটি প্লান করিয়া দিলেন। বোলশেভিকেরা তাহাদের ব্যবস্থাপকদের নির্দেশ অনুসারে ভয়ানক জোরে মানুষকে নূতন একটা যন্ত্রের মধ্যে ফেলিয়া ঢালাই করিতে ব্যস্ত হইয়াছে। আমাদের দেশেও বলা হইতেছে, একটা গবর্নমেন্ট বা শাসন যন্ত্র পরিবর্তন করিতে পারিলেই ভারতবর্ষের সকল গোলমাল সকল সমস্যা চুকিয়া যাইবে।

কিন্তু এ কথাটা বুঝা কি এতই কঠিন, সব নিয়মাবলীই যে চোখা কাগজের টুকরা a scrap of paper? আইনকাছনের এমন কোন স্বতঃসিদ্ধ শক্তি নাই, যাহার বলে সে আপনা আপনিই কার্যে পরিণত হইয়া যাইবে; জোর জবর-দস্তি করিলেও ব্যবস্থা অনুসারে যে অবস্থা হইবে, হইলেও যে টুকিয়া থাকিবে এমন নিশ্চয়তা কিছুমাত্র নাই। লেফাফা মাফিক যতই থাকুক না কেন, মানুষের কাজ হইবে তাহার ভিতরটা যেমন সেই অনুসারে। ভিতরের প্রয়োজন অনুসারে মানুষ যন্ত্র গড়িয়া লইবে, বাহির হইতে দেওয়া কোন যন্ত্র সে ব্যবহার করিতে চাহিবে না, চাহিলেও পারিবে না। ভিতরটা যাহার দস্যু ভাবাপন্ন, সে-মানুষের হাতে সাধুর দণ্ডকমণ্ডলু তুলিয়া দিলে কি হইবে? কমণ্ডলুতে সে বিষ গুলিবে, দস্ত দিয়া মাথা ফাটাইবে।

জগৎটা, মানুষের জীবনটা হুঃস্থ পীড়িত। স্মতরাং প্রতিকার চাই জগতের

কর্ম প্রতিষ্ঠানে নয়, বাহিরের জীবনে নয়, প্রতিকার চাই মানুষের নিজের অন্তরে। মানুষকে ভিতরে ভিতরে শুদ্ধি ও স্বাস্থ্য পাইতে হইবে, তবেই বাহিরে শুদ্ধি ও স্বাস্থ্য দেখা দিবে। তাই অনেক মহাপুরুষ কবি শিল্পী বলিতে-ছেন, মনটাকে আগে বদলাও—মনো পূর্বসঙ্গমাধর্মা—সকল ধর্মের আগে আগে চলিয়াছে মন, মনের গড়ন যেমন ধর্মেরও গড়ন তেমনি হইয়া উঠে। কর্মের পরি-বর্তনের আগে চাই ভাবের পরিবর্তন, ভাবের পরিবর্তনের অবশ্যস্বাবী ফল হইতেছে কর্মের পরিবর্তন—মনের, ভাবের পরিবর্তনের পরে কর্মের পরিবর্তন সহজ, পূর্বে একেবারে অসাধ্য।

এখন, এই মনের বা ভাবের পরিবর্তনের অর্থ কি? মানুষের ধারণা হইবে অল্প রকমের, তাহার চিন্তা চলিবে নূতন স্রোতে। মানুষ কেবল নিজের কথা ভাবিবে না, ভাবিরে দেশের দেশের কথা; মানুষ কেবল স্বার্থ দেখিবে না, লাভ দেখিবে না, দেখিবে পরার্থ, দেখিবে কল্যাণ; মানুষ খুঁজিবে আদর্শ, উচ্চতর উদারতর সত্য। মানুষের চিন্তা জগতে পরিবর্তন চাই, তাহার বুদ্ধি নির্মূল হইবে, সেখানে ফুটিয়া উঠিবে স্থলজগতের পাশব প্রকৃতির ছায়া নয়, পরন্তু একটা স্থলজগতের একটা দিব্য প্রকৃতির আলো। ঠিক কাথ, কিন্তু ইহাকেই যথেষ্ট বিবেচনা করিলে বিষম ভুল হইবে। এই ভুল আমরা পদে পদে করিয়াছি ও করিতেছি—ইহার সংশোধন চাই।

আধুনিক যুগে জন্মগণ দেশে চিন্তাশক্তির যেমন পরিচয় পাইয়াছি, আদর্শের প্রাচুর্য্য সেখানে যেমন হইয়াছে, এমন কোথাও আর হয় নাই। সারা ইউরোপ ত তাহার শিক্ষা দীক্ষায় মুগ্ধ হইয়া গিয়াছিল—কিন্তু এই ইউরোপই আবার যুদ্ধের সময় জন্মগণের মূর্তি দেখিয়া স্তম্ভিত হইয়া পড়িয়াছিল। মনের পরিবর্তনে চিন্তের পরিবর্তন হয় না, চিন্তের উপর একটা ভাষা ভাষা জলুস দিয়া যাইতে পারে বটে কিন্তু প্রয়োজনের চাপে তাহা উপিয়া যায়, স্বভাবের স্বরূপ তখন প্রকাশিত হইয়া পড়ে। চিন্তের সংস্কারের বিরুদ্ধে মনের ভাব বিশেষ কার্যকরী হইতে পারে না, বরং সাফাতে না হউক লুকাইয়া মন চিন্তের ধারা অনুসারেই চলে, রকম ফের দিয়া চিন্তেরই খোরাক জুটাইতে থাকে। Intellectualist-এরা, ধর্মপ্রচারকেরা এই কথাটায় তেমন আমল দেন নাই বলিয়াই তাঁহারা মানুষের প্রকৃতির সাথে যুদ্ধ করিয়া বিশেষ ফল লাভ করেন নাই।

বুদ্ধির বিকৃতি তত দোষের নয়, যত দোষের হইতেছে চিন্তের বিকৃতি। বুদ্ধিকে বিশুদ্ধ করিতে হইবে, সন্দেহ নাই, কিন্তু সেই সাথে বিশেষ ভাবে

শুধু করিতে হইবে চিত্তকে। অর্থাৎ আদর্শকে, সত্যকে, মঙ্গলকে শুধু বুঝিলে চলিবে না, স্বীকার করিলে চলিবে না; তাহাকে ভালবাসিতে হইবে, তাহাতে অনুরক্ত হইতে হইবে—তাহাকে হৃদয়ঙ্গম করিতে হইবে। প্রেমের রসে সত্যকে যতদিন অভিসিক্ত করা হয় নাই, আনন্দে যতদিন আদর্শ সজীব সবুজ হইয়া উঠে নাই, ততদিন সে সত্য সে আদর্শ স্বন্দর হয় নাই, স্বভাবের মুখ ফিরাইতে পারে নাই, জীবন গতির মধ্যে নূতন টান বহাইতে পারে নাই। বুঝিয়াছি যাহা তাহাকে ভালবাসিতে হইবে; মস্তিষ্কে যাহা নীরদ, চিত্তে তাহাকে সরস করিয়া ধরিতে হইবে—নতুবা তাহা কার্যোপযোগী হইবে না, নতুবা পরিশেষে দেখিব—

আমি কেবলি স্বপন করেছি বপন

বাতাসে!

এখানেও তবুও শেষ নয়। মনের ভাব প্রথমে দরকার, তারপর মনের ভাবকে চিত্তের ভাবুকতায় পরিণত করিতে হইবে, তবুও কিন্তু সত্য স্থির জাগ্রত নিরেট অটুট হইয়া দেখা দেয় না। আমাদেরকে আরও অগ্রসর হইতে হইবে—চিত্তের পরে, প্রাণে অথবা ঠিক করিয়া বলিতে গেলে শরীর-ধেঁয়া প্রাণের স্তরে পৌঁছিতে হইবে। জগতে কত আন্দোলন—movement হইয়াছে, ধর্মের আন্দোলন সমাজের আন্দোলন; কিন্তু কিছুই ত তেমন স্থায়ী হয় নাই। মনের ভাব বা চিন্তামাত্র লইয়া নয়, চিত্তের (ও প্রাণের উপরের স্তরের) আবেগ লইয়াই, ত কত মহান আদর্শ জগতে আন্দোলিত হইয়া উঠিয়াছে; কোনটা একেবারে বিফল হয় নাই, প্রত্যেকেই কিছু না কিছু নবজীবনের পলিমাটি ফেলিয়া গিয়াছে, সত্য কথা; কিন্তু প্রয়াসের তুলনায় ফল, আশার তুলনায় লাভ, উচ্ছ্বাসের তুলনায় বস্ত কতটুকু পাওয়া গিয়াছে? লোকে যে জগতের মানব জীবনের ভবিষ্যৎ সম্বন্ধে শ্রদ্ধালু হইতে পারে না, আশ্তিক হইতে পারে না, তাহার কারণই এইখানে।

বস্তুতঃ জগতে শেষ পর্যন্ত টিকিয়া থাকে কোন শক্তি, পরিণামে কাহার জয় অবধারিত? প্রকৃতিঃ যান্ত্রিকতানি—এই প্রকৃতির অর্থ নাম প্রাণের ধর্ম। চিত্ত হইতেছে অসীম সজীব, সকল জিনিষের বীজ সেখানে, সকল জিনিষের রস সেখানে। কিন্তু জিনিষ যে বিশেষ রূপ পাইতেছে, যে নিয়মে গড়িয়া উঠিতেছে চলিতেছে, যে ভঙ্গীতে কার্যে ফলিত হইতেছে তাহা সব দিতেছে প্রাণের শক্তি। হস্তাস্যৈব সর্বের রূপমসামৈতি ত এতস্যৈব সর্বের রূপমভবম্। চিত্ত রঙ

দিতে পারে কিন্তু আকার দিতেছে প্রাণ। চিত্তের সংস্কারের কথা পূর্বে বলিয়াছি, কিন্তু এই সংস্কারের মূলে রহিয়াছে যে আদি মৌলিকশক্তি তাহা প্রাণের শক্তি। সত্যকে বুঝিবার সত্যকে ভালবাসিবার আগে সত্যকে পাওয়া চাই। কোথায় সত্য? মানুষের কাছে নিবিড়তম নিকটতম সত্যতম সত্য হইতেছে প্রাণের সত্য। প্রাণের প্রকৃতির যে প্রতিমা তাহার উপরই মানুষ অনুরক্ত, মানুষ তাহাকেই ভাল বুঝে, কার্যে অন্ততঃ তাহাকেই ফলাইয়া চলে।

প্রাণাঙ্ক উদেতি প্রাণেঃ অন্তমেতি তং দেবশক্তিরে ধর্মঃ

স এবাদ্য স উ শ্ব ইতি।

ইউরোপীয় চিন্তা জুগতেও আজ কাল এই প্রাণের কথাটাই খুব বড় হইয়া দেখা দিয়াছে। তর্কবুদ্ধির বক্ষ্যাত্ম, ভাবানুভূতির পক্ষস্থ দেখিয়া সেখানকার দার্শনিক বৈজ্ঞানিকগণ বলিতেছেন আসল সত্য হইতেছে Vital plane এর সত্য Physico-biological laws—স্থিতির মধ্যে বিবর্তন, মানুষের মধ্যে রূপান্তর চলিতেছে এই প্রাণের ধর্মকে ধরিয়া, ধরিয়া। এই ধর্ম অটুট অব্যর্থ, ইহাকে কাটাইয়া চলিবার উপায় নাই। প্রথমতঃ, মানুষের স্বভাব গড়িয়া উঠিয়াছে ইহারই নিয়ম অনুসারে। মানুষের হৃদয়, মানুষের মন এই বস্তুটিরই ফুল লতা পাতা, এখানে যে সব প্রেরণা আছে তাহাদেরই সার্থকতার বহু বিচিত্র উপায়; এই সত্যটির সহিত মনের হৃদয়ের যে কল্পনার যে অনুভবের যত সঙ্গতি তাহারাই তত শক্তিমান, তত ফলপ্রসূ আর যে সব জিনিষ ইহার সম্পর্ক-বিরহিত বা ইহার পরিপন্থী তাহার টিকিয়া থাকিতে পারে না। মানুষের স্থূল শরীরটিও এই প্রাণেরই বাহন, প্রাণের ধর্মের ফল বা পরিণতি, জাগ্রত মূর্তি মাত্র। দ্বিতীয়তঃ, মানুষের প্রতিষ্ঠানাদিও গড়িয়া উঠিয়াছে সেই প্রাণেরই ধর্ম অনুসারে মানুষের যে মৌলিক প্রকৃতি তাহাই চরিতার্থতার জন্ত। সমাজ যে একটা বিশেষ রূপে বাধা পড়িয়াছে, মানুষ যে একটা বিশেষ ধরণে জীবন নির্বাহ করিতেছে, গোষ্ঠীতে গোষ্ঠীতে ব্যক্তিতে ব্যক্তিতে যে একটা বিশেষ প্রণালীতে আদান প্রদান চলিতেছে—এ সমস্তই নিয়ন্ত্রিত হইতেছে মানুষের, প্রকৃতির প্রাণ শক্তির প্রয়োজন বা দাবি অনুসারে।

সুতরাং পৃথিবীতে স্বর্গ বানাইব, সমাজকে নন্দনে আর মানুষকে নন্দনের পারিজাতে পরিণত করিব অথবা এই রকম আরও যে কত কত utopia বা স্বপ্নের রাজ্য মানুষের মনে ও চিত্তে খেলিয়া উঠিতেছে তাহা সত্য হইতে পারে,

বাস্তব হইতে পারে একমাত্র তখনই যখন মানুষের প্রাণে তদনুযায়ী রূপান্তর ঘটিয়াছে বা ঘটাইতে পারিয়াছি। কিন্তু ইহা কি কখন সম্ভব ?

সমস্তার ব্যাসকূট প্রাণের রূপান্তর। কারণ, সকল রূপান্তরের, বিশেষতঃ স্থূল বাস্তব ভৌতিক রূপান্তরের কেন্দ্র হইতেছে এই প্রাণশক্তি। প্রাণে একরকম গ্রন্থী পড়িয়াছে, তাই জগতের সমাজের মানুষের চেহারা এই রকম হইয়াছে ; চেহারা আর একরকম করিতে হইলে এই গ্রন্থী খুলিয়া আর রকম গ্রন্থী দিতে হইবে। কিন্তু প্রাণের ত যথা ইচ্ছা রূপ দেওরা যাইতে পারে না, যেমনটি ভাল লাগে যেমনটি পছন্দ হয় তেমন করিয়া প্রাণকে ঢালাই করিতে পারি না—প্রাণ যে চলিয়াছে নিজের তোড়ে নিজের জোরে ; ছ দিন হয়ত তাহাকে এখানে ওখানে বাঁধা দিয়া রাখিতে পারি, খাল কাটিয়া এদিক ওদিক করিয়া দিতে পারি, কিন্তু ভরা বর্ষার কীর্তিনাশার মত সে একদিন পিব ভাঙ্গিয়া চুরিয়া একাকার করিয়া আপন পথ করিয়া লইয়া চলিবে, তাহার ত কোন সন্দেহই নাই।

তাই ত অনেক মহাপুরুষ বলিয়া গিয়াছেন, অনেক ধর্ম ও শিক্ষা দিয়াছে, জগতের সমস্ত মানুষের বা সমাজের পরিবর্তন সম্ভব নয়, ইহজগতের নিয়ম অনুসারেই ইহজগৎ চিরকাল চলিবে। মানুষের একমাত্র লক্ষ্য হইতে পারে ব্যক্তিগত মুক্তি অর্থাৎ নিয়ম বদলানের চেষ্টা নয়, নিয়মের অতীত হইয়া চলিয়া যাওয়া। বহুর, রূপের, সঙ্ঘের খেলা যেখানে সেখানেই হইয়াছে প্রাণের, মায়ার, অবিচার প্রতিষ্ঠা—এ সকলের শেষ ঐকান্তিক নিবৃত্তি যেখানে সেই শান্ত এক অদ্বৈত সত্যে নির্বাণ লাভ করাই, মানুষের বিজ্ঞা-সিদ্ধি, পরম পুরুষার্থ। জগৎকে স্বর্গ বানান যায় না, যদি চাও স্বর্গে উঠিয়া যাইতে পার।

ইহাই যদি সত্য হয়, তবে অবশ্য কোন উপায় নাই। কিন্তু আশার কথাও আছে। মানুষের মনে চিত্তে যে সব সোণার স্বপ্ন ফলিয়া উঠে, যুগে যুগে উঠিতেছে ও মানুষ বার বার বিফল হইয়াও চেষ্টা করিতেছে তাহাকে বাস্তব করিয়া তুলিতে—প্রাণের মধ্যে যদি ইহার কোনই শিকড় না থাকিবে, তবে তাহা আদৌ গজাইয়া উঠে কেন ? মানুষের মধ্যে একটা স্বাভাবিক প্রেরণা ঐ অসম্ভবের জন্তই ক্রমাগত চলিতে চাহিতেছে কেন ? শুধু তাই নয়, এমন মহাপুরুষও অনেক আছেন যাহাদের কণ্ঠে শুনিতে পাই সত্যের অটুট বারতা—

বেদাহমেতৎ পুরুষং আদিত্যবর্ণং তমসঃ পরস্তাৎ

যাহারা আপন সত্যদৃষ্টি সত্যসৃষ্টির উপর ভর করিয়া, নির্ভয়ে বলিতে

পরিয়াছেন যে প্রাণের তামসরূপের পশ্চাতে আছে একটা দিব্যরূপ, এই তামস-রূপকে সরাইয়া বাস্তব জীবনে সেই দিব্যরূপকে ফলাইয়া ধরা যায় ; প্রাণের-রূপান্তর হুঃসাধ্য ক্ষুরস্যা ধারাইব নিশিতা হুরত্যা—হইলেও, একান্ত অসাধ্য নয়।

প্রাণের রূপান্তর অসম্ভব বোধ হইয়াছে এই জন্ত যে প্রাণকে ঢালাই করিতে চেষ্টা করিয়াছি মনের ও চিত্ত বেগের ধারায়, বুদ্ধির ও নীতির নিয়ম প্রাণের উপর চাপাইতে চাহিয়াছি। কিন্তু আধারের, অন্তঃকরণের, এ পারের সকল স্তরের কেন্দ্র হইতেছে প্রাণশক্তি ; এ পারের কোন শক্তিই প্রাণশক্তির উপর প্রভুত্ব করিতে পারে না। মানুষের বুদ্ধিবৃত্তিকে, নৈতিক বৃত্তিকে, ভাবুকতার বৃত্তিকে সমস্তই প্রাণময় পুরুষের ঈশ্বরত্ব আজ না হউক কাল স্বীকার করিতে হইবে—আজও স্বীকার করিতেছে তবে গৌণভাবে, ভিন্ন রকমে। প্রাণময় পুরুষের প্রভু কে, ঈশ্বর কে ? কাহার নিকট এই অস্তুর আঁজ বলিদান করিতে পারে ? এমন কোন ধর্ম আছে কি না, যাহার নিকট প্রাণের ধর্ম হার মানেন—এজন্ত নয় যে সেখানে প্রাণ বলিয়া কোন পদার্থ থাকে না, কিন্তু এই জন্ত যে প্রাণ সেখানে পায় গভীরতর প্রাণ, প্রাণের ধর্ম সেখানে আরও একটা উদারতর ধর্মে রূপান্তরিত হইয়া যায় ?

এক দিকে নিশ্চল ভেদাভেদ রহিত সত্তা—একঃসৎ—অক্ষর ব্রহ্ম, ও আর এক দিকে এই চঞ্চল ভেদাঙ্ক প্রাণময় জগৎ। এই উভয়ের মাঝখানে আছে একটা সত্যের শুধু সত্যের বা সৎএর প্রতিষ্ঠান নয়, সত্যের ও স্বভাবের অর্থাৎ সত্যধর্মের, চিন্ময় শক্তির বৃহৎ লোক—ইহার নাম উপনিষদে দেওয়া হইয়াছে বিজ্ঞানময় লোক ; এখানেই আছে ধর্মের স্বরূপ, কর্মের প্রকৃত বিধান, প্রকৃতির বিশুদ্ধ মূর্তি। প্রাণময়পুরুষ মনোময় ও অন্তরময় পুরুষকে লইয়া এই বিজ্ঞানময় পুরুষেরই একটা বিরূত স্বভাব ফলাইতেছে ; প্রাণময় পুরুষ নিজের ধর্ম অনুসারে চলিতেছে, অজ্ঞানের বশে আপন অন্তর্ধ্যামী বিজ্ঞানময় পুরুষকে অগ্রাহ্য করিয়া অস্বীকার করিয়াই যেন চলিতেছে, কিন্তু তবুও প্রভুর শক্তি সে অহরহ অনুভব করিতেছে। উপরের, ওপারের এই যে সত্য ধর্ম তাহা প্রাণে পূর্ণ প্রকটিত হইতে পারে, প্রাণ যদি শান্ত হইয়া তাহাকে আসিতে পথ দেয়, তাহার ভঙ্গী অনুসারে চলিবার প্রণতি তাহার থাকে। এই অধ্যাত্ম-পুরুষের চিন্ময় তপোময় ধর্মই একমাত্র প্রাণের ধর্মকে পরিবর্তিত রূপান্তরিত করিতে পারে, মানুষের মনকে চিত্তকে দেহকে একটা নুতন কাঠাম দিতে পারে, স্বভাবের ভাব পরিবর্তন

করিয়া সমাজের মূর্তিও অশ্রু রকম করিয়া দিতে পারে। সমাজের স্থায়ী পরিবর্তন, এই এক রূপান্তর ছাড়া আর কোন পথে সম্ভব নহে। প্রাণকে আর কোন শক্তি দিয়া গড়িতে বা চালাইতে পারা যায় না।

আজ যে মনুষ্য সমাজে বিশৃঙ্খলা দেখা দিয়াছে, মানুষের প্রাণে—মনে, চিন্তে দেহে একটা অপ্রকৃতিস্থ ভাব বিশেষ ভাবে ফুটিয়া উঠিয়াছে, তাহার কারণ আমরা নির্দেশ করিতে চাই ঐ উপরের লোক হইতে অধ্যাত্ম-ধর্মের অবতরণের চাপ। মানুষের সমস্ত আজ তাই ইহাকে অভ্যর্থনা করিবার, ধারণ করিবার সাধনা।

নীলা

[শ্রীকৃষ্ণদয়াল বসু, বি-এ]

বসে আছি আপন মনে

সুন্দর বিজন হৃদয়-তীরে

তোমারি তরঙ্গ এসে

সেখায় পরশ করে ধীরে।

তরী তোমার ছলে ছলে

নেচে বেড়ায় কূলে কূলে ;

গানটি তোমার উঠে জাগি

আমারি বুক চিরে চিরে !

উদয়-রবির প্রথম কিরণ

আজি আমার পড়লো মাথে

উঠলো হেসে বসুন্ধরা

ওগো, তারি সাথে সাথে।

এমনি প্রেমে এমনি গানে

বসু, তোমার আলোর বানে

উজল কোরে তুলো আমার

বিদায়-দিনের সন্ধ্যাটির।

সমাজসংস্কারের ভূমিকা

(শ্রীঅশ্রুমান দাশগুপ্ত)

আজকাল আমরা সকলেই বুঝিতে পেরেছি যে আমাদের বর্তমান সমাজ ক্রমশঃই জটিল হ'তে জটিলতর হয়ে চলেছে। কিন্তু এই জটিল সমাজের গ্রন্থিগুলি মোচন করে সমাজকে শ্রেয়ঃ ও কল্যাণের পথে পরিচালিত করতে হ'লে যতটা চেষ্টা করা ও যত্ন লওয়া দরকার ততটা আমরা করছি কিনা বিশেষ সন্দেহ। সমাজের উপর আমাদের কর্তৃত্ব বজায় রাখতে হ'লে যে সমস্ত গুলি আজ আমাদের সম্মুখে উপস্থিত সেগুলিকে সত্যের আলোতে পরীক্ষা করে যথাযথ সমাধান করতে হবে। নচেৎ সমাজের অশেষ অমঙ্গল অবশ্যস্বভাবী যে সমাজসৌধ এতদিনের সাধনার ফলে গড়ে তোলা হয়েছে তার পতন একেবারে অনিবার্য।

গত আশাঢ় মাসের ভারতবর্ষে “চয়ন” বিভাগে উদ্ধৃত শ্রদ্ধেয় ডাক্তার শ্রীকার্ত্তিকচন্দ্র বসু এম্ বি মহাশয়ের “স্বাস্থ্যের অবস্থা ও ব্যবস্থা” নামে প্রবন্ধটি পড়লেই উপলব্ধি হবে যে আজ কোন সমস্তাটা আমাদের প্রবল হয়ে পড়েছে। বাংলার ২৩টা জেলার অধিবাসীর জন্মমৃত্যুহারের যে তালিকা সেখানে প্রকাশিত হয়েছে তা দেখলেই বোঝা যাবে বাঙালীকে যে “Dying race” বলা হয় সে একটুও অত্যাুক্তি নয়। মৃত্যুর হার জন্মের হারের চাইতে এ ভাবে বেড়ে চললে, কিম্বা বর্তমান অবস্থাটার “ভাল”র দিকে পরিবর্তন না ঘটলে বাংলা শীঘ্রই শ্মশানে পরিণত হবে। কি উপায়ে এই ধ্বংসোন্মুখ জাতিকে ধ্বংসের করাল গ্রাস হ'তে রক্ষা করা যায় এইটাই আজ আমাদের প্রধান চিন্তার বিষয় হওয়া উচিত।

উনবিংশ শতাব্দীর শেষভাগে ইউরোপে এপ্রকারেরই একটা অবস্থা সমস্ত জাতীয় জীবনে এসে পড়েছিল, আর আমাদের বর্তমান সমস্তাটার মত একটা সমস্তা বিপুল আন্দোলন ও প্রভূত গবেষণার সৃষ্টি করেছিল। কি উপায়ে একটা জাতি এই বিশ্বরূপী জীবনযুদ্ধে আত্মরক্ষা করে উন্নতির পথে ধাবমান হতে পারে—এই প্রশ্নের সমাধানকল্পে তখনকার বড় বড় দার্শনিক ও সাহিত্যিকগণ আত্মনিয়োগ করেছিলেন। এ আলোচনার ফলেই দেশে একটা নূতন বিজ্ঞানের সৃষ্টি হয়েছিল ইংরাজীতে একে Eugenics বলা হয়। ইংলণ্ডে Sir Francis Galton এই বিজ্ঞানের প্রতিষ্ঠাতা।

বর্তমান যুগে জীবনযুদ্ধটা অত্যন্ত সঙ্কটময় ও ভীষণ হয়ে পড়েছে। ব্যক্তির পক্ষে কিম্বা জাতির পক্ষে আত্মরক্ষা করে অগ্রসর হওয়া কতটা কষ্টসাধ্য ও শ্রমসাপেক্ষ সে অস্বভব করতে কিম্বা এ বিষয়ে অভিজ্ঞতা লাভ করতে আমরা কেহই বাদ পড়ি নাই। এ বিশাল জগৎজোড়া প্রতিযোগিতাক্ষেত্রে জাতির কোন সম্পত্তিটা সর্বাপেক্ষা কার্যকরী হবে এ প্রশ্ন স্বতঃই আমাদের মনে জেগে উঠে। এর উত্তর পণ্ডিত Ruskin এর ভাষায় পাই “There is no wealth but life” জনবলই জাতির একমাত্র সম্পত্তি। তবেই বর্তমান যুগে একটা জাতির জয়ী হতে হলে তার সর্বাপেক্ষা অধিকসংখ্যক আর সব চাইতে বেশী কর্মক্ষম ব্যক্তিরূপ সম্পত্তি একটা স্থায়ী রকমের “ব্যাক” থাকা চাইই। কি উপায় অবলম্বন করলে পর একটা জাতিতে অধিক সংখ্যক কার্যক্ষম শক্তিসম্পন্ন প্রতিভাবান্ সন্তানের উৎপত্তি ও রক্ষা হতে পারে সেই উপায় নির্ধারণ ও তত্ত্বাধেয় Eugenicist দের মুখ্য উদ্দেশ্য।

বাঙ্গালী জাতির—বর্তমান অবস্থায় এই “সুপ্রজনন” বিজ্ঞানের আলোচনা হওয়া খুবই দরকার—কেন না আমাদের যে জন সম্পত্তির “ব্যাক” ছিল সেখান থেকে ক্রমাগত ব্যয়ের উৎসবই চলছে, জমার বরে একটা কাণা কড়িও পড়ে নাই। মিথ্যা লজ্জার থেকে এড়াতে না পেরে এই কল্যাণকর নববিজ্ঞানটির আলোচনার আবশ্যকতা বোধ হয় আমরা উপলব্ধি করতে পারব না। এই প্রাণঘাতিনী লজ্জা আমাদের ছাড়তেই হবে—কারণ বেঁচে থাকা ত আমাদের চাইই এইটাই আমাদের সর্বপ্রথম কর্তব্য এমন কি নীতির দিক হতেও।

তারপর এই বিশিষ্ট কারণের সঙ্গে আরও কতকগুলি ছোট খাট রকমের কারণ জড়িত আছে যার জন্ত এ বিষয়ের আলোচনা খুব আবশ্যক বলে মনে হয়। গত ইউরোপের মহাযুদ্ধের ফলে আমাদের দেশে ভীষণ “অর্থসঙ্কট” ও “অন্নসমস্যা” এসে পড়েছে। এই সমস্যার সমাধান আমরা নানাভাবে করছি। জাতীয় শিল্প বিস্তার, চাকরীর মোহ ত্যাগ করে ব্যবসা বাণিজ্য অবলম্বন প্রভৃতি উপায়ে এই অন্নকষ্ট ও অর্থান্ধার দূর হইতে পারে মহাত্মা প্রফুল্লচন্দ্র এ কথা আমাদের বরাবর বলে আসছেন। কিন্তু আমার মনে হয় আমাদের দেশের যুবক সমাজ “মহাত্মা রায়” এর প্রদর্শিত সু-পথটী নানাবাধাবিহীন সঙ্কুল ও আয়াসসাধ্য মনে করে গ্রহণ করতে পারছেন না। বিভিন্ন উপায়ে এই প্রশ্নের সমাধানে আজ তারা প্রবৃত্ত হয়েছেন। বর্তমান আর্থিক অনাটনকালে “বিবাহ না করা” কিম্বা কোন উপায়ে বংশ

বিস্তারের পথ অবরুদ্ধ করা প্রভৃতি বিষয় তাদের মধ্যে একটা মন্ত আলোচনার ব্যাপার হয়ে পড়েছে। এগুলি আমার মনগড়া কথা নয় একটু চেষ্টা করলেই এর সত্যতার প্রমাণ সকলেই পেতে পারেন। এ সম্বন্ধে আমি আর অধিক কিছু বলব না যতটুকু বলেছি ততটুকু বলবার তাৎপর্য এই যে, আজ যে বিষয়টার অবতারণা আমি করতে যাচ্ছি তাকে কেহ যেন অনাবশ্যক বলে উড়িয়ে না দেন।

আমার এই প্রবন্ধের আলোচনার বিষয় বলতে বিবাহ-সংস্কার। সুপ্রজনন বিত্তা সম্বন্ধে কিছু বলতে হলে এখান থেকেই আরম্ভ করতে হবে। বিবাহ বন্ধনের মধ্যেই নারী ও পুরুষের যৌন সম্মিলনের ফলেই মুখ্যভাবে ব্যক্তির ও গোণতঃ জাতির সৃষ্টি হয়ে থাকে। বিবাহের উদ্দেশ্য কি এ সম্বন্ধে আমাদের দেশের শাস্ত্রকার বলে গেছেন “পুত্রার্থে ক্রিয়তে ভার্য্যা।” পাশ্চাত্য দেশের সমাজতত্ত্ববিদগণ বলেছেন “The function of marriage is to maintain the species”। সংসারে সন্তান উৎপাদনের দ্বারা সমাজস্থিতির জগ্গই স্বামী-স্ত্রীরূপে পুরুষ ও নারীজাতির যৌন সম্বন্ধের প্রতিষ্ঠা হয়েছে। আমাদের আর্থ উক্তির সঙ্গে বর্তমান যুগের পণ্ডিতদের উক্তির বেশ সঙ্গতি আছে। একটা কথা এখানে মনে স্বভাবতঃই জেগে উঠে যে আমাদের বিবাহসংস্কারের মধ্যে এই কি সম্পূর্ণ সত্য? সত্যকে পূর্ণভাবে পেতে হলে আমাদের কর্তব্য ও ভাবের সমস্ত ছয়ালগুলি খুলে তাকে ধ্যান করতে হবে, তা না হলে আমরা সত্যের সাফাং লাভ পাব না, আর যদিই বা পাই তবে হয় সে আংশিক সত্য কিম্বা সত্যের বিকৃতমূর্তি। মানুষের কর্তব্য ধারা অনেক; তার মধ্যে বিশিষ্ট ও প্রধান দুইটা মানুষের নিজের প্রতি কর্তব্য, যার উদ্দেশ্য আত্মচরিতার্থতা (Self-realisation) আর সমাজের প্রতি কর্তব্য—যার উদ্দেশ্য সমাজের কিম্বা মানবজাতির কল্যাণসাধন। কোন কার্যকে বিচার করতে হলে কিম্বা প্রকৃত কর্তব্য অবধারণ করতে হলে ব্যক্তি ও সমাজ এই দুই দিক হতে তাকে দেখতে হবে। উপরের উদ্ধৃত দুইটা বচনকে বিচারের এই মাপদণ্ডে পরীক্ষা করলেই তাদের দোষগুণ ধরতে পারা যাবে। বিবাহের মুখ্য উদ্দেশ্য প্রজাষ্টি, এ কথাটা-সমাজের কল্যাণের দিক হতে সত্য হলেও ব্যক্তির বিকাশের পক্ষে আত্মচরিতার্থতার পক্ষে এ সংস্কারটার উপযোগিতা কত সে খবর আমাদের না দেওয়াতে অন্ধক সত্য হয়ে দাঁড়িয়েছে। উপরের দুইটা বাক্যই সমাজতত্ত্ববিদের বাক্য। সমাজতত্ত্ব বা জীবিত্ত্ব আমাদের জীবনের সকল

ব্যাপারকেই সমাজের পক্ষ হতে বা জীবদেহের দিক হতে বিচার করে, তাই তাদের প্রচারিত কথা একটা পূর্ণ সত্যের মধ্যে আত্মসমর্পণ করে না কেবল Half truths হয়ে থাকে। সমাজতত্ত্ববিদ ভুলে যান যে, মানুষের পক্ষে সমাজের কল্যাণ-চিন্তার সঙ্গে আরও একটা চিন্তার বিষয় আছে যার কেন্দ্রে “আমিতে” সংস্থিত। জীবতত্ত্ববিদও ভুলে যান যে মানুষের দেহাতিরিক্ত একটা পদার্থ আছে যাকে বলে “মন”। অপর পক্ষে আর একদল লোক আছেন যারা “ব্যক্তিস্বাতন্ত্র্যের” (Individualism) পক্ষপাতী। তাঁরা ব্যক্তিকে সমাজ থেকে ভিন্ন করে দেখতে চেষ্টা করেন—ব্যক্তির ইচ্ছা ও অনিচ্ছা, আকাঙ্ক্ষা ও অনভিলাষ, ভালবাসা কিম্বা ঘৃণা, সুখ কিম্বা দুঃখ ব্যক্তির পক্ষে সমস্ত সত্য মনে করেন এবং সমাজের কল্যাণ-চিন্তা মনে স্থান দিয়ে ব্যক্তির গৌরবকে ক্ষুণ্ণ করতে চান না। এদের প্রচারিত সত্যও Half-truth.

এখন ব্যক্তি স্বাতন্ত্র্যের সম্বন্ধে কিছু বলব। ইউরোপে কিছু কাল পূর্বে হাতে ব্যক্তিস্বাতন্ত্র্যের যুগ চলেছে। এই ব্যক্তিস্বাতন্ত্র্যের প্রবল আত্মপ্রকাশ দেখতে পাওয়া গেছে দাম্পত্য বন্ধনের শিথিলতায়। এতদিন পর্যন্ত যে বিবাহ বন্ধন একটা নারী ও একটা পুরুষকে পরস্পর পরস্পরের সহচরভাবে একাগ্রতায় সমপ্রাণতায় সম্মিলিত করে কর্মক্ষেত্রে পাঠিয়ে দিত সেই বিবাহ-সংস্কারই আজকাল তাদের মধ্যে কর্তব্যের ও চিন্তার একমুখীনতার সৃষ্টি করতে পারছে না। ব্যক্তিস্বাতন্ত্র্যের প্রবল প্রাবনে জাতি ও সমাজের সঙ্গে—ব্যক্তির সম্বন্ধে মিলন-ক্ষেত্র আর চোখে পড়ছে না। বিবাহবন্ধনের দ্বারা নারী ও পুরুষের ব্যক্তিত্ব বিকাশের পথ অবরুদ্ধ হয় কি না, আর কি প্রকারে এই দাম্পত্য সম্বন্ধকে সমাজের মঙ্গলের জন্ত নিয়ন্ত্রিত করে আত্মচরিতার্থতা আদর্শের উপর সুপ্রতিষ্ঠিত করা যায়, এর যথার্থ অবধারণের জন্ত পাশ্চাত্য দেশে ধর্ম-মন্দিরে, রঙ্গমঞ্চে, মাসিক পত্রিকায়, উপস্থানে আলোচনার প্রবাহ চলেছে। আমাদের দেশেও নারী জাতির ব্যক্তিবোধের চিহ্ন আর নানাপ্রকার প্রচেষ্টার মধ্য দিয়ে সেই ব্যক্তিবোধের নিজেকে প্রতিষ্ঠিত করবার জন্ত একটা উত্তম ও আয়োজন আমরা চারিদিকে দেখতে পাচ্ছি। তবে কি না এই ভাবটা যতটা ব্যাপকরূপে ও শক্তির সঙ্গে ও-দেশে জেগে উঠেছে আমাদের দেশে ততটা হয় নাই। এখনও হয় নাই বলে যে কোনও দিন হবে না এমন ধারণা করাটা কিন্তু আমাদের ভুল হবে। এই যে ভারতবর্ষ এতদিন পর্যন্ত

চারিদিকে একটা সংস্কার ও আচারের প্রকার তুলে ভাবের স্বাতন্ত্র্য ও কর্মক্ষেত্রের বিশিষ্টতা রক্ষা করে এসেছিল সে প্রকার ত অনেক দিন হ'ল ভাঙতে আরম্ভ হয়েছে। এই কয়েক বছরের মধ্যেই পাশ্চাত্য চিন্তা ও কর্মের ঢেউ আমাদের জীবনের আদর্শের মূলে এত জোরে এসে আপত্তিত হয়েছে যে, আমরা কেহ কেহ এক নবযুগের আগমন আশায় আবাহন-গীতি-মুখর হয়ে উঠেছি। আবার কেহ কেহ সনাতন সমাজের উপর দক্ষযজ্ঞের পুনরভিনয় দেখবার ভয়ে শঙ্কিত হয়ে উঠেছি। এই স্বাতন্ত্র্যের প্রথম আত্মপ্রকাশের উৎকট প্রাবল্যে ও উত্তেজনায় আমাদের দেশেও যে দাম্পত্য-বন্ধন শিথিল হতে পারে এ আশঙ্কা বোধ হয় অত্যাঁয় ও অমূলক হবে না। এই আশঙ্কার জন্তই ব্যক্তির ব্যক্তি হিসাবে আত্মচরিতার্থতার আদর্শ ও সামাজিক জীবন হিসাবে সমাজের কল্যাণ-চিন্তার আদর্শ এই দুই আদর্শের সমঞ্জসভূত এক নতুন শাখত আদর্শের উপর দাম্পত্য-বন্ধনের প্রতিষ্ঠা করবার উদ্দেশ্যে আমরা প্রয়াসী হয়েছি।

পূর্বেই বলেছি ইউরোপে এ যুগটা ব্যক্তিস্বাতন্ত্র্যের যুগ। বর্তমান ইউরোপীয় সাহিত্যের মূল স্রষ্টা যে এই হবে এতে আশ্চর্য্য হবার কিছুই নাই। তাই আজকাল সমাজতত্ত্ববিদের সঙ্গে সাহিত্যিকের একটা বিবাদ উপস্থিত হয়েছে। এ বিবাদের মূলে উভয়েরই সত্যকে লাভ করবার পূর্ণ যথার্থ দৃষ্টির অভাব; কেহই পূর্ণ সত্যটির সঙ্গে পরিচয় স্থাপন করতে পারেন নাই, সত্যের একদিককার রূপ প্রত্যক্ষ করেছেন মাত্র। সাহিত্যের ভিতর দিয়ে ব্যক্তির সঙ্গে সমাজের সংঘাত-ফলে নারী ও পুরুষের সম্বন্ধের যে তত্ত্বগুলি পরিস্ফুট হয়েছে সে তত্ত্বগুলিই এখন দেখা যাক।

আজকাল আমাদের দেশী সাহিত্য সমালোচনাক্ষেত্রে ইবসেনের নাম প্রায়ই দেখতে পাওয়া যায়। এই নরওয়েদেশীয় বিখ্যাত নাট্যকার তার সুপ্রসিদ্ধ “A Doll's House” নামে নাটকে দাম্পত্যবন্ধনকে সাহিত্যের আলোচনার বিষয় করে তুলেছিলেন। তিনি প্রচার করলেন—“যে স্বামী স্ত্রীর কর্মজীবনের পরিধি প্রসারিত করার আকাঙ্ক্ষা ও ভাবজীবনের স্বাতন্ত্র্যাবলম্বন সহ করতে পারবেন না ও নানা প্রকারে তার আত্মপ্রকাশের চেষ্টা প্রতিহত করতে প্রয়াসী হবেন, সেই স্বামীকে পরিত্যাগ করবার অধিকার স্ত্রীতে জন্মিত আছে।”

ইবসেন স্ত্রীজাতির প্রতি অত্যধিক সহানুভূতিবশতঃ এ কথা বললে পর

তার প্রত্যুত্তর এসেছিল পুরুষজাতির পক্ষ হতে, Scandinaviaর খ্যাতনামা Strindberg এর নাটক হতে। “বিবাহবন্ধন পুরুষজাতির পক্ষে ক্ষতিকর। বিবাহের দ্বারা পুরুষের পুরুষোচিত গুণগুলির পূর্ণ বিকাশ সম্ভাবনা বিনষ্ট হয়। নারীজাতি তার স্বপ্নের জন্ত পুরুষকে আপনার দাসে রূপান্তরিত করে আর পুরুষ নারীর সন্তুষ্টির জন্ত নিজের আশা ও আকাঙ্ক্ষা বলি দিয়ে আত্মসঙ্কোচ করতে বাধ্য হয়।”

সুপ্রসিদ্ধ বার্নার্ড শ তাঁর Man and Superman নাটকে Strindberg এর মতেরই পোষকতা করেছেন। ইবসেনের পদাঙ্ক অনুসরণ করে সেই সময়ের অনেক নাট্যকার ও ঔপন্যাসিক বিবাহের সাফল্য ও বিফলতা মাপ করতে বসেছিলেন স্বামীস্ত্রীর মিলনজনিত স্বাধীনতার মানদণ্ডে।

Ibsen নারীর পক্ষেই বলুন আর Strindberg পুরুষের পক্ষেই বলুন তাদের শিক্ষার মূলে রয়েছে প্রচণ্ড স্বাতন্ত্র্যবোধ ও উৎকর্ষ স্বাধীনতা। সত্য দ্রষ্টার স্থির ও সৌম্যমূর্তি তাদের মধ্যে আমরা দেখতে পাই না, যা পাই সে শুধু স্বতন্ত্র উত্তেজনা বা বিদ্রোহের রূচি বল।

এই ব্যক্তিস্বাতন্ত্র্যের মত প্রচারে ইংলণ্ডসমাজে পুরুষ ও নারীর মধ্যে কি ভীষণ বিদ্রোহবহি জ্বলে উঠেছে যেমন ঘরে তেমনি বাইরে H. G. Wells এর Ann Veronica উপন্যাস খানায় তার একটা উজ্জ্বল চিত্র আমরা দেখতে পাই।

“সংসারে উন্নতি করবার নারীর একটা মাত্র পথ সে শুধু এই পুরুষ-জাতটাকে তুষ্ট করে। পুরুষরাও ভেবে বসে ‘আছেন জগতে যে নারীর সৃষ্টি হয়েছে সে শুধু তাদের স্বপ্নের জন্ত। মাতৃস্বই আমাদের সর্বনাশের মূল।”

উপন্যাস খানা সম্পূর্ণ নারী ও পুরুষের প্রবল দ্বন্দ্বের কথায় পরিপূর্ণ। নারীর বিদ্রোহ-ধ্বনিতে অত্যাচারের বিরুদ্ধে তীব্র প্রতিবাদ-বাক্যে মুগ্ধিত। বর্তমান পাশ্চাত্য সাহিত্য স্বাধীনতা-প্রিয়ানী মানবের অন্তর্গত বেদনার অপার চিত্তবিক্ষোভের চিত্র, জ্ঞানের গভীর আলোকপাতে সে চিত্র, চিরকালের সম্পদ হয়ে উঠে নাই। জীবনের ধ্রুবসত্যের দিকে চোখ রেখে এঁরা চলেন নাই তাই জীবনের বৈষম্য-বিরোধগুলি নিয়েই এদের কারবার চালাতে হয়েছে। “খৃষ্টি টলষ্টয়” এর সঙ্গে তুলনা করলেই একথাগুলি অনেকটা পরিষ্কার বোঝা যাবে।

উনবিংশ শতাব্দীর শেষার্ধ্বে রুশজাতীয় জীবনের পক্ষে এক নতুন প্রভাত

এক নতুন চিন্তার জাগরণের অকণিগায়, পুরাতন প্রথা ও শাস্ত্রীয় অহুশাসনের বিরুদ্ধে বিদ্রোহের উন্নত চীৎকার-ধ্বনির মধ্যে জাতির নবজীবন লাভ ব্যক্ত হয়েছিল। Herzen, Ogaryof প্রভৃতি এই বিদ্রোহ উৎসবের পুরোহিত হয়ে অজ্ঞানতা ও সমাজের একাধিপত্যের বিরুদ্ধে আন্দোলন আরম্ভ করলেন। প্রথমেই পুরাতন আদর্শ ও ভাবকে তাঁরা ভ্রমাত্মক ও কুসংস্কারজাত বলে ঘোষণা করলেন। অত্যাচার সংস্কারগুলির সঙ্গে সঙ্গে বিবাহসংস্কার সম্বন্ধেও সন্দেহ এসে উপস্থিত হল। ফ্রান্সে George Sand এর প্রথম বয়সে লিখিত উপন্যাসগুলির মত নারীপুরুষের যৌন-সম্বন্ধ নিয়ে রুস সাহিত্যে অনেক উপন্যাস লেখা চলতে লাগল। বিপ্লববাদীরা সিদ্ধান্ত করলেন যে, চারিদিকে এই যে পুঞ্জীয়মান অত্যাচার ও অত্যাচার সমাজের প্রথার দোহাই দিয়ে সংঘটিত হচ্ছে, একে দূর করতে হলে আরও বেশী রকম ব্যক্তিস্বাতন্ত্র্য-বোধের বিকাশ একান্ত আবশ্যিক। এই ভাব থেকেই তখন দেশে স্ত্রীজাতির স্বাধীনতা পুরুষ ও নারীর কি সামাজিক কি রাষ্ট্রীয় সকল ব্যাপারেই সমান অধিকার ও যৌন-সম্মিলনের কতকটা অবাধ গতি প্রচারিত হতে আরম্ভ হল। অত্যাচার সকল দেশের মত এই যৌন সম্বন্ধ নির্ধারণের আর্ন্তে পড়ে রুসের অনেক মঙ্গলময় প্রচেষ্টা বিফল হয়ে গিয়েছিল। যৌন ব্যাপারে যে স্বাধীনতা এই নব্যস্ত্রীরা দাবী করছিলেন, সে স্বাধীনতাকে কোন্ পথে পরিচালিত করতে হবে, ব্যবহারিক জীবনে তাকে কি ভাবে প্রায় দেওয়া যায় সে তাঁরা নির্ণয় করতে পারছিলেন না। Tolstoi তখন দর্শকভাবে ব্যাপারটা দেখছিলেন আর এই স্বাধীনতা যে ক্রমশঃই উচ্ছিন্নতায় পরিণত হবে এ তিনি ঠিকই বুঝেছিলেন। মানব জাতির মঙ্গলকামী ঋষি প্রচার করলেন “যে দিন আমাদের আধ্যাত্মিক ও নৈতিক প্রকৃতি পশুধর্মটাকে দূর করে দিতে পারবে, সে দিনই আমাদের ষথার্থ-স্বাধীনতা লাভ হবে। প্রত্যেক মানুষকেই ভাল করে বুঝতে হবে তার জীবনে কর্ম ও চিন্তার পূর্ণ পবিত্রতা লাভ করবার পথ কোথায়—দাম্পত্য জীবনে না কৌমার্য ব্রতে? বিবাহিত কি অবিবাহিত সকল জীবনেরই পরিণতি পূর্ণ পবিত্রতার আদর্শটাকে লাভ করা (The ideal of perfect purity)।

অনেকেই বলে থাকেন যে টলষ্টয় বিবাহ সংস্কারের বিরোধী ছিলেন আর তাঁর শিক্ষা অনুসরণ করলে জাতিশীল্যই ধ্বংসের মুখে অগ্রসর হবে। একথা সম্পূর্ণ ভুল। ১৮৮৫ খৃঃ What then we must do নামে তাঁর যে বইখানা

প্রকাশিত হয় তার শেষভাগে তিনি নারীজাতির নিকট এই আবেদন জানান যে তাঁরা যেন সন্তান প্রসার ও সন্তান পালনের কষ্ট সহ করতে ভীত না হন। ১৯০ খৃঃ প্রকাশিত Kreutzer Sonata নামে উপন্যাস খানিতে তাঁর প্রভূত অভিজ্ঞতা ও সাধনার ফল পবিত্রতার সুমহান আদর্শ পবিত্র চিন্তা ও পবিত্র কর্মের মধ্যে আত্মসমর্পণ লোক সমাজে উপস্থিত করেন। কোমার্ধ্য ব্রতই সকল লোকের অবলম্বনীয় এমন কথা তিনি বলেন নাই, কোমার্ধ্য জীবন যাপন জীবনের আদর্শ নয়, আদর্শ প্রাপ্তির একটা পথ মাত্র। প্রাপ্তিটাই সত্য, উপায় চিরকালই উপায়, সত্যকে ছেড়ে সত্যপ্রাপ্তির একটা উপায়কে ষথার্থ বলে আঁকড়িয়ে ধরবার জগতই মধ্যযুগে (mediaval period) রোমান ক্যাথলিক ধর্ম যাজকেরা এতটা অধঃপতিত হয়েছিল ; মঠের সন্ন্যাসী ও সন্ন্যাসিনীদের ব্যভিচারজাত সহস্র সহস্র শিশুর অস্থিতে মঠ কণ্টকিত হয়েছিল টলষ্টয় এ সমস্তই অবগত ছিলেন। তিনি জানতেন যে পবিত্র কোমার্ধ্য জীবন যাপন খুব কম লোকেরই সাধ্যায়ত্ত, বিবাহ সংস্কারের পথ ধরেই সাধারণ লোককে পবিত্রতার আদর্শটা লাভ করবার জগত চেষ্টা করতে হবে। মাহুষের পক্ষে এ পূর্ণ পবিত্রতার আদর্শ উপনীত হওয়া সম্ভব নয় জেনেও যে এই আদর্শটা তিনি সমাজের সামনে দাঁড় করিয়েছিলেন তার কারণ তিনি বিশ্বাস করতেন যে আদর্শ এমন একটা সত্য হবে যেটা দেশ ও কাল-ধর্মের অতীত, যেটা সময়ের কুহেলিজালে উজ্জলতা না হারিয়ে ধ্রুবতারার মত মাহুষকে গন্তব্যের পথে ইঙ্গিত করবে।

টলষ্টয়ের এ উপদেশটি ব্যক্তির কল্যাণ কামনায় উচ্চারিত হলেও সমাজের মূল প্রতিষ্ঠার সঙ্গে এর কোনই বিরোধ নাই। স্থির, শাস্ত, গভীর অন্তর্দৃষ্টির বলে তিনি জীবনের মধ্যে একটা মহান আদর্শ ধরতে পেরেছেন জীবনকে একটা প্রকাণ্ড নৈতিক ক্ষেত্রের উপর সংস্থাপিত করেছেন। এই খানেই টলষ্টয়ের সাহিত্য সাধনার সার্থকতা। এই খানেই টলষ্টয় সত্যদ্রষ্টা।

এই জগতে যারা সত্যদ্রষ্টা বলে বরণীয় হয়েছেন যাদের শিক্ষা বিশ্বমানবের কল্যাণকল্পে উচ্চারিত হয়েছে তারা সকলেই জীবনকে এক বিশাল সত্যের ভিত্তির উপর প্রতিষ্ঠিত করেছেন। জীবনের সকল ব্যাপারই তাঁরা সত্যের আলোকে দেখতে চেষ্টা করতেন। তাঁরা সাধনার ফলেই হউক কিম্বা ঐশ্বরিক ক্ষমতার বলেই হউক সত্যের ষথার্থ স্বরূপ অল্পভব করবার একটা বিশিষ্ট শক্তি সম্পদে ধনী ছিলেন, একে ইংরাজীতে Idealism ও বাংলায় “অধ্যাত্ম দৃষ্টি” বলা যায়। এই অধ্যাত্ম দৃষ্টি না থাকলে পর সত্যাহুসঙ্কিশ্বর সত্যলাভ হয়

না, শিল্পীর চেষ্টা চরম সাফল্যে স্বন্দর ও সার্থক হয় না সাহিত্যিকের সৃষ্টি বস্তু-হীন ছায়ার কিম্বা প্রাণহীন দেহে পর্যাবসিত হয়।

বিবাহসংস্কারকে এই Idealism এর আলোকে বা অধ্যাত্ম দৃষ্টির সাহায্যে দেখতে হবে তবেই আমরা এর অন্তর্নিহিত সত্যের সাক্ষাৎ পাব। যারা বলেছেন যে বিবাহের সার্থকতা মাপতে হবে স্বামী স্ত্রীর মিলন জাত স্বখানুভূতির তুলানুভূতি তাদের এই অধ্যাত্ম দৃষ্টি ছিল না। তাঁরা প্রথমেই যেটা পেয়েছিলেন সেটাকেই চরম বলে মেনে নিয়েছেন তাকে ছাড়িয়ে অতিক্রম করে মন্বার শক্তি তাঁদের হয় না তাই তাঁদের এই আদর্শচ্যুতি। এই কার্যে আমি সুখ পাই অতএব এ আমার করণীয়, এই কক্ষে আমার দুঃখ অতএব ত্যাগ্য, এ হল পণ্ডর Philosophy আর পণ্ডর ethics, আর মাহুষের হলেও সে অতি আদিম যুগের, যখন মানব আর পণ্ডতে বেশী তফাৎ ছিল না, যখন সুখ-লালসাই মানবের সকল কার্যের প্রবর্তক ছিল। সভ্যতার বুদ্ধির সঙ্গে সঙ্গে মাহুষের একটা নূতন জ্ঞানের উদ্ভব হল যেটা আমাদের কর্তব্য বোধ। এই নূতন জ্ঞানটা মাহুষের নৈতিক ও আধ্যাত্মিক উন্নতির ইতিহাসে এক প্রকাণ্ড আবিষ্কার। স্বখবোধের সঙ্গে এর তফাৎ এই সুখ সম্পূর্ণ “ব্যক্তিগত” বর্তমান ও অস্থায়ী কিন্তু কর্তব্য বোধের ইতিহাসটা অনেক বড়-এটা ব্যক্তিগত হয়েও সমষ্টির, বর্তমান হলেও অতীতের সঙ্গে সংবন্ধ, ও ভবিষ্যতে দৃষ্টি-প্রসারী, অস্থায়ী হলেও চিরন্তনের ধারী। দাম্পত্যবন্ধনকে এই কর্তব্য বোধের ভূমির উপর গড়ে তোলা যায় বটে কিন্তু তাতে করেও—হৃদয়ের ও মস্তিষ্কের চিরকালের বিরোধের শান্তি হবে না এই ভয়। আমাদের আরও অগ্রসর হতে হবে, সুখ হতে এই যে কর্তব্যে এসে উপস্থিত হয়েছি—এইটাই আমাদের খুব বড় লাভ—তবুও এখানে থামলে চলবে না। জীবনের সকল কাজেই সুখ ও দুঃখ জড়িত আছে—এ থাকবেই যতদিন আমাদের অহংজ্ঞান থাকবে (Ego) কিন্তু থাকলেও এ আমাদের Immediate নয়, গৌণ।

বিবাহসংস্কারটাকে Idealism এর আলোকপাতে দেখতে হবে। আমাদের সৌভাগ্যবশতঃ বর্তমান যুগের একজন শক্তিমতী নারী Eugenist Allen Key তার ব্যবহারিক জ্ঞান ও অধ্যাত্মদৃষ্টির মিলনে একটা প্রকাণ্ড সত্যের উপর দাম্পত্যবন্ধনকে স্থাপন করতে পেরেছেন। ১৯১১ সালে ডাক্তার হ্যাভেলক ইলিস্ লিখিত একটা অবতরণিকা যুক্ত হয়ে এর “Love and marriage” নামে গ্রন্থখানি ইংরাজীভাষায় প্রকাশিত হয়।

এই “প্রেম ও পরিণয়” পুস্তকখানায় Allen Key প্রচার করলেন। প্রেমই যৌনসম্বন্ধের নৈতিক ভিত্তি, অতএব বিবাহসংস্কারের মূল্যের কথা। আমরা পূর্বেই বলেছি শুধু কর্তব্যজ্ঞানের উপর দাম্পত্যবন্ধনকে প্রতিষ্ঠিত করলে মাহুষের হৃদয়টাকে অবহেলা করা হয়। Allen Key প্রেমকেই পরিণয়ের মূলভিত্তি নির্দেশ করলেও এই প্রেমের মধ্যেই তিনি কর্তব্যবোধেরও ইঙ্গিত করেছেন। কর্তব্যজ্ঞানই তার প্রেমের ভিতর সহজ হয়ে ধরা দিয়েছে। তাই তাঁর প্রেমের ধর্মকে আমরা প্রেম ও কর্তব্য এই দুইএর সম্মিলনক্ষেত্র বলতে পারি। এই প্রেমের ধর্মকে তিনি নাম দিয়েছেন Religion of life। এই ধর্মাচরণে সমাজের মঙ্গল ও ব্যক্তির আত্মচরিতার্থতা এই দুই আদর্শের সামঞ্জস্যস্থাপন সম্ভব হয়। বিবাহসংস্কার দ্বারা মানবজীবনকে পবিত্র স্তম্ভ, মহৎ ও সুখী করেই প্রেমের সার্থকতালাভ হবে আর বিশ্বমানবের হিতের জ্ঞান সমাজের কল্যাণের জ্ঞান সন্তানজনন পালন ও শিক্ষাপ্রদান প্রভৃতি কার্যের মধ্যে কর্তব্যবোধ বিকশিত হয়ে উঠবে। Allen Keyর প্রেম কেবল যৌন সম্মিলনের আকাঙ্ক্ষা নয়; এ হল “Complete expression of the Community between two Personalities চারুচন্দ্র বন্দ্যোপাধ্যায় মহাশয়ের ভাষায় (প্রবাসী আশাচ, মহিলামজলিস) “দুই ব্যক্তির সম্পূর্ণ স্তম্ভসম পরিপূরক সম্মিলন।” এই প্রেমের দুইটি দিক আছে psychological (মনের দিক) ও physiological (দৈহিক); একেবারে ইন্দ্রিয় সম্বন্ধে বিরহিত বিশিষ্ট মনোবৃত্তি (Plaic) নয়—কিন্তু কেবল ইন্দ্রিয়সম্বন্ধে সম্পৃষ্ট (Sensual) নয়—এ এমন একটা ভাব যেখানে George Sand এর কথায়, neither the Soul betrays the sense nor the senses the soul, “ইন্দ্রিয়ের দ্বারা আত্মা প্রতারণিত হয় না বা আত্মার দ্বারা ইন্দ্রিয়ও বঞ্চিত হয় না।” (চারুচন্দ্র অহুবাদ) তবেই দেখতে পাচ্ছি যে Allenkeyর এই প্রেম কেবলমাত্র একটা বিশুদ্ধ মনোবৃত্তি নয়, এই মনোবৃত্তির আংশিকলীলা যা কতকগুলি কার্যের মধ্যে পরিফুট হয় সে গুলিও এর অন্তর্গত। এর সঙ্গে আরও একটা ভাব আছে যাকে বিপিনবাবু বলেছেন “আদি রস” (নারায়ণ, আশাচ, ১৩২৪)—যে রসের বশে ভালবাসার ধর্ম “আত্মদান, আত্মসাৎ, আত্মবিস্তৃতি ও আত্মবিস্তৃতি” প্রভৃতি একাত্মতালাভের প্রয়াস যৌনসম্বন্ধে ও প্রজ্ঞাসৃষ্টিতে কথঞ্চিৎ সার্থকতা লাভ করে। তবেই প্রেমের জিহবারায়—আনন্দলাভের প্রয়াসে যৌনলীলায় সন্তানজননে, কর্তব্যের ধর্মে তার পালন ও শিক্ষাদান

প্রভৃতি কর্তব্য আর ভালবাসার (Allen Keyর প্রেম হতে স্বতন্ত্র করে বোঝাবার জন্য)। আত্মজীবনে সত্য ও স্তম্ভের সম্মিলন সাধনে, একটা মানবের ভাব ও কর্মজীবনের পূর্ণপরিণতি, আত্মচরিতার্থতা ও সমাজের কল্যাণ সম্পাদন এই দুই আদর্শের বিকাশ সংঘটিত হয়।

এলেন কীর বিবাহসংস্কারের এই প্রেমের আদর্শ বাস্তবিকই ঐ সংস্কার সম্বন্ধে যথার্থ আদর্শ—আর এ যে একটা বিশাল অধ্যাত্মদৃষ্টি ও নৈতিকজ্ঞানের ফল সে বিষয়ে কোনই সন্দেহ নাই। এই প্রেমধর্মের উপর বিবাহসংস্কারকে প্রতিষ্ঠিত করবার যে একটা প্রকাণ্ড সার্থকতা আছে নিশ্চয়ই চিন্তার দিক হতে, সেইটা আমরা বিশেষ করে উপলব্ধি করব,—যখন কিনা এই তত্ত্বের সঙ্গে বর্তমান যুগের একজন প্রধান চিন্তাবীর Henri Bergsonর Creative Evolution তত্ত্বটির স্তম্ভসম্বন্ধে অল্পধাবন করতে পারব। বর্তমান বিংশ শতাব্দীর অভিব্যক্তিবাদ Darwin এর প্রাকৃতিক নির্বাচন হতে Bergsonএর চেতনার অন্তর্নিহিত স্বতঃপ্রসারিত শক্তির লীলা পর্যন্ত সমগ্র তত্ত্বটি প্রকাশ করবার স্থান এ নয়, কেননা এত বড় একটা চিন্তার প্রবাহ অল্পসময়ে ও অল্পকথায় একেবারেই অসম্ভব। তবে প্রাণের সঙ্গে মনের অথবা চেতনার একত্বকে প্রতিপন্ন সত্য বলে গ্রহণ করে আমরা প্রাণজগতে জীবের ক্রমিক বিকাশের পর্যায়ের সঙ্গে মনোজগতে চেতনার বিকাশধারাকে এক অঞ্চল করে দেখে অভিব্যক্তিবাদে প্রেমের যথার্থস্থান অবধারণ করব মনে করেছি।

Darwinএর অভিব্যক্তিবাদ কেবল মাত্র জীবনের ক্রমিক অভিব্যক্তির উপর প্রতিষ্ঠিত। মনের ক্রমিক পরিণতির ধারাটা তিনি স্বীয় তত্ত্বদ্বারা পরিষ্কার ব্যাখ্যা করতে পারেন নাই—এ হিসাবে উনবিংশ শতাব্দীর অভিব্যক্তিবাদ অসম্পূর্ণ। তাঁর মতামতের আদিম amoeba হতে বর্তমান মানবদেহ পর্যন্ত সমস্তই এক উপদানে গঠিত। একই জীবকোষ (Germ cell) সকলের মধ্যেই বিদ্যমান। মনের (Mind) উৎপত্তি নির্ণয় করতে এসে Darwin বললেন যে, প্রাকৃতিক নির্বাচন ধর্মদ্বারা পরিচালিত হয়ে জীবকোষের নিয়ত অসংখ্য ভাবে নানারূপে প্রকাশ ফলে (Chance Variations) মস্তিষ্কের সৃষ্টি আর সঙ্গে সঙ্গে মন অথবা চেতনার উদ্ভব সম্ভাবিত হয়েছে। এই মত সম্বন্ধে আমাদের প্রথম আপত্তি এই যে, যেখানে প্রাণ আছে, সেখানেই কোন না কোন রূপে মনের ক্রিয়া পরিণক্ষিত হয়, চেতনা অভিব্যক্তির স্তর নির্বিঃশেষ সকল জীবকোষের মধ্যেই কিছু সঞ্চারিত হয়েছে। দ্বিতীয়তঃ—

জীবকোষের নানারূপে আপনাকে প্রকাশ পরম্পরা স্বীকার করে এই ঘটনাকে মস্তিষ্ক ও মনের উৎপত্তির বিশিষ্ট কারণ ধরলে মানুষের ইতিহাস একেবারে একটা "Chapter of accidents" হয়ে পড়ে।

Bergson প্রচার করলেন যে, অভিব্যক্তিবাদ জীবন ও মন এই দুই ক্ষেত্রেই সমানভাবে প্রযোজ্য। এ বিশ্বে জীবন ও চেতনা একই তত্ত্ব। এই চেতনাই ক্রমাগত নিজেকে অতিক্রম করে উচ্চতর অবস্থা প্রাপ্তির জন্ত ব্যগ্র। চেতনার সেই অন্তর্নিহিত শক্তিই Bergsonর Elan Vital ও কবি Shelleyর "The one Spirit's plastic stress" (Adonais) জীবকোষকে নানারূপ পর্যায়ে মধ্য দিয়ে মানবদেহ ও মানব মনে বহন করে এনেছে। সৃষ্টির প্রেরণার মূলেই চেতনা অথবা মন, জীবকোষ উপকরণ মাত্র। চেতনাক্রমবিকাশের ধারা তিনটা "Vegetable torpor (জড়স্বভাব) Instinct (সংস্কার) আর Intelligence (বুদ্ধি)। এই চেতনাই নিজের ধর্মারূপে ভিন্ন ভিন্ন ক্ষেত্রে বিভিন্নরূপে প্রকাশিত হয়ে অবশেষে মানব মনে Intelligence রূপে বিকসিত হয়ে উঠেছে।

এখন প্রেমের বিকাশ-তত্ত্ব। বর্তমান কালের একদল দার্শনিক নীটসে ও তাঁর শিষ্যবর্গ প্রেম ও অগ্রাচ্ছ কোমল মনোবৃত্তিগুলিকে দৌর্ভাগ্য আর অবনতির কারণ বলে নির্দেশ করেছেন। নীটসে Darwin এর শিষ্য Darwin এর Natural selection তত্ত্বটির একটা দিক মাত্র উপলব্ধি করে তিনি যে এক ভুল সিদ্ধান্তে এসে উপনীত হয়েছিলেন সে বিষয়ে কোনই সন্দেহ নাই। প্রকৃতির যৌনলীলার মাধুর্য ও প্রজ্ঞারক্ষার জগদ্ধাত্রী মূর্তি তিনি একেবারেই প্রত্যক্ষ করেন নাই, তাঁর চোখে পড়েছিল শুধু প্রকৃতির ধ্বংসকারিণী শক্তি ("Nature red in tooth, and claw") আর সেই শক্তির অনন্ত বিনাশলীলা। যে Natural selection-এর তত্ত্বের জোরে নীটসে জগৎ থেকে সর্কল রূপ ও সর্কল মধুরতা লোপ করে দিয়ে এক ভীষণ হিংসা কামক্রোধ প্রভৃতির কুংসিততাকে প্রতিষ্ঠা করতে চেয়েছিলেন, ঠিক সেই তত্ত্বকেই অবলম্বন করে জীবতত্ত্বের (Biology) সাহায্যে আমরা বিশ্বময় সৃষ্টি ও স্থিতি ব্যাপারে এক বিশাল নীতি ("organic morality") ও প্রেমের অনির্কচনীয় লীলা প্রত্যক্ষ করব।

জীব জগতের প্রজনন ও জীব-শিশু রক্ষণ ব্যাপারটা একটু মনের সঙ্গে দেখলে পরেই আমরা জানতে পারি যে বুদ্ধির ক্রমবিকাশের ধারা বেয়ে বেয়ে

জীব যতই স্তর হতে উচ্চ স্তরান্তরে উন্নীত হচ্ছে ততই জীবশিশুর আপনা হতে আত্মরক্ষা করবার ক্ষমতাটা কমে যায়; এই ভাবেই মানবশিশুর নিজেকে রক্ষা করবার জন্ত অক্ষমতা যত অধিক ও দীর্ঘকাল ব্যাপী এমন আর কোন জীবশিশুতেই লক্ষিত হয় না। প্রকৃতির রাজ্যে এই যে স্তর ভেদে জীব-শিশুদের রক্ষার জন্ত একটা সুন্দর সুবিহিত ব্যবস্থা আছে, এই দেখেই সেখানে "organic morality" জৈবিক নীতি নামে একটা শক্তির ক্রিয়া স্বীকার ভিন্ন গত্যন্তর থাকে না। অসহায় মানব শিশু যে রক্ষা পায়, তার নিশ্চয়ই একটা "Survival value" আছে। পিতৃমাতৃস্নেহ ভালবাসা ও যত্ন এই গুলিই শিশুকে জীবনযুদ্ধে জয়ী হতে সহায়তা করে থাকে। এই প্রেমই মানবশিশুর Survival value। এ ভাবে জীবকোষের বুদ্ধি বৃত্তির বিকাশ স্তরের সঙ্গে প্রাণী জগতে প্রেম বিকাশের স্তরটাও সমান পদক্ষেপে চলেছে।

জীবিত থাকাই জীবনের ধর্ম—এর চেতনার—সৃজনীশক্তির প্রেরণায় জীবন ক্রমশঃই এক অবস্থা হতে অবস্থান্তরে উন্নত হবার প্রয়াসী। জীবনের এই গতি ও সৃষ্টির মূলে যে প্রেরণা আছে, তার থেকেই প্রেমের উৎপত্তি। অভিব্যক্তিবাদে প্রেমের স্থান কোথায়—নীচের কয়েকটা কথায় তা বুঝতে পারা যাবে "No love, no intellect; No morals, no man" ইতিপূর্বে এই প্রবন্ধের এক জায়গায় কবি Shelleyর নাম করেছি। একজন বিখ্যাত ইংরাজ দার্শনিক বলেছেন যে শেলী গভীর অন্তর্দৃষ্টির বলে Bergsonএর অভিব্যক্তিবাদের (Creative Evolution) তত্ত্বটা পূর্বেই উপলব্ধি করেছিলেন। বিখ্যাত Adonais কাব্যের কবি গিয়েছেন:—

"The one Spirit's plastic stress sweeps through the dull, dense world, compelling there.

All new successions to the forms they wear." Bergsonএর Elan Vital বা চেতনার সৃষ্টি করবার প্রেরণা ও Shelleyর Plastic stress একই শক্তি; Bergson যেমন চেতনার এই প্রেরণাকেই সৃষ্টির মূলীভূত কারণ বলেছেন, তেমনি Shelley এই plastic stressকেই রূপপর্যায়ের প্রেরক-শক্তি বলে নির্দেশ করেছেন। এ ভাবে রবীন্দ্রনাথের বিশ্বাত্মত্বভূতিতে বা "জীবন দেবতায়" যেমন Darwin প্রভৃতি অভিব্যক্তিবাদীর তত্ত্বগুলি নানাভাবে আলো ছায়াপাতে ইসারা ও ইঙ্গিতে সুন্দর হয়ে প্রকাশ পেয়েছে তেমনি Bergsonর তত্ত্বটাও Shelleyর উপরের উদ্ধৃত লাইন কয়টিতে কবির ভাষায় ব্যক্ত হয়েছে।

শেলী প্রেমের কবি। বিশ্বের অন্তঃস্তলে য প্রেমরাশি সদা সঞ্চিত আর নানানরূপে শব্দ স্পর্শ প্রভৃতির ইন্দ্রিয় গ্রাহ্যের মধ্য দিয়ে যে প্রেম স্বতঃই নিত্য উৎসারিত, সেই প্রেম তাহার কাব্যে রসহৃদয়প্রতিভাত হয়েছে। শেলীর The one spirit হ'ল প্রেম ধর্ম। আর আমরা পূর্বেই বলেছি অভিব্যক্তিবাদের প্রেম Elan Vital এরই বিকাশ। মানবস্তরে এসে এই চেতনার সৃষ্টি করবার প্রেরণাশক্তি Elan Vital প্রজ্ঞাসৃষ্টি ব্যাপারে দাম্পত্যে প্রমে ও রক্ষণকার্যে পিতৃমাতৃ স্নেহে অভিব্যক্ত হয়েছে। Bergsonর নিম্নলিখিত কথাগুলি হতে উপরের তত্ত্বটির একটা ইঙ্গিত যেন আমরা পেতে পারি বলে মনে হয়।

“At times, however, in a fleeting vision the invisible breath that bears them (the things or individuals) is materialised before our eyes. We have this sudden illumination before certain forms of maternal love so striking and in most animals so touching, observable in the solicitude of the plant for the seed. This love, in which some have seen the mystery of life may possibly deliver us life's secret.”

বিংশ শতাব্দীর একটা প্রকাণ্ড গৌরবের জিনিষ এই অভিব্যক্তিবাদ Bergsonর Creative Evolution। এই তত্ত্বের সঙ্গে আমাদের বিবাহ সংস্কারের প্রেমের আদর্শ তত্ত্বটির সঙ্গতি কি প্রকারে দেখান যেতে পারে তার একটা চিন্তার সূত্র আমরা এখন খুঁজে পেয়েছি বোধ হয়। এখন নরনারীর সম্মুখে একটা মহান আদর্শ স্থাপন করে সমাজ ও ব্যক্তিকে “সত্যম্ শিবম্ সুন্দরম্” উপলব্ধি করবার প্রকৃত সহায়তা করেছেন যে এই মহীয়সী নারী (Allen Key) তাঁকে আমাদের ভক্তি ও শ্রদ্ধা নিবেদন করে এই সৌজাত্য বিজ্ঞা সম্বন্ধে আমার প্রথম প্রবন্ধ শেষ করলাম।

মুক্তি-গাথা

[শ্রীশুরেশচন্দ্র চক্রবর্তী]

কোটি বন্ধনের মাঝে খেলায়ে চাতুরী,
ওগো চিরশিশু, তুমি খেল লুকোচুরী
এ ভুবনে নিশিদিন; ফেলি যবনিকা
তারি পরে কাটি মিথ্যা বন্ধনের লিখা
আমারে ছলিতে চাও; করি মোক্ষকামী
করিবারে চাও দূর মোরে অন্তর্ধামী
তোমার সান্নিধ্য হ'তে; তুমি নিশিদিন
ষেথায় খেলিছ স্বপ্নে বিরামবিহীন
মাখি ধূলিরাশি দেহে, বিক্ষুব্ধ ব্যথায়
স্বপ্নে ত্রুখে আনন্দেতে আমিও সেথায়
খেলিবারে চাই প্রভু—তব সৃষ্টিমাঝে
মোর আশেপাশে মোর ক্ষুদ্রতম কাজে
লক্ষ স্থানে তুমি যেগো আছ ধরা দিয়া
সে কথা কেমনে আমি যাব পাশরিয়া!

২

তোমার অজ্ঞাতে আমি করিনি কিছু
তাই যেন মনে রয়; মরীচিকা পিছু
ছুটিয়াছি সে ত প্রভু, তোমারি ইঙ্গিতে।
সকলি ভরেছ তুমি তোমারি সঙ্গীতে,
তাইত বুঝেছি কিছু শ্রেয় প্রেম নাই
এ নিখিল বিশ্বে মোর; যেই দিকে চাই
তোমার ভঙ্গিমাখানি এমনি ছুঁবার
হুট উঠে ধীরে ধীরে নয়নে আমার
সব অন্তরালে; তাই বিজনে নির্জনে
পাতিনি আসন তব; সব সৃষ্টি সনে

তোমাতে সহস্র করি সহস্র মুরতি
জীবন-মন্দিরে মোর চাহিছ আরতি
তোমার সে রূপ হতে বঞ্চিত আমায়
নাহি সাধ, তাই আমি আছি এ ধরায় ।

বন্ধনের মাঝে কত বন্ধ নহি অ মি
সেই শিক্ষা যেন মোরে দিও অন্তর্যামী
জন্ম হতে জন্মান্তরে, তব বিশ্বমেলা
যেন মোর জীবনেতে তুলি চিরখেলা
রাখে মোরে চিরশিশু করি ; বিশ্বমাঝে
সকলি তোমার, গুপ্ত রহি সব কাজে
ফুটায় রেখেছ এই বিশ্বের কমল
তাই এ ভুবনে সব হরষ বিহ্বল ।
আমি ত চাহিনা মোর আঁধিছুটি মুদি'
ইন্দ্রিয়ের অন্তরের বাতায়ন কপি
বিশ্বের অন্দলোক এই চাকিয়া আঁধারে
মিথ্যার মাঝার দিয়া লভিতে তোমাতে ;—
সত্যময় প্রভু তুমি তব এ ভুবন
তারি রূপ ধরি করে গৌরব স্বজন ।

৪

তোমাতে দেখেছি কবে কোন তরুতলে,
কোন শ্রোতস্বিনী তীরে কৌমুদীর গায়,
প্রাবৃত্ত পরশ তৃপ্ত মঞ্জু তৃণদলে
সিন্দুর তরঙ্গমাঝে দক্ষিণের বায় ।
তোমাতে পেয়েছি মোর ছুখ অশ্রুজালে
তোমাতে ছুঁয়েছে মোর স্থখাঘিত গান,
তোমাতে হেরেছি আমি উষার আড়ালে,
আবার সন্ধ্যার মাঝে রক্তিম বয়ান ।
তুমি উঠেছিলে হাসি যবে এ ধরায়
আমি এসেছিছ নামি ; রয়েছ গোপন

আমার মরণ মাঝে ; উষায় সন্ধ্যায়
প্রতি পল হেরিতেছি তোমার স্বপন ।
আমার কামনা মাঝে তব তৃপ্তি জাগে,
আমি ভালবাসি ধরা তব অনুরাগে ।

চিঠির গুচ্ছ ।

[শ্রীশচীন্দ্রনাথ সেনগুপ্ত]

(শেষ দফা)

(১)

(ইংরাজী চিঠির অনুবাদ)

প্রিয়তমে এভি,

তপ্তখোলা হতে লাফিয়ে একেবারে অলস্ত চুল্লীর মাঝে এসে পড়েছি, এভি !
ভালোত কিছুই লাগেনা ।* তুমি ভাবচ, বড়ই অদ্ভুত এ কথা—একেবারে
অশ্রুতপূর্ক। তা'হবে । আমিও কখনো শুনিনি । স্বামীর সঙ্গ নারীকে
সুখ দিতে পারেনা...আর এমন যে স্বামী ! কিন্তু সতাই বলছি ভাই, আমার
এখানে আর একটি দিনও থাকতে ইচ্ছে করে না । যতদিন দিদি তাঁর ছেলে-
মেয়েদের নিয়ে এখানে ছিলেন, ততদিন বেশ আরামেই কেটেচে । দিনগুলো
কেমন করে, কোথা দিয়ে চলে গিয়ে যে ছটো মাস অভীতের কোলে মিলিয়ে
দিয়ে গেল, তা' টেরও পেলুম না । দশদিন হল তাঁরা চলে গিয়েছেন, এ
বাড়ীর সকল আনন্দ, সমস্ত আকর্ষণ একেবারে নষ্ট করে ।

উঃ এই কৰ্মবিহীন দিনগুলোর কি বুকজাতা বোঝা ! কিছুতেই তা
ঠেলে ফেলা যায় না । একেবারে শ্বাসরোধ করবার উপক্রম করেচে । কলকাতায়
থাকতে যে সব কাজের অভিযোগ করেচি, এখন সেই সব কাজ করতে পেলোই
যেন বেঁচে যাই ।

স্বামীর খেয়ে উঠে কলেজে বেরিয়ে যান । বারান্দার উপর যতক্ষণ দেখা
যায়, তাঁর দিকে চেয়ে থাকি—তারপর ঘরে ঢুকে শুয়ে পড়ি । ঝিটা এসে

৪

তার ভাঙা হিন্দীতে যখন খাবার জন্ত তাগিদ সুরু করে দেয়, তখন বিরক্ত হয়ে উঠে যাই। খাওয়া হলে আবার সেই গুয়ে থাক।

ফুলকাতায় বই পড়বার ফুরসত পেতুম না, কিন্তু এখানে এসে সেগুলো স্পর্শ করতেও ইচ্ছে হয় না। কখনো যদি বা একখানা টেনে নিয়ে বসেচি—দৈর্ঘ্যধরে দু-এক পাতার বেশী পড়তে পারিনি। এই বই আর এখন হাত দিয়ে ছুইনা। গ্লাসকেসের ভিতর হতে সেগুলো তাদের সোনালু চোখ মেলে আমার দিকে চেয়ে থাকে... .. তা' যেন আরও অসহ! আমি তাই কাঁচের ওপরকার ধুলো ঝেড়েও ফেলিনে।

স্বামী ফিরে এলে কতটা সময় বেশ কাটে—তারপরই কিন্তু সেই এক ঘেয়ে ব্যাপার। একদিন তিনি বলেন—“সমস্তটা দিন বন্দিনীর মত এমনধারা আবদ্ধ থাকলে শেষটায় একটা অসুখ করবে।”

আমি জবাব দিলুম—“কাল থেকে তা' হলে মাঠেই চরতে যাব।”

“তা কেন? আমার সহযোগী অধ্যাপকরা সকলেই বিবাহিত, তাদের বাড়ীগুলো ঘুরে বেড়াতে পার”—বলে তিনি আমার দিকে চাইলেন।

শুনে আমার গা জলে গেল। আমি বললুম—“তোমার বন্ধুপত্নীরা আমার সঙ্গে পরিচিত হবার জন্ত কিছুমাত্র ব্যাকুল নন। একথা বুঝতে পেরেও বেহায়ার মত তাদের গায়ে পড়ে আলাপ করতে হবে? সে আমি পারব না।”

“না, না—তা আমি বলচিনে” বলে তিনি আমার হাত ছুঁখানি তার মুঠোর ভিতর চেপে ধরলেন, তারপর আমার মুখের দিকে চেয়ে বলেন—“কিন্তু তোমার এই একঘেয়ে জীবনে কি করে বৈচিত্র্য আনা যাবে।” আমি এখানে আনন্দ পাচ্ছি বলে বেদনায় তিনি ক্লিষ্ট হয়ে পড়েছিলেন, তার মুখ চোখ দেখেই আমি তা বুঝতে পারলুম। মনে মনে ভাবলুম, আমাকে খুঁসি হতেই হবে! ...কেন পারবনা? এর চাইতে বেশী সুখ-সস্তার ক'জন্যের ভাগ্যে জোটে?

আমি তাঁর কাঁধের উপর ছুঁখানি হাত রেখে বললুম—“একটা কিছু খেলার ব্যবস্থা করলে ভাল হয় না?”

আমার মুখে এই প্রস্তাব শুনে তাঁর সমস্ত দুশ্চিন্তা তখনই যেন ঘুচে গেল। তিনি হেসে বলেন—“খাসা হয়, কিন্তু কি খেলার ব্যবস্থা করব?”

“টেনিস বেশ চলবে।”

“আমি যে জানিনে” বলে তিনি হেসে ফেলেন।

“দু-দিনেই তোমায় আমি পাকা খেলোয়াড় করে ছেড়ে দেবো।” এক

সপ্তাহের মধ্যেই খেলার জায়গা এবং সব সরঞ্জাম ঠিক হয়ে গেল। লেখাপড়ায় কুস্তি লাভ করলেও স্বামী কিন্তু খেলাটাকে সহজে আয়ত্ত করতে পারলেন না। দিনকত বেশ আমোদেই কাটালুম। খেলার পর শরীরটা গরম হয়ে উঠলে দুজনা বরাবর রাস্তায় বেড়িয়ে একেবারে রাবীর তীরে গিয়ে ফুলবোনা ঘাসের কার্পেটের উপর বসে আকাশের গায়ে আর রাবীর জলে আলো আঁধারের খেলা দেখতুম।

একদিন ফেরবার পথে আমি বললুম—“চল, তোমার কোন বন্ধুপত্নীর সঙ্গে আলাপ করে আসি।”

“না, তার কোন প্রয়োজন নেই। তোমার কথাই সত্যি—আমাদের তাঁরা পছন্দ করেন না। বন্ধুরা আমার মাঝে ভারতীয় বৈশিষ্ট্য কিছু খুঁজে না পেয়ে ক্ষুব্ধ হয়েছেন। অধ্যাপক মহলে আমাদের টেনিস খেলা নিয়ে খুব হাসাহাসি হচ্ছিল।”

আমি জিজ্ঞাসা করলুম—“তোমায় খুব লজ্জা পেতে হয়েছে, না?”

“সত্যি নীহার, দেশের শিক্ষিত লোকদের ওরূপ ব্যবহার, লজ্জা হবারই কথা। তুমি নিজে বুঝতে পারচ কি না জানিনা, আমি কিন্তু লক্ষ্য করেচি যে, এই একমাসের নিয়মিত পরিশ্রমে তোমার শরীর অনেকটা ভাল হয়েছে। আমি নিজে কোনদিন শারীরিক পরিশ্রম করিনি, কোনরকম খেলাতে কখনই মন দিইনি। তাই হয়ত চলবার বেলায় মাজাটা আমার লুয়ে পড়ত; এখন কিন্তু চলতে আমার কষ্ট হয় না মোটেই”—বলে প্রমাণ দেবার জন্তই যেন তিনি সোজা-হয়ে দাঁড়ালেন।

সত্যি খেলার ঝোঁকে সারাটা দুপুর মত্ত হয়ে থাকতুম। কখন স্বামী আসবেন, কখন খেলা সুরু হবে—আর কখনই বা রাবীর তীরে মুক্ত আকাশের তলে গিয়ে বসব—এই সবই ভাবতুম। তিনিও কলেজ থেকে ফিরে এসেই বেয়ারাংকে খেলায় আয়োজন করতে আদেশ দিয়ে তাড়াতাড়ি বেশ পরিবর্তন করে নিতেন এবং জলখাবার ব্যাপারটা সংক্ষেপে সেরে নেবার জন্ত ছুঁতিন খানা করে লুচি একসঙ্গে মুখে গুঁজে দিতেন—আর চা-এর বাটটা এক চুমুকেই খালি করে ফেলতেন। আমি একা একা হেসে আকুল হতুম—একেবারে ছেলে মানুষট।

খেলার দিকে আমার খুব ঝোঁক হবার একটা কারণ এই ছিল যে, আমি রোজই জিততুম। আমি খুব মুগ্ধবিরয়ানা চলে তাঁকে উৎসাহ দিতুম আর

মাঝে মাঝে ইচ্ছে করে পরাজয় যেনে নিতুম; কিন্তু তিনিও ক্রমে নিজের কৌশলে জয়লাভ করতে লাগলেন—সমস্ত শক্তি ও কৌশল নিয়োগেও আমি আর তাঁকে পরাজিত করতে পারতুম না। সেইটেই একেবারে অসহ্য হয়ে দাঁড়াল। একদিন বল্লম—“আর ভাল লাগে না—খেলাও একঘেয়ে হয়ে গেছে।” স্বামীর মুখে আবার বিবাদের চিহ্ন ফুটে উঠল।

সপ্তাহ কেটে গেল একেবারে বিনাকাজে। একদিন সকালে এসে চাকরটা বাজারের টাকা চাইলে। আমি বল্লম—“চ, আমিও যাব।” সে হাঁ করে আমার দিকে চেয়ে রইল। আমি তাকে ধমকে বল্লম—“নীচে যা, আমি আসছি।” স্বামী পড়ার ঘরে হয়ত নোট লিখছিলেন—আমার কথা শুনতে পেয়ে বলেন—“কোথায় যাচ্ছ?”

“চল আজ বাজার করে আসি! কি ছাই ভয় সব কিনে আনে, পয়সাও যায় অথচ খাওয়া ভাল হয় না।”

“বেশত, চলনা” বলে তিনি বেয়ারাকে গাড়ী ডাকতে আদেশ করলেন। আমি বল্লম—“গাড়ী কি হবে; হেঁটেই যাব।”

“সে-যে-অনেক দূর।”

“রাবীর চাইতে ত নয়।” খেলা ছেড়ে দিয়ে অবধি আর রাবীর তীরে বেড়াতে যাইনি। নীচে নেমে এসে, খেলার মাঠের পাশ দিয়ে যাবার সময় দেখলুম ঘাসগুলো লম্বা হয়ে উঠেছে। বেয়ারাকে ডেকে বল্লম “ঘাস কেটে মাঠ ঠিক কর।”

স্বামী জিজ্ঞাসা করলেন—“আজ আরার খেলতে হবে না কি?”

আমি বল্লম—“হঁ।”

কিছুদিনের জন্ত খেলা আর বাজারে যাওয়া, দৈনন্দিন কাজেই পরিণত হোল।

কিন্তু এত করেও যখন মনটাকে নিরানন্দের জড়তা হতে মুক্ত রাখতে পারলুম না, তখন সব-ই ছেড়ে দিলুম। আজ খেলার মাঠের ঘাস গুলো আধ হাত লম্বা হয়ে বেড়ে উঠছে, চাকর তার বাজার চুরি বাড়িয়ে দিয়েছে—স্বামীর মুখে আবার বিবাদের ছায়া ফুটে উঠেছে। আর আমিও একেবারে জড় হয়ে গেছি। স্বামী আমায় প্রফুল্ল রাখবার জন্ত কতরকম চেষ্টা করছেন—কত বিভিন্ন বিষয়ের আলোচনা, রাশি রাশি সুপাঠ্য বই। এত আদর, এত ভাল বাসা…… আমার বুক ফেটে কান্নাপায়, এভি—প্রাণ আমার শুকিয়ে মরে গেছে।

এমন কেন হোল, এভি! একি বিবাহের পরিণাম……? কিন্তু বিবাহ ত

আমার চিন্তের স্বাধীনতা হরণ করে নি, স্বামীত দাবীর জোর একটবারও আমার ওপর চালাতে চান নি……? এখানে যে আমি সম্পূর্ণ মুক্ত, তবুও, বলতে পার এভি, তবুও আমার অন্তরে এমন দৈন্ত, এমন অশান্তি কেন বেড়ে উঠছে? তোমারই—নীহার।

(২)

প্রিয়তমে,

কিছুতেই বিশ্বাস করতে পারছিলুম না যে, তোমার চিঠি পড়ি—তিনবার নীচের নামটা ভাল করে দেখে নিলুম। সত্যি করেই লিখেচ?……পরিহাস করনি ত? তোমার চিঠি যে হৃদয়-গলা-কান্নার-স্বরের মত এসে আমার বুক ফুলিয়ে দিচ্ছে।

সত্যিই জীবন তোমার কাছে একটা হুর্দহ বোঝা বলে মনে হচ্ছে?…… কেন? কিসের অভাব তোমার……? আমি ত কিছুই বুঝতে পারচিনে!

তোমার এ-অবস্থা বিবাহেরই ফল কি-না জানতে চেয়েচ। ও-ব্যাপারের সঙ্গে আমার যে পরিচয় নেই! না, না—তা নয়। ও ধারণা ভুল—আগা-গোড়া সব ভুল। এ-সিদ্ধান্তে কেমন করে উপনীত হলুম, শুনবে?

দেওয়ালে টাঙান তোমার ফটোগ্রাফ খানা যেমন স্পষ্ট দেখছি, তেমনি তোমার হৃদয়-খানি আমি দেখতে পাচ্ছি আমার হাতে রেশমে-বাধা তোমার লেখা পত্র-গুচ্ছের পাতায়-পাতায়।

কি তোমার হয়েছে? কিছু-ইত না……তোমাকে যে অনেক কিছু করতে হবে। বাংলার মেয়েদের যে মুক্তির বাণী শোনাতে চায়, তাকে এত অল্প, এমন তুচ্ছ ব্যাপারে বিচলিত হলে চলবে কেন?

একটা ক্ষণিক অবসাদ এসেচে বইত নয়। অচিরেই তা অপসারিত হবে। আমরা ত নদীর তীরে দাঁড়িয়ে শুধু ঢেউ গুণেই সময় কাটিয়ে দিচ্ছি—তুমিই যে নারীর বাত্যালোড়িত কন্ঠ-তরঙ্গে ঝাঁপিয়ে পড়েচ তোমার কৌশলে, নৈপুণ্যে ও সাফল্যে যে ভয়-ত্রস্তা, সতত-সঙ্কুচিতা নারী-চিন্তে শক্তি এনে দেবে। কিছু হচ্ছে না বলে তুমি আক্ষেপ করচ, কিন্তু তোমার অজ্ঞাতসারে তোমার করা-কাজের ভিতরকার সত্যটুকু মানুষ্যের মনে অঙ্কিত হয়ে উঠে—তাকে আর অগ্রাহ করা চলবে না।

টেনিস খেলা, বাজার করা প্রভৃতির মূল্য সেখানে বেশী নেই, যেখানে সকলেই ও-সব করে থাকে; অথবা ও-সব কিছু না করলেই যে জীবনের কিছু পাওয়া

যায় না, তাও নয়। তোমার সমাজের নারীরা যে ওই করেই মুক্ত হবে, তাও আমি বলচিনে। তবুও তোমার টেনিস খেলা, বাজার করা আমি প্রশংসা না করে এই জন্তই থাকতে পারচিনে যে, তোমার সমাজ ও-গুলিকে মস্তবড় অপকর্ম বলে ঘোষণা করেছে—তবুও তুমি সে-গুলো করতে দ্বিধা বোধ করচ না। যতখানি শক্তি অন্তরে সংগ্রহ করে তুমি সে-গুলি অহুষ্ঠিত করচ, সেই শক্তিকেই আমি পূজা করি। ওই শক্তিই তোমাকে বল দেবে সকল রকম বন্ধন ছিঁড়তে, সমস্ত অবিচার দূর করতে। এ হচ্ছে শুধু তাবের দিক হতে তোমার কাজকে সমর্থন করা—শারীরিক স্বাস্থ্যের দিক হতেও ওর মূল্য তোমাদের কাছে বড় কম নয়।

তোমাদের কাজগুলো যদি এই-দিক হতে ভেবে দেখ, তা'হলে কিছু করচিনে বলে অনুতপ্ত হতে হবে না। ভবিষ্যত-জাতি গড়বার কতবড় একটা দায়িত্ব ভগবান নারীকে দান করেছেন, সমাজ তা'হতে তাকে বঞ্চিত রাখবে?

জীবনের বৈচিত্র্য মানে এ নয় যে, তাকে তা'ই জন্ত সারাদিন ছুটো-ছুটি করে বেড়াতে হবে। প্রাণকে এমন ধারা তৈরি করা চাই, যাতে করে চারিদিক হইতে আনন্দ কুড়িয়ে নিজের ভাঙার সব সময় সে পূর্ণ রাখতে পারে। পাইন গাছটা সম্বন্ধে একদিন তুমিই না এই কথা বলেছিলে?

কল্পনায় একটা অশান্তির জাল বুনে নিয়ে মারুড়সার মত তার মধ্যে নিজকে আবদ্ধ রেখে আত্মহত্যার প্রবৃত্তি মানুষের মনে কেন আসবে, তাই? ভগবানের রূপায় এমন কিছু দুর্দাগ্য অর্থাৎ ভোমায় পীড়ন করচে না, যার ফলে তোমার জীবনের আনন্দ এর মধ্যেই নষ্ট হয়ে যাবে। অসকোচে তাই-ই করে যাও, যা সত্যরূপে তোমার কাছে প্রকাশিত হবে। আজ এই পর্যন্তই রইল। ইতি

তোমারই—এতি।

(৩)

স্নেহের ঠাকুর পো,

কি যে লিখচ, ভাল করে বুঝতে পারলুম না। জানই ত আমি মূর্থ—আভাসে ইঙ্গিতে কিছুই বুঝি না। নীহারের চিঠিরও ওই একই ভাব। তোমাদের হুটিকে নিয়ে মুস্থিলেই পড়েছি। নীহারের বৃকে কিসের ব্যথা

জমে উঠেছে? তার কারণই বা কি? তুমি কি এখনো তাকে কেবল নারীর কর্তব্যই শেখাচ্ছ?

“শুনলুম তাকে দিয়ে না-কি টেনিস খেলাচ্ছ, হাট-বাজার করাচ্ছ। সে গুলোও কি নারীর কর্তব্য? যাক। যাতে তোমরা স্মৃৎ পাও তাই-ই কর, আমি তাতেই খুশী।—কিন্তু ব্যথার কথা কেন? কিসের অভাব তোমাদের? টাকা কড়িতে যদি না কুলোয় লিখো, পাঠিয়ে দেব। নীহার ছেলেমেয়েদের একজনকে তার কাছে পাঠিয়ে দিতে লিখেচে—সে না-কি আর একা থাকতে পারচে না। মিন্তি শুনাই নেচে বেড়াচ্ছে, সে লাহোর যাবেই—আর খোকাও বাহানা ধরেচে। লোক পেলে আমি ওদের ছুঁজনকেই পাঠিয়ে দেব।

ভাল কথা, গৌরীর একখানা চিঠি পেয়েছি। তার ওখানে থাকা অসম্ভব হয়ে উঠেছে; অথচ মাথা রাখবার দ্বিতীয় স্থানটুকু নেই। বেচারি কি যে করবে! এ যে বেঁধে মারা! সে লিখেচে—“দিনরাত এ তাচ্ছিল্য সয়ে নির্ঘাতন ভোগ করে আমি থাকতে পারতুম সবই অগ্রাহ্য করে, যদি না ছেলেমেয়েগুলো এত কষ্ট পেত। নিজের আমার কিসের হুং? আমার সবই তো পুড়ে ঝামা হয়ে গেছে। মানুষ যে এমন করে ব্যর্থ হয়ে যেতে পারে—তা আগে কখনো ভাবিনি।”

“এর জন্ত দোষ দেব কারকে? বাংলায় আমি একা এমন নই—হাজার হাজার রয়েছে। তারা অনেকেই আমার চাইতেও বেশী যত্ন পাচ্ছে...কিন্তু অদৃষ্টের দোহাই মেনে বৃকের ব্যথা বৃকেই চেপে রাখতে।”

“আমি কিন্তু অদৃষ্টের ঘাড়ো সব চাপিয়ে দিয়ে শান্তি পাইনে। আমার অন্তরে একটা প্রতিহিংসার প্রবৃত্তি মাথা চাড়া দিয়ে উঠেচে। সে আমায় বৃকিয়ে দিচ্ছে যে, আমার এ অবস্থার জন্ত মানুষই বেশী দায়ী; আর সে মানুষ হচ্ছে আমারই আত্মীয় স্বজন সকলে। তারা সবাই মিলে যে অস্বাভাবিক নিয়ম করেছে, তাই ত আজ ব্যথা দিচ্ছে আমাকে এই অনল কুণ্ডের বাইরে ছুটে যেতে। কি চমৎকার বিধান এই-সব মানুষদের। বেঁধে মারবে, ক্ষতস্থানে নুন ছিটিয়ে দেবে, তবুও ছেড়ে দেবে না!”

“ফরিদপুর থাকতে একদিন দেখেছিলুম যে কতগুলি সঁাওতাল মাটি কেটে রাস্তা বাঁধছিল—তাদের দলে মেয়ে লোকও অনেক ছিল। মেয়েরা সন্তানদের কাপড় দিয়ে বেঁধে পিঠে করে নিয়েই মাটি টানচে। স্বামীকে তাই দেখিয়ে আমি বললুম—‘আহা, কি কষ্ট বেচারীদের।’

তিনি উত্তর করলেন—“চমৎকার পদ্ধতি। নারীকে এরা একেবারে অসহায় করে রাখে না। হুঁমুঠো অন্নের জন্ত ওই মেয়েদের আর পরের গলগ্রহ থাকতে হবে না।”

“সে-দিন সে কথা শুনে হেসেছিলুম, কিন্তু আজ সত্যিই ভাবটি প্রকৃত স্মৃতি ত্যারাই। ওই হাড়ভাঙ্গা খাটুনি আমরাও খাটি—তবুও ত কিছু করে উঠতে পারিনে। এরা যদি আমায় পীড়ন না করে বাড়ী হতে তাড়িয়ে দিত, তা’ হলেও যেন বাঁচতুম। কোনরকমে হয়ত সন্তান ক’টিকে খাইয়ে বাঁচাতে পারতুম।”

“ছেলে মেয়ে ক’টি একেবারে নষ্ট হয়ে যাচ্ছে। শুধু যে খাওয়ার অভাবে তাদের দেহ অপুষ্ট থেকে যাচ্ছে, তা’ নয়—যে অত্যাচার সহ্যে, যে রকম জঘন্য প্রকৃতির লোকের সঙ্গে থাকতে হচ্ছে, তাতে করে তাদের মনের দৈন্তও বেড়ে উঠে। এ অবস্থায় থাকতে হলে এদের একটিও মানুষ হবে না! সমস্ত দুঃখ কষ্টের চাইতে সেই চিন্তাই আমায় বেশী ক্লিষ্ট করে ফেলেছে।”

এমন আরো কত কি সে লিখেছে। নরেশের সঙ্গে পরামর্শ করে দেখে, তার জন্ত কিছু করা যায় কিনা। আমরা ভাল আছি। তোমাদের বিশদ খবর জানিয়ে। ইতি।

তোমার—বৌদি।

(৪)

ম্নেহের মোহিত,

চিঠি লিখে লিখে জবাব না পেয়ে কনক কিন্তু নীহারের ওপর ভারি চটে গেছে। সেই রাগের ঝাল ঝাড়বার জন্ত, তোমার কাছেও চিঠি লেখা সে ছেড়ে দিয়েছে। কিন্তু তুমি আমায় যে চিঠিগুলো লেখ, তার প্রত্যেকখানি না পড়ে সে থাকতে পারে না—আর তাতে তোমাদের দাম্পত্য-জীবনের সব কথা জেনে সে বেচারী ভ্রিয়মান হয়ে পড়েছে। অবসর সময়ে কেবল তোমাদের কথা বলে আমায় শুদ্ধ ব্যস্ত করে তুলেছে।

ওদিকে আবার কলকাতা হতে তোমার বউদি, কনকের মারফত, একটা কিছু উপায় বাংলা দিতে আমায় বারবার অহুরোধ করছেন। তাঁর বিশ্বাস, তোমার সুখ-দুঃখের সোণার আর রূপোর কাঠি ছটো আমার হাতের সামনেই রয়েছে—একটু কষ্ট করে সে ছটোকে ষায়গা মাফিক বসিয়ে দিতে পারলেই তোমাকে স্মৃতি করতে পারি।

বাস্তবপক্ষে তোমাদের অবস্থাটা বাইরের দিক হতে আমাদের কাছে বড়ই শঙ্কাজনক বলে মনে হচ্ছে। তোমার চিঠিগুলি পড়ে আমি একটা কিছু ব্যবস্থা করবার জন্ত উদগ্রীব হয়ে পড়েছি—কিন্তু মগজে কিছুই যোগায় না।

তোমায় আগে একবার লিখেছিলাম যে, কর্ণের একটা উদ্দাম প্রেরণা দেশের তরুণ-তরুণীদের বুকে চাঞ্চল্য এনে দিয়েছে। তার ফলে জীবনের কোন অবস্থার মাঝেই তারা আজ শান্তি খুঁজে পাচ্ছে না! ছাত্র ছাত্রীরা পড়বার স্লোক আওড়াতে বসে, তার মাঝে জীবনের নতুন রাগিণীর আলাপ শুনতে না পেয়ে, ভোক্তার মত মুগ্ধ হয়েই যাচ্ছে—যুবক যুবতী তাদের আকর্ষণ কাজের মাঝে আনন্দের লেশমাত্র অস্তিত্ব দেখতে না পেয়ে, পেটের দায়ে নিতান্ত অনিচ্ছার সঙ্গে বিমিয়ে বিমিয়ে কাজ চালাচ্ছে। পড়ার অবসরে, কাজের ফাঁকে হঠাৎ যখন তাদের অন্তরের আনন্দ সঙ্গীত বুকের পাজির কাঁপিয়ে রিপ রিগিয়ে বেজে ওঠে, তখন-ই তারা বই ছুঁড়ে ফেলে, কাজের বোঝা ঠেলে রেখে মুক্ত হয়ে ছুটে যেতে ব্যগ্র হয়ে ওঠে। ছুঁচার জন করেও তাই—কোনদিকে না তাকিয়ে একেবারে ছুটে বেরিয়ে যায়। কিন্তু সবাই কিছু তা পারে না—দো-টানার ভিতর পড়ে জীবনের আনন্দকে একেবারে হারিয়ে বসে।

এদের জীবন সার্থক করতে হলে এদের পড়বার ও করবার এমন বিষয় নির্বাচন করতে হবে, যার বোঝা হবে হালকা আর যার সঙ্গে মাথা থাকবে তাদের জীবনের আনন্দ।

নীহার যে দো-টানায় পড়ে হাবুড়বু খাচ্ছে, তাতে করে তার মনের কাদা সব তলিয়ে যাবে—আর মাতৃহের স্বর্ণ সরোজ শতদল মেলে ফুটে উঠে সৌন্দর্য্যে সৌরভে তার দেহমন মাতিয়ে দেবে। এমনি একটা পরিবর্তন যতদিন না ছার ওপর কাজ করচে, ততদিন সবাই মিলে চেষ্টা করেও তাকে সুখের সন্ধান বলে দিতে পারবে না।

ভাল কথা। তোমাদের গৌরীদেবী তাঁর ছেলেমেয়েদের নিয়ে এক সপ্তাহ হ’ল এখানে এসেছেন। আমাদের এখানে নতুন ধরণের একটা বালিকা-বিদ্যালয় প্রতিষ্ঠিত হয়েছে—আমিই তার সম্পাদক। একজন শিক্ষয়িত্রীর প্রয়োজন হওয়ায় আমি তোমার বউদিকে লিখি যে, গৌরীদেবী সে কাজ গ্রহণ করবেন কি না! জবাব স্বরূপ গৌরীদেবীর আবেদন এসে হাজির হল। আমরা তাকেই নিয়োগ করলাম। তিনি তার ভাইদের মতের বিরুদ্ধেই এ কাজ গ্রহণ করছেন। এখানে তার থাকবার ব্যবস্থা ইঙ্গুল হতেই করা হয়েছে,

আর মাইনেও আপাততঃ চল্লিশ টাকা স্থির হয়েছে। ছেলে মেয়েদের নিয়ে তিনি একরকম মন্দ থাকবেন না। কনকের সঙ্গে খুবই ঘনিষ্ঠতা হয়েছে—তিনিও তার “দিদি”। কাজেই মাঝ থেকে আমিও খানিকটা অপ্রত্যাশিত স্নেহ কুড়িয়ে পাচ্ছি—সে জিনিষটা বড়ই উপভোগ্য।

গৌরীদেবীর এই নতুন জীবনে লক্ষ্য করে দেখবার অনেক কিছুই আমি পেয়েছি। হিন্দু বিধবা গৃহকোণেই অভ্যস্তা—নতুন সমাজে সম্পূর্ণ নতুন ধরণের কাজে ব্রতী হয়ে একটা সঙ্কোচে আড়ষ্ট থাকবেন, এইরূপ আশঙ্কাই করেছিলাম; কিন্তু তাঁর সহজ সপ্রতিভ ভাব দেখে সত্যিই আমি বিস্মিত হয়েছি। তাঁর প্রতি ষত লোকের যেমন অবিচার এতদিন অবোধে চলে এসেছে, তেমন অনেক ক্ষেত্রেই হতে দেখা যায় না—অথচ দীর্ঘ দিনের এই নিষ্ঠুর অত্যাচার তাঁকে জীবনে-মরা করতে পারে নি। হাসিমুখে কর্তব্য কাজ করে প্রাণভরা তৃপ্তিলাভে ভুঁই হচ্চেন—প্রগলভতা বা কোনরকম আতিশয্য তাঁর কাছেও ঘেঁসতে পারচে না।

হাঁ, আর একটা কথা। তুমি অনেকবার অনুরোধ দিয়েচ যে, কনকের কথা চিঠিতে আমি কিছুই লিখিনি। আমার কিন্তু মনে হয় তার সম্বন্ধে আমি ষতটুকু জানি, তার চাইতে কিছু কম তুমি জান না। একটা কথা শুধু অসঙ্কোচে আমি বলতে পারি যে, পরস্পরকে আশ্রয় করে আমরা দু’টি প্রাণী বেশ আরামেই আছি। আর সে আরামের নেশা আমাদের হৃৎজনাতে এমনই মশগুল করে রেখেছে যে, একটি দিনের তরেও আমরা পরখ করে দেখতে প্রবৃত্ত হইনি আমাদের স্বাভাবিক অধিকার কোথাও খর্ব হয়েছে কি-না।

বাংলার তরুণীরা সব কনকের মত হলে বাঙালীর দ্বঃখ ঘুচবে কি-না বলতে পারিনে—তবে কনককে অন্তরকম করে গড়তে চাইলে তার জীবনটাকে যে নষ্ট করে দেওয়া হবে সেটা নিশ্চিত। কেমন আছ লিখো। ইতি।

তোমারই
নরেশ।

সমাপ্ত।

দুর্গোৎসব

[শ্রীপ্রফুল্লময়ী দেবী]

কোথা হ’তে আজ, নিখিল ভাসাল
এ নব হরষ বরষা!

যৌবন ভরা শ্রামলা প্রকৃতি
সে প্রাবনে যেন বিবশা!

আজি, একি এ মহান দৃশ্য,
কার গুণ গাথা গাহে বিশ্ব,

পূর্ণাতটিনী আজি গো কাহার
চরণ পরশ-সরসা!

কাহারে পূজিতে অর্ঘ্য সাজায়ে
পূজারিণী-ধরা বিবশা!

অনলে ওই যে আপনা সঁপিয়া
অগুরু বিলায় স্মরতি,

কাহার কণ্ঠে মাল্য হইতে
ঝরিছে গরবী করবী!

আজ, কুহুমে নব স্নগন্ধ
মর, ভুবনে একি আনন্দ!

বন্দনা রচে মধুর ছন্দে
ওগো মা! তোমারি স্কবি

দিকে দিকে আজ নব জাগরণ
ধূপ ধূমে নব স্মরতি!

মাগো, শিহরে পুলকে কদম্ব-মরি!
স্মরিয়া ও পদ লাভনি!

অশ্রুতে ভাসি’ শিরীষ শেফালি
নীরবে চুমিছে অবনী!

একি এ দীপ্তি আকাশে,
তোার, আগমনী বাজে বাতাসে,

কোন অপ্সরী খুলিল গো তরী
আজিকে সলিল বিলাসে ?
কি মন্ত্রে আজি জাগিয়া ভারত
চাহিছে ব্যাকুল চাহনি !
নিখিল ভাসাল মাগো, তোরি রাঙ্গা
পদ নখ-কণ-লাবণি !

মায়াবাদ ও অদ্বৈত তত্ত্ব ।

[শ্রীধীরেন্দ্রনাথ চৌধুরী]

অধ্যাপক শ্রীযুক্ত উপেন্দ্রমোহন কর ভাইদের নারায়ণে আমার সমালোচনা করিয়াছেন। অবশ্য আমার ভ্রান্তি দেখানই তাঁহার উদ্দেশ্য। তিনি যে সব প্রমাণাদি উপস্থিত করিয়াছেন তাহাতে আমি আমার কথার সমর্থন লাভ করিয়া সুখী হইয়াছি। আর সকলকে সে সূত্রের ভাগী করিতে হইলে তলাইয়া বিচার করিতে হইবে। কিন্তু বিচারগৃহের প্রবেশ দ্বারে এক গাঢ় fallacyতে আমি ঠেকিয়া পড়িলাম। সেগুলি সরাইতে হইবে।

প্রথম, Argumentum ad populum, আধুনিক শিক্ষাপদ্ধতির উপর ত দেশের লোক হাঁড়ে চটয়া রহিয়াছে। সুতরাং প্রতিপক্ষের মতটা প্রচলিত শিক্ষার কুফল বলিয়া প্রচার করিয়া দিলে অতি সুলভে যে একটা এক তরফা ডিক্রি নির্বিকারে বা অবিচারে পাওয়া যায় উপেন্দ্রবাবু এ প্রলোভনটা সম্বরণ করিতে পারেন নাই, তা তিনি যতই সাধনভজনশীল ত্যাগী ও জড়বুদ্ধিবিহীন হউন না কেন। বিচারের শেষে কথাগুলি বলিলে না হয় একটা সার্থকতা পাওয়া যাইত। কিন্তু প্রথমেই ইহার অবতারণা পাঠকবর্গকে প্রতিপক্ষের বিরুদ্ধে উত্তেজিত করা ছাড়া অল্প কোন উদ্দেশ্য সাধিত হয় নাই। উপেন্দ্রবাবু ভারতীয় ব্রহ্মবিদ্যা ও দার্শনিক তত্ত্বভাণ্ডারকে এত শূণ্যগর্ভ মনে করিলেন কেন যে বিশেষ কোন অদ্বৈতবাদ বা মায়াবাদ গ্রহণ না করিলেই আর কিছু গ্রহণ করিবার থাকিত না? শঙ্করের মায়াবাদ কি সে ভাণ্ডারের শতরত্নের একটা রত্ন নহে? দেশে বর্তমান শিক্ষাপ্রণালী প্রবর্তিত হইবার বহুশতাব্দী পূর্বে

হইতেই সেই ভাণ্ডারে মায়াবাদের শত প্রতিবাদ সঞ্চিত হইয়া নাই কি? বঙ্গদেশ মায়াবাদ ধার করিয়াছিল। মায়াবাদের জন্মস্থানে ইহার তীব্র প্রতিবাদাত্মকবাদ সকল পাশাপাশি বিবাদ করিতেছে নাকি? সমালোচক মহাশয় কি খবর রাখেন যে দাক্ষিণাত্যে দ্বৈতবাদী অদ্বৈতবাদীর জল স্পর্শ করে না! যাহারা বলিয়াছিলেন “মায়াবাদমসচ্ছাত্ত্বং প্রচ্ছন্নং বুদ্ধমেব তৎ” তাঁহাদের মাথাও কি ইংরাজী শিক্ষায় বিকৃত হইয়া গিয়াছিল? উপেন্দ্রবাবু কি ভুলিয়া গিয়াছেন যে এই বাঙ্গালাতেই সাতদিন বেদান্তের মায়াবাদী ব্যাখ্যা করিয়া কোন সাড়া না পাইয়া সার্কর্ভৌম যখন বলিলেন,

“তুমি শুনি শুনি রহ মৌনমাত্র ধরি ॥

ইহার উত্তরে

প্রভু কহে সূত্রের অর্থ বুঝিয়ে নিশ্চল।

তোমার ব্যাখ্যা শুনি মন হয় ত বিকল ॥

সূত্রের অর্থ ভাষ্য কহে প্রকাশিয়া।

তুমি ভাষ্য কহ সূত্রের অর্থ আচ্ছাদিয়া ॥

কিয়দ্দর অগ্রসর হইয়া সংশয়চ্ছেদিবাক্যে চৈতন্যদেব উত্তর দিলেন,

“জীবিন্তারের হেতু সূত্র কৈল ব্যাস।

মায়াবাদী ভাষ্য শুনিলে হয় সর্বনাশ ॥”

তারপর আরও আছে—

“আচার্য্যের দোষ নাহি ঈশ্বর আততা হৈল।

অতএব ব্রহ্মব্রহ্ম করি নাস্তিক শাস্ত্র কৈল ॥” (চৈঃ চঃ)

আমরাই দুর্বুদ্ধিবশতঃ কল্পনা শব্দটাকে বড় করিয়া দিলাম। আশা করি উপেন্দ্রবাবুও বোধ হয় এখন আর সাহস করিয়া বলিতে পারিবেন না যে তাঁর ‘নেতি’ শাস্ত্র গ্রহণ করিতে না পারিলেই তাহা জড়বাদীর ধারণামাত্র হয়, অথবা চৈতন্যদেবও পাশ্চাত্য জড়বাদের প্রভাবে আত্মকেচ্ছ্যাত হইয়া মহেশ্বরের প্রতি শ্রদ্ধাহীন হইয়া পড়িয়াছিলেন। আর পাশ্চাত্য শিক্ষাতেও যে মানুষ শ্রদ্ধাহীন হয় না তার প্রমাণ ত উপেন্দ্রবাবু নিজেই। তবে এ স্ববিরোধ তিনি করিলেন কেন? আমারও বিশ্বাস ও বন্ধুতাও তাই বলিয়া দিলেন যে, তিনি কোন অ-ইংরাজী টোলের অধ্যাপক নন। অথবা অহুমানেরও প্রয়োজন নাই। প্রত্যক্ষ প্রমাণই বর্তমান। তিনি বিলাতে আপিল করিয়াছেন। সুতরাং ইংবাজীপড়া হইলেই যে শ্রদ্ধাহীন হইতে হয়, তিনি নিজেই তাঁর সেকথার প্রতিবাদ!

দ্বিতীয় fallacy এই বিলাত আপিল। আমি এ কথা বলি, যে আমাদের আলোচনায় স্বমতপোষক কোন পশ্চাত্য পণ্ডিতের যুক্তি আমরা ব্যবহার করিব না! কিন্তু এ আপিল তা নয়। ইহা স্বমতের স্বপক্ষি বিলাতীপণ্ডিতের প্রশংসাপত্র। যুক্তি নয়। কিন্তু উপেক্ষাবাবুকে জিজ্ঞাসা করি, তাঁর একখানা সার্টিফিকেটের জায়গায় যদি আমি পাঁচখানা নিন্দাপত্র প্রকাশ করি, তাহলে কি তিনি পরাজয় স্বীকার করিয়া গৃহে ফিরিবেন? তা যখন নয়, তখন ইহার নাম দিলাম আমি বিলাত আপিল fallacy। এক শ্রেণীর পাঠকের অজ্ঞতাকে আলোচনা বাণিজ্যের মূল ধন করা হয় বলিয়া ইহাকে Argumentum ad ignorantiam বলাও চলে। কিন্তু এ ক্ষেত্রে সার্টিফিকেটে ফল ফলিয়াছে বিপরীত। তিনি স্বমত পোষক বলিয়া মোক্ষমূলের শরণাগত হইয়াছেন। কিন্তু তাঁহার নিজের তাঁহারই বিরুদ্ধ পক্ষ স্থাপন করিতেছে। তৃতীয় failacy হইয়াছে স্তম্ভরাজ্য Ignoratio elenchi. আমি “জড়বুদ্ধি” বশতঃ বুঝিতেই পারিলাম না উপেক্ষাবাবু এ উক্তি উদ্ধার করিলেন কেন? * পণ্ডিত প্রবর মোক্ষমূলের প্রশংসা করিয়াছেন The true Vedanta Philosophy’র বেদান্ত ফিলসফি মাত্রেরই নয়। আমরা দেখিয়াছি চৈতন্যদেব নিজেকে বেদান্তবাদী বলিয়াও শঙ্কর বেদান্তকে নাস্তিকতাদোষে ছুঁই করিয়াছেন, ইহার মধ্যে কোনটা True vedanta? একটা অবশ্যই false. কোনটা true, তা পণ্ডিতবর স্পষ্ট করিয়াই বলিয়া দিয়াছেন, যে বেদান্তে Subject ও object এর সমন্বয় আছে। ‘কার্য্যকারণ’ এবং ‘অহং-ইদং’ এর একত্ব আছে। সমালোচক মহাশয় বুঝিতেই পারেন-নাই যে মোক্ষমূলের যাহাকে বলেন True Vedanta তাহা তাঁহার মায়াবাদ বিধ্বংসী। এই জড়ই ত বলিয়াছি ignoratio clenchi. মোক্ষমূলের স্তুতি বা করিলেন কার গ্রহণ বা করে কে? সে কালের সেই শীতলাবাহীরও এই ভ্রম ঘটিয়াছিল। শঙ্কর বেদান্তে Subject সং object অসং। অহং’ এর স্থাপনা আছে, ইদং নিরাকৃত। মায়াবাদের ব্রহ্ম কার্য্যও নহেন কারণও নহেন। একটা হাঁ, একটা ‘না’; অথবা হুইটাই না একত্র যোগ করিলে একটা tremendous’ শূন্য পাওয়া যাইবে না কি? Synthesis হল উত্তম। সাধে কি শ্রীচৈতন্যমায়াবাদকে নাস্তিক্যবাদ বলিয়াছেন। তবে সে কথা পরে। আচার্য্য

* It (The true Vedanta Philosophy) rests chiefly on the tremendous Synthesis of the subject and object, the identification of cause and effect of the “I” and the “It” উপেক্ষাবাবু মৌলিক বচনের কিয়ৎংশ।

শঙ্কর আরম্ভও করিয়াছেন এক লইয়া শেষও করিয়াছেন একে, হুই কোথায় যে Synthesis হইবে? তাঁর উপর Synthesis আরোপ করিতে গেলে তাঁর সেই মোহনীয় বুদ্ধিমত্তার উপর যে একটা tremendous কটাক্ষ করা হয় তাকি উপেক্ষাবাবু একবারও ভাবিয়া দেখিবার অবসর পান নাই? তবে তিনি নিজে যে একটা সমন্বয় গড়িয়াছেন তাহা কতটা তাঁর নিজেরই মতের সঙ্গে সঙ্গত ও যুক্তিসহ তাহা যথাস্থানে বিচার করা যাইবে। চতুর্থ fallacy তাঁর তিনি এক জায়গায় ধমক দিয়া বলিয়াছেন, জগন্নাথ ঋষিদিগের কথা না মানিয়া অবিন্দ্যার দাস তোমার কথা মানিব? আমি যেন এরূপ ধৃষ্টতার কাজ বাস্তবিকই করিয়াছি। যাহারা সকলের শ্রদ্ধার পাত্র আমি তাঁহাদের উপরে আপনাকে স্থাপন করিতে চাহিতেছি এই ভাব শ্রোতৃবর্গের মনে উদ্বেক করিয়া দিতে পারিলে, সহজেই যে আমার উপর তাঁর জয়লাভের আশা আছে এই অভিসন্ধি তাঁর “বিন্দ্যার” ঠালা খাইয়া মনের এক কোণে ঘাইয়া লুক্কায়িত যে নাই সে বিষয়ে একেবারে নিঃসন্দেহ হইতে পারিলাম না; উপেক্ষাবাবু মনে রাখিবেন, এ দেশের বামাচারী তান্ত্রিক-গণও উপনিষদের ঋষির দোহাই দিয়াই আপনাদের অনাচারগুলি চালাইয়া দিয়াছিল। উপনিষদ ত বেওয়ারিশ মাল। এ দেশের বিরুদ্ধ সম্প্রদায় সকলে একই শ্লোককে আপনাদের মতানুযায়ী ব্যাখ্যা বা কু-ব্যাখ্যা করিয়া চিরদিন শ্রুতির সম্মান রক্ষা করিয়া আসিতেছেন। “তত্ত্বমসি” প্রভৃতি মহাবাক্যের হুবহু দ্বৈতবাদ পক্ষীয় ব্যাখ্যাও বহুদিন হইল চলিয়া আসিতেছে। সকল সম্প্রদায় ইহাকে মহাবাক্যও বলে না (“তত্ত্বমসি জীবহেতু প্রাদেশিক বাক্য”—১৫: ৫:) মায়াবাদীর ব্যাখ্যাই কি: সকলে স্বীকার করে? চৈতন্যদেবের সাক্ষ্য গ্রহণ করুন—

“মুখার্থ ছাড়িয়া কর গৌণার্থ কল্পনা।

অভিধা বৃত্তি ছাড়ি শঙ্কর করহ লক্ষণা ॥

প্রমাণের মধ্যে শ্রুতি প্রমাণ প্রধান।

শ্রুতি যেই অর্থ কহে সেই সে প্রমাণ ॥

ব্যাসের সূত্রের অর্থ সূত্রের কিরণ।

স্বকল্পিত ভাষ্য মেধে করে আচ্ছাদন ॥ (১৫: ৫:)

এখন উপেক্ষাবাবু বুঝুন, তিনি যে ভাষ্যাজন স্পর্শে রাহ মুক্ত করিয়া পূর্ণচন্দ্র দেখার বাক্যছটা বিস্তার করিয়াছেন, চৈতন্যদেব সেই ভাষ্যকে সূত্রেরও

আবরক মনে করেন। সূত্রাং ভাবিয়া দেখুন যুক্তি ছাড়া authorityর উপর নির্ভর একান্ত নিরাপদ নহে। তিনি যে “সচ্চিদানন্দ” শব্দের তিন অংশে একার্থ আরোপ করিয়া স্বমত ভেদও নিরসন করতঃ নির্বিশেষ অদ্বৈত তত্ত্ব স্থাপন করিতে চাহিয়াছেন বৈষ্ণব বেদান্ত কিন্তু সেই স্থানে তিনে এক, একে তিন, রূপ দ্বৈতাত্মক প্রমাণ করেন—

স্বাভাবিক তিন শক্তি যেই ব্রহ্মে হয়।

নিঃশক্তি করিয়া তাঁরে করহ নিশ্চয়।

সচ্চিদানন্দময় হয় ঈশ্বর স্বরূপ।

তিন অংশে চিহ্নিত হয় তিন রূপ ॥ (১৫: ৫:)

সূত্রাং উপনিষদকে স্বমতোপযোগী করিয়া কাথ্যা করিলেই হইবে, সে ব্যাখ্যা যুক্তিযুক্ত কি না তাহাই প্রধানভাবে দেখিতে হইবে। কেবল যে প্রাচীনেরাই মায়াবাদী ব্যাখ্যা স্বকপোল কল্পিত বলিয়া দোষ দিয়াছেন, তা নয়। নবীনেরাও এই অপবাদ দিতে বাধ্য হইয়াছেন। শ্রীযুক্ত মহেশ চন্দ্র ঘোষ, যাহার শ্রীতশাস্ত্রে প্রবেশ বিষয়ে সন্দেহ করিবার কিছু নাই এবং যাহার কোন দর্শনটোলের বিশেষ মতামতের বিপক্ষতা বা পক্ষপাতিতা করিবার কোন গরজ বা বালাইও নাই, জুলাই মাসের Modern Reviewতে “Jivatman in the Brahma Sutras” এই গ্রন্থের সমালোচনায় বলেন,— “If primality and finality be attributed to the Sutras, Sankara’s Commentary will, we admit, appear in some places as forced and artificial. But if the Upanishads be accepted as primal and final, we must, in many places, charge Badrayana and Sankara (both ?) with misrepresentations. The Vaishnava Theologians could not accept the absolute monism of the Upanishads and so had to depend upon Badrayana. If he did not suit them they would fall back upon some other resources. সূত্রাং বেওয়ারীশ মাল উপনিষদ ও তাহার ব্যাখ্যা লইয়া সম্প্রদায় সকলের মধ্যে যখন এমনি কাড়াকাড়ি (Scramble) তখন প্রতিপক্ষের প্রতি শ্রুতি বাক্যের ধমক আজ কালকার দিনে কতটা সময়োপযোগী তা বলা কঠিন। তবে ধমক

দিবার যোগ্যতা উপেক্ষা বাবুর কত এবং আমার প্রতি ধমকটা কিরূপ শ্রায়-শাস্ত্রানুমোদিত তা যথাস্থানে নির্দেশ করিবার ইচ্ছা রহিল।

সমালোচনা অতি অপ্রীতিকর কার্য, তা যদি আবার কোন পুণ্ড্রপাদ ব্যক্তির সমালোচনা হয়। প্রাচীন কালের যাহাদের স্মৃতি মানুষ ধরিয়া রাখিয়াছে তাঁহারা বিশেষ বিশেষ কার্যের জন্ত আসিয়াছিলেন। আচার্য্য শঙ্কর আসিয়াছিলেন বৌদ্ধ-নাস্তিকতা দলনের জন্ত। একদিকে দ্বৈতবাদী সাংখ্য অত্রদিকে শূত্রবাদী বৌদ্ধ—এ দু’এর সঙ্গে বিবাদে, অদ্বৈত তত্ত্বের উপর যে বিশেষ জোর (Emphasis) দিতে হইয়াছিল, অবস্থার আমূল পরিবর্তন সত্ত্বেও সেই বোঁকটাকে ধরিয়া রাখিতে গেলে জগদ্বিবর্তনের বিক্ষুব্ধ মুখে চুলিতে হয়। সহস্রাধিক বর্ষ পূর্বে আচার্য্য শঙ্কর যে আসনে বসিয়া উপদেশ দিয়াছিলেন তাঁহাকে সেই আসনেই বসাইয়া রাখিলে তাঁহার মধ্য হইতে জীবন বাহির করিয়া লইয়া তাঁহার কাষ্ঠমূর্ত্তির পূজা করা হইবে। মৃত গ্রহণ করে না, যেমন তেমনই থাকে। না হয় নষ্ট হইয়া যায়। জীবিতই গ্রহণ করিতে ভয় পায় না। সে নূতন গ্রহণ করিয়া আবেষ্টনের উপযোগী হয় ও দিন দিন বড় হইয়া উঠে। আমরা মধ্যযুগে যাইয়া শঙ্করের পূজা করিব কেন? তাঁর দর্শনের উপর নূতন রং ফলাইয়া যুগোপযোগী করিতে পারি না কি? তাহাতেই উহার প্রাণের পরিচয় পাইব। নতুবা পুরাতন পুতুল কেহ গ্রহণ করিবে না। তবে এ কথাও ঠিক এই বিংশ শতাব্দীতেও দশম শতাব্দীর লোক বিচরণ করিতেছে। পারিপার্শ্বিক অবস্থা নিচয়ের পরিবর্তনে নূতন তত্ত্বের (Data) আবির্ভাব হয়। তাহা স্বীয় অঙ্গীভূত করিয়া লইবার শক্তি যে systemএর নাই তাহা মৃত, জীবন্ত মানুষ বেশী দিন তাহা ব্যবহার করিতে পারে না। অষ্টাদশ শতাব্দীতে যে Rationalismএর সঙ্গে বিবাদ করিতে যাইয়া খৃষ্টীয় ধর্মযাজকগণ এক রকম Agnosticismএর আশ্রয় লইতে বাস্ত হইয়াছিলেন, আজ তাঁহারা সেই Rationalismকেই আশ্রয়কার বর্মরূপে গ্রহণ করিতেছেন। তাই বলিয়া অষ্টাদশ শতাব্দীর খৃষ্টান পাদ্রী এখন নাই তা কে সাহস করিয়া বলিবে? মহাত্মা গান্ধী বলেন, শঙ্কর ও চৈতন্য উভয়েরই প্রভাব দেশের উপর অসীম। অথচ একজন আর এক জনকে বলিয়াছেন নাস্তিক। শুধু তান্ত্রিক আচার্য্যের দেশ যখন মক্কাভূমি, ভক্তির বন্যা আসিয়া সব ভাসাইয়া দিল, আত্মা তৃপ্ত হইল। দেশ কাল পাত্র বিবেচনায় যাহা চাই, পাইলাম।

অন্ত কোনদিকের বিচার উঠিল না—সে দিকে দৃষ্টি এখনও যে পড়ে নাই অবস্থার বিবর্তনে নূতন সময়ের আবির্ভাবে আমরা যে ঐ-টুকুতেই সমস্ত থাকিতে পারিব তাহার সম্ভাবনাকোথায়? দেশের লোক যখন না খাইতে পাইয়া মরিতেছে, খাইতে পাইবে সে আশাও করিতে পারিতেছে না, তখন মহাত্মা বলিলেন—আমার অল্পসরণ কর, খাইতে পাইবে। অমনি সে কথা কাণের ভিতর দিয়া মরমে প্রবেশ করিল। দলে দলে লোক তাঁহার পশ্চাতে ছুটিল, কোথায় ঝাইতেছে ভাবিলও না। অবস্থার পরিবর্তন করিয়া দাও, ও-ডাক কাণেও পৌঁছাবে না। তখনকার কাজ সে [সময়কার জঞ্জাই অক্ষয় হইয়া রহিল। যুগ পরিবর্তনে মানুষের মনে যে আকাঙ্ক্ষা আসে, তার যে নূতন অভাব উপস্থিত হয় তদনুসারে প্রয়োজন হইলে ডাকের উপকরণও প্রকরণ দুই-ই বদলাইতে না পারিলে সাড়া চিরদিনই মিলিবে না। বৃদ্ধের ডাকে একদিন যে সাড়া মিলিয়াছিল, আজ তা আছে কি? মহায়ুদ্ধের পূর্বে যে nationalismএর ডাকে যুরোপের জাতি সকল মাতিয়া উঠিত আজ তাহাতে ভাটা ধরিয়াছে। তাই বলিয়া এ সকলের কি স্থায়ী মূল্য নাই? আছে যদি ইহাদিগকে নবতর উচ্চতর synthesisএর অঙ্গীভূত করিয়া লইতে পার। মানুষ তার মতের অনেক উপরে উঠিতে পারে। আমরা আচার্য্য শঙ্করের মায়াবাদের সমালোচনা করিতে বাধ্য হইয়াছি বটে কিন্তু আচার্য্যের কাছে ধর্ম বা সত্যের ঋণ যে অপরিশোধ্য, যাহা ইতিপূর্বে স্থানান্তরে লিপিবদ্ধ করিয়াছি, তাহার পুনরুন্মেষ আর করিব না। মাত্র এই কথা বলিয়া বিচার প্রবেশের পথ পরিষ্কার করিয়া লই যে আচার্য্যের প্রতি শ্রদ্ধায় আমি কাহারও অপেক্ষায় পশ্চাৎ পদ তাহা স্বীকার করি না, অন্ধভক্তিকে আমি শ্রদ্ধা মনে করি না, অশ্রদ্ধাই মনে করি। তবে যদি ভাবীর ধরণে (styleএ) কোন দোষ ঘটিয়া থাকে তবে করঘোড়ে পাঠকগণের নিকট মার্জনা ভিক্ষা করি—মানুষ আপনার ছায়াকে অতিক্রম করিতে পারে না।

বিচারে প্রবৃত্ত হইয়া উপেন্দ্র বাবু বিগত ফাল্গুনের প্রবাসীতে প্রকাশিত আমার একটি অতিক্রম প্রবন্ধ—শঙ্কর ও স্পিনোজা হইতে কিছু কিছু উদ্ধৃত করিয়াছেন এবং বিচার করিবার পূর্বেই সে সম্বন্ধে স্বীয় মন্তব্য প্রকাশ করিয়া সারিয়াছেন। সুতরাং টিপ্পনি নিশ্চয়োজন। তবে তিনি যে পাঁচটি পূর্ক পক্ষ করিয়াছেন তাহার আলোচনা করিলেই চলিবে।

(১) অদ্বৈততত্ত্ব ও মায়াবাদ যে পরস্পর বিরুদ্ধ সে কথার উত্তর উপেন্দ্র-

বাবুই স্পষ্ট করিয়া দিয়াছেন। মায়ী কেবলমাত্র বিদ্যার অভাব নয়, কিন্তু আবারণী বীজশক্তি—তাঁহার এই স্বীকারোক্তি অদ্বৈততত্ত্ব বিনাশ করিতেছে। মায়ার যখন সত্তা আছে, সে সত্তা ব্রহ্মের অন্তর্ভূত হইলে স্বগতভেদ আসে, বাহিরে হইলে ভেদ হয় ও ব্রহ্মের অসম্পত্তে ব্যাঘাত ঘটায়। এই মাত্র বলিলেন, মায়ী কেবলমাত্র বিচার অভাব নহে। সে নিশ্বাস শেষ না হইতেই স্তর ধরিলেন, উহা 'সৎ' নহে। আবার সে নিশ্বাসও পড়িল না, বলিয়া উঠিলেন, "সদস্য শব্দ দ্বারা অনিবার্য্য মায়ীশক্তি।" শক্তি শব্দদ্বারা বাটী যখন তখন 'অনির্বাচ্য'ও 'অসৎ' না হইয়াই যায় না? এমন না হইলে কি দর্শন শাস্ত্র গড়া যায়? একবার বাগ্বাজারের সুরষিকেরা তর্ক বিতর্কর পর মীমাংসা করিয়াছিল, "মাছেরা কি গরু না যে জলে আশুন লাগলে তারা গাছে উঠবে?" উপেন্দ্রবাবু বলেন, অনাদি "মায়ার অন্ত আছে বলিয়া তাহা সৎ নহে। অতএব মায়াবাদ দ্বারা ব্রহ্মের অদ্বৈততত্ত্ব কোনও রূপে ব্যাহত হয় না।" সমালোচক মহাশয় নিজের যুক্তিটো তলাইয়া দেখেন নাই। এই যুক্তিটোতে অনাদিকাল হইতে 'অন্ত' না হওয়া পর্য্যন্ত মায়াকে 'সৎ' বলিয়া ধরিয়া লওয়া হইল, এবং ষতদিন না 'অন্ত' হয় ততদিন ব্রহ্মের অদ্বৈততত্ত্বকে ব্যাহত করিতে তাহার কোন বাধা রহিল না। কোন সময়ে তার 'অন্ত' হইবে—এই উক্তিই প্রমাণ করিতেছে যে মায়ী আছে অর্থাৎ 'সৎ'। যা নাই তার সম্বন্ধে সে অনন্ত নয় এই কথা খাটে না। যতক্ষণ আছে ততক্ষণ ইহার পারমার্থিক সত্তাই স্বীকার করিতেছে। সুতরাং জগৎ মিথ্যা নয় নশ্বর। চৈতন্যদেবও এই কথাই বলিয়াছেন—"জগৎ যে মিথ্যা নহে নশ্বর মাত্র কয়।" এ সত্তা ব্যবহারিক বলিতে পারিবে না। কেন না ব্যবহারিক ভাবে সংসারব্রহ্মের 'অন্ত' নাই। লক্ষ লক্ষ অমুক্ত জীবের জন্ত মায়ীশক্তির কার্য্য অনন্ত কাল চলিবে। তাই জঞ্জাই উপনিষদ বলিয়াছেন, "এষোহশ্বথঃ সনাতনঃ।" কথাটা আরও একটু বিশদ করিয়া বলি।—ব্যবহারিক সত্তার 'অন্ত' নাই, মায়ার 'অন্ত' আছে; সুতরাং মায়ী ব্যবহারিক সত্তা নহে। মায়ী হয় ব্যবহারিক, না হয় পারমার্থিক; কিন্তু মায়ী ব্যবহারিক নয়, সুতরাং মায়ী পারমার্থিক। ইহাকেই বলে, উপনিষদ সমবালি, রাম! বলি, যার অস্তিত্বই নাই তা লইয়া এত বিব্রত কেন? মুখে যতই বলা হউক না কেন যে এই জগৎব্যাপ্য কেবল ভ্রান্ত জীবের জন্ত, পরমার্থতঃ কিছু নয়। কিন্তু পরমার্থতঃ ত জীবই জানিতে চায়। তাই, তার জ্ঞানের কাছে যা সত্য বলিয়া প্রকাশিত হয় তাকে মিথ্যা বলিলে, থাকে

বল পরমার্থ সত্য তার সত্যতার প্রমাণ করিবে কিসের জোরে? তারও দাঁড়াবার স্থান থাকবে না—সে abstract হয়ে যাবে। স্মৃতরাং জগৎকে একেবারে নাস্তির উপর বসান চলিল না। অথচ একদিক রাখতে গেলে অশুদ্ধি থাকে না। স্মৃতরাং পর পর সৎ ও অসৎ বলিতে বলিতে ডিগ্বাজী খাইয়া চলিতে হইতেছে। এ বিপদ যে উপেক্ষা বাবুর নিজের তা নয়। আচার্য্য শঙ্করকেই বাধ্য হইয়া মায়া শব্দে নানা স্থানে নানামত দিতে হইয়াছে। (ক) সৎ কি অসৎ তাহা নিরূপন করা যায় না (মুঃ ভাঃ ১।৪।৩ ; ২।১।১৪) (খ) ইহা নিত্য নিরুক্ত (নৃসিংহ উত্তর তাপনীয় ভাষ্য, ২ম খণ্ড) (গ) সা চ মায়া ন বিত্তে (গৌরপাদীয় কারিকার ভাষ্য, ৬।৫৮) এই হৃদৈবের কারণ যা সকল Dogmatic Philosophyতেই ঘটয়াছে। জ্ঞানের জন্ত ব্রহ্ম ও জগৎ দুই-ই চাই। শঙ্কর পূর্ব হইতেই এই দুইকে দুই স্বতন্ত্র কোটিতে স্থাপন করিলেন। এই দুইএর সামঞ্জস্য ছাড়া জ্ঞানতৃপ্ত হয় না। অথচ দুইটিকে দুই প্রকৃতি দিয়া ভাগ করা হইয়াছে—সামঞ্জস্য চলে না। তাই ধর পাকড়। ডেকার্টেরও তাই হইয়াছিল। হাঙ্গামার পর হাঙ্গামা আসিল, Spinoza এক করিলেন, কিন্তু কত খুৎ রহিয়া গেল। প্রাচীন Neo-platonistগণ এই ব্যবধান ছর করিবার জন্ত Emanationএর পর Emanation বাহির করিলেন, ব্যবধান গেল না। স্ববিরোধের উপর স্ববিরোধই কেবল পুঞ্জীকৃত হইল। আমাদেরও বাস্তুদেব, বাস্তুদেব হইতে সঙ্কর্ষণ, সঙ্কর্ষণ হইতে প্রহ্মায়, প্রহ্মায় হইতে অনির্কৃত, বাহির হইলেন, কিন্তু ব্যবধান ঘুঁচিয়াছে কি? উপেক্ষা বাবুও হালে পাণি না পেয়ে হাল ছেড়ে দিয়ে হতাশ ভাবে বসে পড়ে নাকে কাঁদিয়া দার্শনিক জগতের বালানাং ক্রন্দনং বলম্—বলেছেন, একটা অবোধা অনিবার্য্য মায়া না হ'লে কিছু বুঝা যায় না—সমস্যা হয় না। খুব বুঝাতে এসেছেন কিন্তু! সমস্যা কিসের? উপেক্ষা বাবু না এই একটুখানি পূর্বে 'নির্গুণ ব্রহ্মের সঙ্গে জগতের সম্বন্ধ কি' এই প্রশ্নের সম্ভাবনাতেই হেসে একেবারে কুটপাট হয়েছিলেন! তিনি না বলেছেন, এরূপ সম্বন্ধের প্রশ্ন “ব্রহ্মার পুত্রবত্তা” প্রকৃতির শ্রায় হাশ্র জনক! তবে কোন্ মুখে বলিলেন ‘ব্রহ্মের পারমার্থিক সত্তা ও জগতের (ব্যবহারিক?) সত্তা স্বীকার করিলে এবং এতজ্জয়ের সমস্যা করিতে হইলে মানুষের বোধশক্তি মায়াবাদের আশ্রয় গ্রহণ করিতে বাধ্য।’ যেন মায়াবাদ ছাড়া জগতে আর দর্শন শাস্ত্র রচিত হয় নাই! কে বলিয়াছিল, আগে ব্রহ্মকে সৎ ও জগৎকে অসৎ বলিয়া আরম্ভ কর এবং পরে তাদের সামঞ্জস্যের জন্ত একটা গৌজামিল

খুঁজিয়া হয়রাণ হও—এ যে স্বপ্নাত সলিলে ডুবে মরি, শ্রামা! সমস্যা কি একটা সম্বন্ধ নয়, উভয়ের মধ্যে একটা সম্বন্ধ সংস্থাপন ছাড়া। কি সমস্যা সম্ভব? তবে, যে সম্বন্ধের নামেই হেসে গড়াগড়ি, সেই সম্বন্ধের জন্ত এখন এত দৌড়াদৌড়ি কেন? না হইলেই হবে না। এই কথামূলি লিখিতে যাইয়া উপেক্ষা বাবু নিশ্চয়ই মনে মনে খুব হেসে ছিলেন? কেন না, ইহার মধ্যে স্ববিরোধের একান্ত ভাব! ইহারই নাম দর্শনশাস্ত্র, ইহারই নাম ভারতীয় দর্শনতত্ত্বের মস্তাজিহতার পরিচয়। পরিচয় আছে কিন্তু আরও অনেকদূর পর্যন্ত দুই বস্তুর মধ্যে সমস্যা করিতে হইলে সমস্যকারী তৃতীয় বস্তুর Tertium quid চাই যাহাকে উভয়ের গুণায়িত হইতে হইবে, অথচ উভয়কেই অতিক্রম করিতে হইবে। ‘এপার’ ‘ওপার’এর সমস্যকারী সেতুকে উভয় পারব্যাপীই হইতে হয়! স্মৃতরাং মায়া সদসদাঙ্কিকা কেন তা নিতান্তই অবোধা নয়। ঈশ্বর ও মানবের মধ্যে এক অনতিক্রমণীয় বাধা খাড়া করিয়া তাহার যখন নিদর্শন দরকার হইল তখন খৃষ্টীয় শাস্ত্র একাধারে দেবমানবধর্মী পুঞ্জের কল্পনা করিতে বাধ্য হইয়াছিল। এই সমস্যকারী যে দুইএর অপেক্ষাই শ্রেষ্ঠ তাহা আদিত্তে স্পষ্ট না হইলেও logical consequence রূপে পরে শ্রেষ্ঠ হইয়াই দাঁড়ায়। তাই, আজ যীশু ঈশ্বরকে স্থানচ্যুত করিয়া সৃষ্টির জগৎ জুড়িয়া বসিয়া আছেন। আমাদের দেশেও ত ঠিক তাহাই হইল! শঙ্কর শিষ্য সুরেশ্বর ঐতিহাসিক বাস্তবিক বদ্বিয়াছেন যাহাকে জানিলে সকল ভয় দূর হয় সেই ব্রহ্ম কিন্তু মায়ায় ভয়ে ভীত (তৈঃ বাঃ, ২।৬২—৭২) আর মায়াবাদী পৌরাণিক—তার হাতে মায়া নানারূপে নানা আকারে সকলের উপরে উঠিয়া বসিয়াছেন, মহাব্রহ্মও তার বাচ্চা। “ছিল হাতি হ'ল তুল কাটতে কাটতে নিস্মূল।” জগৎকে ছাঁটিয়া ব্রহ্ম স্থাপন করিতে গেলে পরিণাম ফল ইহা ছাড়া অস্ত কিছু হইতে পারে না।

(২) শঙ্করের অদ্বৈত তত্ত্ব কি সত্য সত্যই এক কল্পিত abstract একত্ব? বহু হইতে এককে বিচ্ছিন্ন করিলে তাহা সত্য সত্যই abstract এক। ও বহু আপেক্ষিক সত্য। বহুর ধারণাকে নিঃশেষ করিয়া ফেলিলে এক শূন্যে পরিণত হয়। উপেক্ষা বাবুত আমাকে অনেক প্রশ্ন করিয়াছেন, আমি তাঁকে একটা প্রশ্ন করিতে পারি কি? তিনি কি ‘নেতি নেতি’ পথে ‘বিষয় জগতের ‘সর্ব’ নিঃশেষ করিয়া দেখিয়াছেন পরিণামে কি পাওয়া যায়? আমি তাঁহাকে প্রতিজ্ঞা করিয়া বলিতেছি যে, এ পথে যুগে যুগে যাহারা গিয়াছিলেন তাঁহাদের পরিণাম যাহা হইয়াছে উপেক্ষা বাবুও তাহাই হইবে—পূর্ণত্রে মিলিবে না,

মিলিয়ে অমাবশ্যিক অঙ্ককার। এত জোর করিয়া বলিতেছি এই জন্ম যে অজ্ঞাতসারে তিনি প্রতিপক্ষকে সাহায্য করিয়াছেন—আমি তাঁরই সাহায্য পাইয়াছি। তিনি বলেন, তত্ত্বতঃ জগতের সত্য নাই, ব্রহ্মই একমাত্র অনন্ত সর্বব্যাপী সত্তা। জিজ্ঞাস্য এই জগতের যদি সত্তা না থাকে তবে জগৎব্যাপীর সত্তাটা থাকে কি ব্যাপিয়া? ‘সর্ব’র যে পথে গতি সর্বব্যাপীকেও সেই পথে মহাপ্রস্থান করিতে হয়, নাহ পস্থা। সর্ব যদি মিথ্যা হয় সর্বব্যাপী সত্য হইবেন কোন লজিক অনুসারে। সকল abstract thinking এরই পরিণতি এই, উপেক্ষাব্যবহার একর দোষ নয়। শঙ্করোত্তর মায়াবাদে মায়াবাদের যা logical consequence) ‘সচ্চিদানন্দ’ শূন্যে পরিণত হইয়াছিলেন। তাই ক্রীচৈতন্য নাস্তিকতার অপবাদ দিয়াছেন। প্রচ্ছন্ন বৌদ্ধ বলিয়া মায়াবাদের যে নিন্দা তাহা ভিত্তিহীন নহে। “Vision of the one in the many” ইহাতেই একের মূল্য। এই দৃষ্টিই জগৎ আজ সকল বিভাগে খুঁজিতেছে—শূন্যগর্ভ একের দৃষ্টি নহে। বহুকে ‘নশ্রাৎ’ করিলে একের কোন মূল্য থাকে না—এক তখন হয় শূন্য। বহুকে অস্বীকার করিয়া উপেক্ষাব্যবহার তাঁর এককে শূন্যই করিয়াছেন। সন্ন্যাসীকে খাইবার জন্ম ভক্ত একটা বাধাকপি দিয়াছিলেন। সন্ন্যাসী একটা একটা পাতা ফেলিয়া দিয়া ‘নেতি’ মার্গে কপি খুঁজিয়া হতাশ হইয়া বলিয়াছিলেন ‘কপি মিলে নেই! মায়াবাদীও সন্ন্যাসী। বাস্তবিক, এই abstraction আমাদের জাতীয় অধঃপতনের মূল কারণ।

(৩) আমি বলিয়াছি মায়াবাদে জগতের সঙ্গে ব্রহ্মের কোন সম্বন্ধ নাই। জগতের অস্ত্য কারণ “আছে কি না, এ প্রশ্ন আমার সঙ্গে বিচারে অপ্রাসঙ্গিক। যদিও আমার মতই তিনি পুনঃ পুনঃ সমর্থন করিয়াছেন তবুও শেষকালে যে আবার সম্বন্ধ স্থাপনের জন্য বাস্তব হইয়া পড়িয়াছিলেন, সে বিভ্রাটের কথা ইতিপূর্বেই উল্লেখ করিয়াছি।

(৪) শঙ্করের মায়াবাদ কি অবোধ্য irrational? হাঁ কি না বিচার করিতে যাইয়া উপেক্ষাব্যবহার নিজেই ত হাল ছাড়িয়া বসিয়া পড়িয়াছেন। তিনি যেরূপ হতাশভাবে বলিয়াছেন “সমর্থন করিতে হইলে মানুষের বোধশক্তি মায়াবাদে আশ্রয় গ্রহণ করিতে বাধ্য” তাহার অর্থ কি এই নহে যে ওটা কিছু বুঝা যায় না তাই দিয়া আর কিছু বুঝাইতে যাওয়াটা কি খুবই Rational? যা নিজে সৎ কি অসৎ তাই বুঝা যায় না সেই Principle দিয়া জগৎ সৎ কি

অসৎ তাহার সত্য বুঝাইতে যাওয়া কেবল Irrational তাহা নহে, আজগুবিও বটে! তাঁর এই অঘটন-ঘটন-পটয়সী যুক্তি বলে না বুঝাইয়াই বুঝাইয়া দেওয়া যায় না এমন তত্ত্ব কি আছে? আমি যদি বলি, ব্রহ্ম এক নির্বিশেষ স্বগত-ভেদ-হীন সত্তা হইয়াও এই বহুত্বপূর্ণ জগৎ সৃষ্টি করিয়া আপনার মধ্যে ধারণ করিয়া রহিয়াছেন। তাহাতে যদি কেহ আপত্তি করেন ইহাতে ব্রহ্মের একত্ব নষ্ট হইল। আমি বলি “অঘটন-ঘটন-পটয়সী শক্তির অসাধ্য কি আছে?” “আপনার বেলায় মহাপ্রসাদ অন্যের বেলায় ভাত” বলিলে চলিবে কেন? নিজেই অনির্বাচ্য নাম দিয়াছেন তার পর বলছেন অনির্বাচ্য যখন তখন ত অবোধ্য বটেই। Question begging epithetটা একটা যুক্তি নয়! কে বলেছিল অনির্বাচ্য মায়ার আশ্রয় গ্রহণ করতে? উপেক্ষাব্যবহার বলেন, মানুষের বোধ শক্তি ঐ রকমই করে! জিজ্ঞাসা করি, এই বহুনির্নিত মানববুদ্ধি ছাড়া আর কোন বুদ্ধি ধার মিলে কি যাহা দিয়া দর্শনশাস্ত্র গড়িতে হইবে? মুনি ঋষি হইতে চূর্ণাখুঁটি আমরা পর্যন্ত সকলকেই এই ছুঁত বোধশক্তিটার উপরই নির্ভর করিতে হয়। মানববুদ্ধির নিন্দা “যে ডালে বাসা সেই ডাল কাটার” লজিক। শেষে যদিও তিনি বলিতে বাধ্য হইয়াছেন অবোধ্য বলিতে চাও আপত্তি নাই কিন্তু কোট বজায় রাখিবার জন্য সমাধান করিলেন অতএব মায়াবাদ irrational নয়! কি যুক্তি বলে? “জুতা মেরেছে মেরেছে কিন্তু অপমান ত করে নাই” ইতি শ্রায়াৎ বোধ হয়।

(৫) সাধন ভজন দ্বারা কি সত্য সত্যই জীব ব্রহ্মের এক-স্বরূপত্ব অপ্রমাণিত হয়? আমি বলিয়াছি, মানুষ যখন কিছু ছাড়িতেছে, সাধন ভজন করিতেছে—তখন কিরূপে বলিবে যে সে ব্রহ্ম। যে ব্রহ্ম জানে সেই ব্রহ্ম এই ত যুক্তি? যখন জানে নাই, জানিবার জন্য প্রয়াস করিতেছে মাত্র—তার এই সাধন ভজন কি প্রমাণ করিতেছে না যে সে ব্রহ্ম নয়? আমার এই মহাপাপের জন্ম আমার ঘাড়ে উপনিষদের ঋষিদিগকে চাপাইয়া দিয়া আমাকে নরকে পাঠাইবার চেষ্টা হইয়াছে। জান না “ত্যাগেনৈকেনামৃতত্বমানন্ডঃ” ইহা ঋষিবাক্য? অবিদ্যার দাস, তুমি তা জানবে কি করে? ও হরি! আমি কখন বলাম ত্যাগের দ্বারা অমৃতত্ব লাভ হয় না? আমি না বলেছি যে ত্যাগ করে সে ব্রহ্ম নয়। উপেক্ষাব্যবহার গড়েছেন এক tremendous ignoratio elenchi. “এখান থেকে মারলাম ছুরি লাগল কলাগাছে, হাটু বেয়ে রক্ত পড়ে চোখ গেল রে বাপ!” মনে পড়ছে এইরূপ এক বিপত্তির

সম্মুখীন হইয়াই আচার্য্যশঙ্কর বলিয়া উঠিয়াছিলেন—“অহোহনুমান কোশলং দর্শিতমগুচ্ছশ্বেতাভিকবলীবর্দৈঃ”।

আগেও ব্রহ্ম পরেও ব্রহ্ম মায়াখানে মায়ার স্বপ্ন, এটা যে আমার স্বকপোল কল্পিত নয় তা উপেন্দ্র বাবু নিজেই নানা শাস্ত্র হতে প্রমাণ করে দিয়েছেন। মুক্তিও যে কম দিয়েছেন তা নয়। আচার্য্যশঙ্কর উর্দ্ধমূলোহবাকুশাখ এষোহখণ্ডঃ সনাতনঃ” এই কঠশ্রুতির ভাষ্যে আরম্ভ করিয়াছেন ব্রহ্ম লইয়াই। কিন্তু সংসার বৃক্ষটা যার আত্রকস্তম্ব পর্য্যন্ত অতি সুন্দর কবিত্ব বর্ণনা আছে তাহা অবিদ্যা বীজ প্রভব। বিজ্ঞার আবির্ভাবে বাজীকরের বাজীর শ্রায় মিলাইয়া যায়। পরে যদি শূন্য না থাকে তবে ব্রহ্ম ছাড়া আর কি থাকিবে? লাভ ক্ষতি কার কিছু নয়। মায়াবাদী বলিবেন, জীবের মুক্তি। মুক্তি ত হয় বিজ্ঞার আবির্ভাবে। অবিজ্ঞাগ্রস্ত জীবের কাছে বিজ্ঞা আসিবে না—পরমাআপি সংসারমায়্যা ন সংস্পৃশ্যতে। অবিজ্ঞা দ্বারাও বিদ্যা লাভ হয় না। উপেন্দ্র বাবু বলেন শ্রুতিবাক্যের শ্রবণ মনন কর। পূর্বোক্ত কঠভাষ্যে আচার্য্যশঙ্কর বলিয়া রাখিয়াছেন, শ্রুতিও ঐ সংসার বৃক্ষের পত্র—শ্রুতি শ্রুতি শ্রায় বিজ্ঞাপদেশ পলাশঃ—সুতরাং অবিজ্ঞার ফল। মায়াবাদের দিক্ হইতে সে পত্র চর্কণে কি ফল হইবে? দাঁড়াইতেছে, যে মুক্ত নয় তার আর মুক্তির সম্ভাবনা নাই। উপেন্দ্র ধীরেন্দ্রই যে কেবল অবিজ্ঞার দাস তাহা নহে, উপনিষদের ঋষিরাও সুতরাং অবিজ্ঞার উপরে নহেন। উপদেশটা ও উপদৃষ্ট উভয়েই অবিদ্যার অধিকারে। অবিদ্যা অতিক্রম না করিলে অবিদ্যাকে অবিদ্যা বলিয়া জানিবার উপায় নাই। অতিক্রম করিলে ত নির্বিশেষ অদ্বৈত-ব্রহ্ম—যেখানে বিদ্যা অবিদ্যার ভেদ নাই। সেখান হইতেও কোন উপদেশ আসিবে না, সুতরাং যেখানে আছেন সেই-খানেই থাকুন। বুঝিলেন উপেন্দ্র বাবু, a Consistent Mayavad must be speechless!

এখন উপেন্দ্র বাবুর চিন্তার ধারার একটু পরিচয় দিয়া উপসংহার করি। একস্থানে বলিয়াছেন সুখছঃখাদি দেহ ধর্ম অসৎ অমার্জিত বুদ্ধি স্থলদর্শীরাই দেহ ধর্ম সুখছঃখাদিকে সত্য বলিয়া জানে। কিন্তু শেষ করিয়াছেন, “মায়াকে অলীক বলিয়া আমরা যতই পরিহাস করি না কেন তাহার ছঃখদায়িনী শক্তি কি নিদারুণভাবে সত্য তাহা ভুক্তভোগী মাত্রই অবগত আছেন।” মায়াকে অলীক তিনিই বলিয়াছেন, আবার সে জন্ত

আক্ষেপও তিনিই করিতেছেন। সুখ ছঃখকে তিনিই উড়াইয়া দিয়াছিলেন, আবার তিনিই তাহা সত্য বলিয়া ঘোষণা করিতেছেন। ইহাকেই abnormal Psychologyওয়ালারা বলেন Mental Dissociations. উপেন্দ্র বাবু কার উপর গোসা করে এ নিদারুণ সত্যটা একেবারে বাইরে নিয়ে এলেন? আশা করি ইহা আধুনিক জড়বাদের সুবসাল ফল ভক্ষণ হেতু বর্দহজ্জিমর উদগার নহে। আর বিশ্লেষণ করিবার প্রয়োজন নাই, পাছে Psychopathology আসিয়া পড়ে। অতদূর যাব না। যদি উপেন্দ্র বাবু অহুগ্রহ করেন—সুখিনঃ ক্ষত্রিয়া পার্থ লভন্তে যুদ্ধমীদৃশম্— তবে আবার পাঠকের সঙ্গে আসিয়া দেখা করিব। এখন বিদায়।

বিচারক

[শ্রীশশাঙ্কমোহন চৌধুরী]

(১)

আমি যদি মা হ'তাম মা,
তুমি যদি ছেলে,
খুঁজে সারা হ'তাম না মা,
বাইরে তুমি :গেলে।
ধুলো ঝেড়ে মুছিয়ে নিয়ে
জামা কাপড় পরিয়ে দিয়ে,
অমন ক'রে দুধ গিলিয়ে
দিতাম নাক ঠেলে,
আমি যদি মা হ'তাম মা,
তুমি যদি ছেলে।

(২)

তুমি যদি খেলতে যেতে
ধুলো-বালির ঘরে,
মালুই, সরা, চিতের পাতা
এনে দিতাম করে।

বিষ্টি ধরে কচুর পাতায়
আনতে দিতাম ভিজে মাথায়,
উঠতে দিতাম গাছের শাখায়
খেলার খাবার তরে,

তুমি যদি খেলতে যেতে
ধুলো বালির ঘরে ।

(৩)

ছপুর বেলা খেলতে যদি
রোদের মাঝে গিয়ে,
যেতাম না মা আনতে টেনে
কোলের মাঝে নিয়ে ।

চুমো খেয়ে হাত ব্লায়ে
দিতাম না'ক তোমার গায়ে
দিতাম না ঘুম তোমার কায়ে
ঘুমপাড়ানী দিয়ে,

ছপুর বেলা খেলতে যদি
রোদের মাঝে গিয়ে ।

(৪)

তুমি যদি থাকতে প'ড়ে
একটু অসুখ ক'রে
কেঁদে সারা হ'তাম না মা,
তুলসী-তলায় প'ড়ে ।

হ'ত নাক মানত করি
সাধাসাধি ওষুধ ধরি
ব'লে দিতাম,—পালাও হরি,
আমি খোকায় ধ'রে,

তুমি যদি থাকতে প'ড়ে
একটু অসুখ ক'রে ।

সুখের ঘর গড়া

চতুর্দশ অধ্যায়।

[শ্রীঅতুলচন্দ্র দত্ত]

দয়াময়ীর বাজারে পৌঁছিলে ভবানীর পাকী নামানো হইল। এইখানে সহযাত্রী বন্ধুদের সহিত মিলিত হইবার কথা কিন্তু এখানে আসিয়া ভবানী শুনিলেন বাজারের লোকদের মধ্যে কলেরা দেখা দিয়াছে। ছই চারিজন ইতিমধ্যে মারাও গিয়াছে। এই বাজারের মালিক ভবানীপ্রসাদের খুড়া; একজন কর্মচারী এখানে তোলা (টোল) আদায় করিবার জন্ত মোতামেন থাকিত। তাহার অনুসন্ধান করিতে গিয়া ভবানী শুনিলেন যে সে ব্যাচারীও ঐ রোগে আক্রান্ত। শুনিয়া ভবানী বড় কাতর হইলেন। বিক্রাম করা বন্ধ রাখিয়া তাহাকে দেখিতে চলিলেন; বেহারাদের ডাক দিলেন।

সভয়ে বলিল “না হজুর রোগ বড় খারাপ গিয়ে কাজনি—আপনি বাড়ী যান আমি না হয় খোঁজ নিয়ে যাচ্ছি”। ভবানী বলিলেন তোমার প্রাণের ভয় হয় তুমি থাক আমার কাজে কথায় প্রতিবাদ করনা—”

আর কোন কথা না বলিয়া প্রভুর পশ্চাতে পশ্চাতে গেল।

পূর্বকথানুসারে বিজয় ও পঞ্চ দয়াময়ীর ঘাটে আসিয়া উপস্থিত হইল। ভবানীকে তথায় দেখিতে না পাইয়া উভয়ে ভাবিল হয় ভবানী চলিয়া গিয়াছে না হয় আসিয়া পৌঁছে নাই। ঘাটের দোকানে জিজ্ঞাসা করিয়া জানিল এক বাবু পাকী চাপিয়া উত্তর মুখে গিয়াছে। সিদ্ধান্ত করিল পায়ের যত্নগণা বশতঃ ভবানী বোধ হয় অপেক্ষা করিতে না পারিয়া বাড়ী চলিয়া গিয়াছে। উভয়ে আর অপেক্ষা না করিয়া—গ্রামের অভিমুখে যাত্রা করিল।

বিজয়দের বাড়ীর সম্মুখ দিয়া যে পথ সেই পথ দিয়া আরো আধপোয়া আন্দাজ রাস্তা দূরে তর্কসিদ্ধান্তের বাটী। বাড়ীর কাছে আসিয়া বিজয় পঞ্চকে বলিল— “আমাদের এখানে একটু বসে জিরিয়ে তারপর বাড়ী গেলে হয় না?” পঞ্চ এটিকেট অনুমোদিত মিথ্যা বিনয় বা কৃত্রিম ওজর এ সবের বড় ধার ধারিত না; সঙ্গে সঙ্গে সহর্ষে বলিল “সেটা আর এত অসম্ভব কি? বেশতো চলুন।” উভয়ে আসিয়া চণ্ডীমণ্ডপে উঠিল। তখন বেলা এগারটা। রোদের তেজ খুব প্রখর। বিজয় পঞ্চকে বসাইবার জন্ত একটা আসন আনিতে বাড়ীতে ঢুকিল।

বিজয় মায়ের সঙ্গে দেখা করিয়া পঞ্চর কথা বলিল— মা বলিলেন “তরু-
সিদ্ধান্তের ভাগে? তা বাইরে বসালি কেন? ঘরে নিয়ে আয় না?” বিজয়
বাহিরে গেল। যজ্ঞেশ্বরী ছেলে ও বন্ধুর জল্পে জল খাবার সাজাইতে বসিলেন।
কিরণ যাকে সাহায্য করিতে গেল। নলিনী ও তরু কলিকাতা হইতে আনিত
দ্রব্যাদি দেখিতে লাগিয়া গেল। খানিক পরে নলিনী আসিয়া বিজয়কে চুপি
চুপি বলিল “পঞ্চ দাদাকে নিয়ে এস বাড়ীর ভিতরে।” পঞ্চ বলিল “মাপ করবেন
বিশ্রামের ব্যাঘাত ঘটাবেন না—যা হয় এখানেই আনুন—মেয়েদের মধ্যে বসে
আড়ষ্ট হয়ে চক্ষু লজ্জা বাঁচিয়ে জলযোগ করা—মাপ করবেন মশাই উৎকর্ষার
সময় ঘাবড়ে যাব—এখানেই আনুন—”। বিজয় দ্বিধাক্রমে না করিয়া নলিনীকে
বলিল “তোতে আর তরুতে দুজনের জলখাবার নিয়ে আয় আমরা যাব না—”।

তরু নলিনী জলখাবার আনিয়া ধরিয়া দিল। কিন্তু যাকে বলে “যায়গা
করে জলখাবার দেওয়া” তা হইল না দেখিয়া বিজয় দুইবোনকে ডাকিয়া বলিলেন
“বোকা মেয়েরা এই বুঝি গেরস্থ বিড়ে শেখা হচ্ছে, যায়গা না করে খাবার ধরে
দিলি যে? আচ্ছা, বুদ্ধি! যা নলি আসন আনবে” বলিতে বলিতে বিজয় নিজেও
ছুটয়া বাড়ীর ভিতর গেল; তরুকে বলিয়া গেল দাঁড়া হাতে করে; মাটিতে
নামাসনি, আসছি—”।

একে অপরিচিত যুবা, তাতে আবার দাদার বন্ধু, তার উপর দেখা তৃতীয়
ব্যক্তিও কেহ নাই, দাদার আদেশ যতক্ষণ না সে আসে তদবস্থায় দাঁড়াইয়া
থাকিতে হইবে; তরু লজ্জায় কাট হইয়া গেল; বেচারী পাথরের মুস্তির মত
নিশ্চল হইয়া মুহূর্ত্তকে যুগের মাপে মাপিতে লাগিল। পাথরের মুস্তির একটা
রক্ষা, তা লজ্জায় লাল হয় না আর ঘামেনা; তরু কিন্তু লজ্জায় রাঙ্গিতে ও ঘামে
ভিজিতে লাগিল। পঞ্চ ব্যাটা ছেলে, সদা সপ্রতিভ; তার উপর বয়স দোষ
যাকে বলে রোম্যানটিক্ সে তরুর দিকে সভ্যভাবে তাকাইয়া এক নজর দেখিয়া
লইল; দেখিল খাসা সুগঠন একটি সুন্দরী মেয়ে, কিন্তু তারি শব্দটাই পড়িয়াছে
ব্যাচারী। পঞ্চ স্বভাবতঃই রহস্য প্রিয়; তরুর এই কঠিন অবস্থার কমিক্ দিকটা
তার নজরে পড়িল; শুইয়াছিল উঠিয়া হাসি চাপিয়া বলিল “দাদাতো তোমাকে
তারি মুস্তিলে ফেলে গেছে দেখছি রাখ তুমি ওইখানে নাগিয়ে, আচ্ছা শান্তিতে
বটে!” এমনি ভাবে সম্বোধিত হইয়া তরু চমকাইয়া অনিচ্ছা স্বপ্নে একবার পঞ্চর
দিকে চাহিয়া তখনি চোখ ফিরাইয়া লইল; পঞ্চর সমবেদনার উক্তির ফলে তরু
আরও লাল হইয়া উঠিল, আর নাকের ডগা ও চোখের কোল আরো ঘামিয়া উঠিল।

সে একবার দাদার পথের দিকে তাকাইল। পর মুহূর্ত্তেই নলিনী একটা আগন
আনিয়া সেইখানে পাতিয়া দিল; নলিনী পাড়ার্গেয়ে মেয়ে; পঞ্চকে সে চেনে,
এবং পঞ্চদা বলিয়া ডাকে, তার সম্মুখে তরুকে তদবস্থায় দেখিয়া সেও হাসিয়া
বলিল “কিলো এখনো ধরে দাঁড়িয়ে আছিন্?”

পঞ্চ হাসিয়া বলিল—“বা ধরে থাকবে না তো কি? ছেড়ে দেবে? তা
হলে যে সব পড়ে যাবে রে—”। পাথরের তরু সত্যিই তো পাথরের নয়,—
সরস উত্তর শুনিয়া সে ফিক্ করিয়া, হাসিয়া জল খাবার নামাইয়া দিয়াই ছুটিয়া
পলাইয়া একেবারে পড়বি তো পড় দিদির ঘাড়ে! কিরণ চমকাইয়া গিয়া বলিল
“কিলো হল কি? জুজু নাকি?” “হু—বাও—জানিনি” বলিয়া একেবারে ঘরে
চুকিয়া চুপ করিয়া বসিল। পঞ্চ বিজয়ের বিলম্ব দেখিয়া জিজ্ঞাসিল “ই্যা নলি
তোর দাদা কোথা?”

ন। দাদা ডাব কাটছে।

প। ও মেয়েটা বিজয় বাবুর বোন? ও কে তো দেখিনি?
নাম কি?

ন। ই্যা, ওর নাম তরু—এই তো ছয় সাত মাস হলো ওরা এসেছে। বিজয়
মুখ কাটা দুটা ডাব লইয়া আসিয়া উপস্থিত। দেবী হয়ে গেছে বলিয়া পঞ্চকে
ডাব একটা আগাইয়া দিল।

এমন সময় বাহিরে রাস্তার উপর পাকী বেহারার শব্দ হইল। নলিনী পাকী
বেহারার শব্দ শুনিয়া ছুটিয়া বাহিরে গেল; কাদের বউ বা বর একটা কিছু
আসিতেছে এই সে ভাবিয়া ছিল। তরুকেও একটা জোরে ডাক দিল “ভরিদি
বউ দেখবি আয়—” তরু বাহিরে দরজা দিয়া ছুটিয়া আসিল। দুই বোনে
কৌতূহলপূর্ণ দৃষ্টিতে বউ দেখিবার আশায় দাঁড়াইয়া রহিল। পঞ্চ বলিল “বোধ
হয় ভবানী আসছে—” সম্ভব ভাবিয়া বিজয় বাহিরে গেল। সত্যিই ভবানী।
পাকীর ভিতর হইতে বিজয়কে দেখিয়া ভবানী পাকী থামাইয়া নামিয়া পড়িল।
দুই ভগ্নীতে বউ বা বরের কোনটার একটাও নয় দেখিয়া, হতাশ হইল। ভাবে
বুঝিল দাদারই আর একজন বন্ধু। তরু নলীর হাত ধরিয়া টানিয়া অন্তর
অভিমুখে চলিয়া গেল। নলিনীর কৌতূহল বেশী, সে নবাগতকে চিনিল।
জমিদারের ভাইপো তাদের বাড়ী আসিয়াছে দেখিয়া নলিনী একেবারে আশ্চর্য্য
হইয়া গেল। কারণ সেটা যে একেবারেই অসম্ভব ঘটনা।

নলিনীর বিশ্বয় ও সন্দেহ পূর্ণ অপলক চাহনি দেখিয়া তরু ভাবিল নবাগত

কেউ একজন বিশিষ্ট ব্যক্তি হবেন, সে নলিনীর কাণে কাণে জিজ্ঞাসা করিল—
'উনি কে নলি?'

ন। তোর বর ভারি দি—!

তরু। যা তুই ভারি অসভ্য—

ন। আচ্ছা না, না, তোর নয় আমার—

তরু। (হাসিয়া) বটে! দাঁড়া দিদিকে কাকীমাকে বলছি—

ন। না ভাই বলিসুনি তোকেই দেবো!

তরু। যাঃ তোরা ভারি অসভ্য-পাড়া গৈয়ে কি না—

ন। (হাসিয়া) সহরেরা বুঝি জলখাবার দিতে গিয়ে বর যোগাড় করে—

তরু। (সভয়ে) না ভাই তুমি বড় অসভ্য, ছিঃ, দাঁড়া দিদিকে বলছি—

ন। না ভাই না ভাই! তা হলে আ-আ-আড়ি—

বিজয় ডাকিল 'নলি' 'তরু'। ডাক শুনিয়া ছুই বোনে ছুটিয়া বাহির দরজা দিয়া বাড়ী ঢুকিল। বৈটকখানার ঘরের কাছে আসিয়া নলিনী বলিল "কেন দাদা?—" "আর একটা আসন নিয়ে আয়—"। নলিনী চলিয়া গেল।

ভবানীকে বিজয় হাত ধরিয়া বসাইতে গেল।

ভ। ছোঁবেন না আমাকে?

বি। কেন?

প। অস্পৃশ্য হলে কি করে হে?

ভ। কলেরা রুগী ছুঁয়ে আসছি—

উভয়ে। সে কি? কোথা?

ভবানী সমস্ত বৃত্তান্ত বলিল। বিজয় শুনিয়া ভক্তি ও শ্রদ্ধায় ভরিয়া উঠিল।
আর জেদ না করিয়া বলিল "তবে দাঁড়িয়ে দাঁড়িয়ে এই ভাবটা খান?"

ভ। না এখন খাওয়াই উচিত নয়—মান করে কাপড় ছেড়ে তবে ওসব—

প। পায়ের ব্যথাটা কেমন?

ভ। তেমনি; কমেছে একটু—আসি তবে বিজয় বাবু—এখন আলাপ হয়েছে রোজ আসবো।

বি। আমিই যাব; আপনাকে আসতে হবে কেন?

প। (বিজয়কে) কেন মশাই? জমিদারের শ্রীচরণ কি হাঁটে না?

বিজয় অপ্রতিভ হইয়া বলিল—"না—না তার জন্তে নয়—"তবে—"

প। তবে কিনা শ্রীচরণ এখন ব্যথা পীড়িত।

তিনজনেই হাসিল। ভবানী বিলম্ব না করিয়া পাকীতে গিয়া উঠিলে
এমন সময় বিজয় বলিল একটা অল্পরোধ আছে রাখবেন?

ভ। কি শুনি না এত সকাতির নিবেদন কেন?

বি। ছ জনকেই এ অল্পরোধ।

প। ব্যাপার তাহলে গুরুতর! কি মশাই?

বি। কাল মধ্যাহ্নে আপনাদের ছজনের গরীবের বাড়ীতে নেমস্তন্ন;
আমার খুড়তুতো বোনের ভাত কাল—

প। বেশতো অতি উত্তম! ব্রাহ্মণ বটু ফলারের নেমস্তন্ন পেলে স্বর্গের
লোভ ছাড়তে পারে—

ভ। বেশতো ভালইতো আজ খেতে পারলাম না, কাল এসে খাবো—

এই বলিয়া ভবানী যাত্রা করিল। পঞ্চম জলখাওয়া শেষ করিয়া উঠিল।
বন্ধুদের বিদায় করিয়া দিয়া বিজয় বাড়ীর ভিতর মায়ের কাছে গিয়া বলিল—

বি। মা তোমাকে আর কাকাকে না বলে একটা কাজ করেছি—

মা। কি করেছ?

বি। জমীদারের ভাইপো ভবানী বাবু আর সিদ্ধান্ত মশাইএর ভাগে পঞ্চ
বাবুকে কাল খেতে নেমস্তন্ন করিছি।

মা। তাই ভাল! তা বেশ করেছ এর জন্য আর এত কাতরতা কেন?

তা জমীদারের ছেলে এ বাড়ী আসবে?

বি। কেন? তিনি তেমন লোক নন। ভারি অমায়িক নিরহঙ্কার—

মা। তার জন্যে নয়—

বি। তবে—

মা। পরে সব কথা বলবো এখন নেয়ে খাবি দাবি চল।

বিজয় স্নানাহার করিয়া মা কাকী ও ভগিনীদের সহিত আলাপ করিতে
বসিল কথোপকথনের ছলে সমস্ত বৃত্তান্ত অবগত হইয়া একটু যেন দমিয়া গিয়া
বলিল—"আমি যে আবার ওই জমীদারেরই ভাইপোকে নেমস্তন্ন করলাম?"
কিরণ বলিল—"তিনিওতো জানেন না ব্যাপার সব, বাড়ীতে নিশ্চয়ই গুনতে
পাবেন গুনলে হয়তো আর আসবেন না—"। বিজয়ের মা বলিল,—"না
আসবার তো কারণ দেখিনি, এতো বন্ধুতে বন্ধুতে মিতালীর নেমস্তন্ন, সামাজিক
নয়!" সহু বলিল।—"তা হলেও সামাজিকের দিনে তো—তবে একটা কথা
দিদি শুনিছি ছেলেটা মানুষ নাকি বড় ভাল—জমীদারের ভাইপো, ওই পর্যন্ত

কোনো হান্সাম জর্জুতে নেই, খাসা ছেলে! কতলোক এই দলাদলিতে তাকে জড়াতে চেয়েছে, কিন্তু গায় একটা কিছু গোল বেধেছেতো অমনি কলকাতা চলে যায়—”। বিজয় বলিল আমিও এই এক আধ ঘণ্টার আলাপে যা পরিচয় পেয়েছি তাতে মনে হয় এ ভদ্রলোকের হাতে যখন জমীদারী পড়বে তখন গায়ের ভাগি বদলে যাবে—”। সহ চাপা স্বরে বলিল—“যদি পড়ে।” সকলেই কথা শুনিয়া উৎসুক নেত্রে সহর মুখের দিকে তাকাইল—সহ বুঝিল এ সব কথার উল্লেখ করাটা ভাল হয় নাই। সে আর কোন কথা কহিল না। বিজয় জেদ ধরিল শুনিবে। যজ্ঞেশ্বরী বুঝিলেন সহ কোন কারণে সে কথার আলোচনা পছন্দ করেনা, কাজেই বুদ্ধি করিয়া কথা ঘুরাইয়া দিলেন। বলিলেন “তুই এসেছিস বাবা, একটু যেন ভরসা পেলাম; কাজটায় হাত দিয়ে অবধি আখান্তরে পড়িছি তোমার কাকার্তো ভয়েই সারা, গায়ের জমীদার দল যদি তাঁকে এক ঘরে করে—শুনছি বাউনরা নাকি জোট বেঁধেছে খেতে আসবেনা।” বিজয় দমিয়া গিয়া বলিল “তুমিই কেন এ বনুঝাট বাঁধাতে গেলে মা—”। মা বলিল “বনুঝাট আবার কি? আমি আমার দেওরঝির ভাত দিচ্ছি, বাউন খাওয়াচ্ছি কে করে না তা?” বিজয় বলিল—“মেয়েছেলের আবার ভাত কেন?” বলিয়া হাসিয়া খুড়ীর দিকে তাকাইল খুড়ীর মনের ডাব বুঝিতে। খুড়ী বলিল “সত্যি বাবা দিদির সব আলাদা কাণ্ড”। যজ্ঞেশ্বরী কৃত্রিম কোপে বলিলেন “কেন গাঁ ছেলে? মেয়ে ছেলে ছেলে নয় না? তোরাই কুলের প্রদীপ ওরা বুঝি—” বিজয় বলিল “মহাজন মা মহাজন ওই দেখনা ছুটা মহাজন মাথা উঁচিয়ে দাঁড়িয়েছেন” বলিয়া নলিনী ও তরুর দিকে সহাস্যে তাকাইল। যজ্ঞেশ্বরী ছই কথার চিবুক স্পর্শ করিয়া চুমু খাইয়া বসিলেন “হোক! তোর কি? তোরও যখন মহাজন আসবে ঘরে তখন দেখবি মহাজনের মূল্য কত!” মা জ্যাঠাইয়ার স্নেহসিক্ত আদরে ছই বোন মুখ টিপিয়া হাসিল।

কথা বার্তা শেষ করিয়া সন্ধ্যার প্রাক্কালে বিজয় বাড়ীর বাহির হইবে এমন সময় পঞ্চ আসিয়া তাহাকে ডাক দিল উভয় বন্ধুতে তখন সান্ধ্য ভ্রমণে বাহির হইল। মতলব ছিল ভবানীপ্রসাদের সহিত সাক্ষাৎ করা। পথে বিজয়ের মুখে পঞ্চও সব কথা শুনিয়া বলিল “তাতে কি? গ্রামের ও নিত্যক্রিয়া এতে করে আমাদের বন্ধু সম্মিলনে কোন বাধা নাই”। বিজয় ভরসা পাইয়া নিশ্চিন্ত হইল। উভয়ে তখন জমীদার বাড়ীর দিকে অগ্রসর হইল।

পঞ্চদশ অধ্যায়।

অন্নপ্রাশনের পূর্বরাত্রিতে যজ্ঞেশ্বরীর চিত্ত একটা অনির্দেশ্য আশঙ্কায় অস্থির হইয়া উঠিল। একটা সামান্য সাধারণ অথচ বড় সাধের গার্হস্থ্য অনুষ্ঠানের ব্যাপারটা যে অকারণে এমন অশান্তির হেতু হইয়া উঠিবে যজ্ঞেশ্বরী তা ভাবিয়া উঠিতে পারিলেন না। কোথা হইতে তুচ্ছ একটা খুঁৎ ধরিয়া গ্রামের মাতব্বর মুঞ্চবীরী যে তাঁর সহিত শক্ততা আচরণ করিতে বসিল, এবং কেনই বা বসিল, এর নিগুঢ় মর্ম্ম যজ্ঞেশ্বরীর মনে ও সহজ সরল বুদ্ধিতে ধরা পড়িল না। হাজার হউক মেয়ে মানুষ, গৃহস্থ বাঙ্গালীর ঘরের মেয়ে; তাহাদের পরম বল বাড়ীর পুরুষগণ; যজ্ঞেশ্বরী তাঁহার তীরু ছর্কলহাণ্ড দেবরটির নিকট সে সাহায্যের ভরসা করিতে পারিলেন না; তার উপর কথার বলে খুব হুঁসিয়ার হইয়া চলা সত্ত্বেও খোঁড়ার পা খানাতে পড়ে; যজ্ঞেশ্বরী গ্রামের হালচাল জানিয়া খুবই সাবধানে চলিতেছিলেন তবু এই এক আসন্ন বিভ্রাট! সেদিন অপরাহ্নে তর্কসিদ্ধান্তের নিকট আন্তরিক উৎসাহ ও আশ্বাস পাইয়া তবু কতকটা তাঁর ভরসা জাগিয়াছিল। কেবল একটা কথাই তাহাকে বেঁধা কাঁটার মত অস্বস্তি দিতে লাগিল—সে হইতেছে দেবরের সপরিবারে গৃহত্যাগ কল্পনা। কুচক্রীর কুচক্র পড়িয়া এই নিরূপদ্রব দেবর গো-বেচারীটি গার্হস্থ্য অশান্তিতে পড়িবে এই তার বিষম ভাবনা অথচ কার্যে এতদূর অগ্রসর হইয়াও তাহার অনুবোধ সত্ত্বেও উৎসব বন্ধ করা যায় না। সাত পাঁচ ভাবিয়া এবং রাত পোহাইলে শুভকাজটি নির্বিবাদে যাতে সমাধা হয় ঠাকুরের কাছে এই নিবেদন জানাইয়া যজ্ঞেশ্বরী চোখ বুজিলেন।

রাত্রি প্রভাত হইলে তিনি পরম উৎসাহে কাজ আরম্ভ করিলেন। সুখের অন্নপ্রাশন হইলেও হিন্দুর নৈমিত্তিক ক্রিয়ার সঙ্গে ধর্ম্মানুষ্ঠান এমন ভাবে জড়িত যে কোনোনা কোনো ভাবে দেবার্চনা না করিলে কোন সংস্কার ক্রিয়াই বিধিবিহিত হয় না। অন্নপ্রাশনের পূর্বে নান্দীমুখ শ্রাদ্ধ নামে একটা ধর্ম্মানুষ্ঠান হিন্দুমাত্রকেই করিতে হয়। এ বাড়ীর কুলপুরোহিত মাণিক চাটুয্যে। এজন্ত তাহাকে সময়ে খবর দেওয়া হইয়াছিল। কিন্তু যে কারণেই হউক মাণিকরাম ষজমান বাড়ীতে যথা সময়ে উপস্থিত হইল না দেখিয়া যজ্ঞেশ্বরী বড় ভাবিত হইলেন। এদিকে বেলা বাড়িয়া চলিল; খুড়ীর মুখ ভাত না দিলে ব্রাহ্মণ ভোজনের পর্ক আরম্ভ হইবে না। ব্রাহ্মণসম্ম আসিবে না বলিয়া ভয় দেখাইলেও ছ চার জনও যদি আসে এবং

ফলার ভোজনে বিলম্ব দেখিয়া গোলমাল বাঁধায় এই ভয়ে যজ্ঞেশ্বরী বিজয়কে ডাকিয়া বলিলেন “বাবা বিজু, বাউন তো এল না, একবার দেখনা চাটুঘ্যে মশাইকে—যদি তিনি বাড়ী না থাকেন তবে সিদ্ধান্ত মশাইয়ের কাছে গিয়ে একটা বিহিত করে আয়—”। বিজয় বিলম্ব না করিয়া বরাবর তর্কসিদ্ধান্তের বাড়ী আগেই গেল; পথে খুড়ার সঙ্গে দেখা হইল; ভোলানাথ শুনিল বিজয় পুরোহিতের সন্ধানে যাইতেছে। সে বলিল—“এইমাত্র শগিক দা'র সঙ্গে দেখা হল, সে জমীদার বাড়ী কি কাজে গেল; বন্ধে ষণ্টা দুই দেবী হবে—”। বিজয় চটিয়া গিয়া বলিল—“ছ ষণ্টা অপেক্ষা মাহুষ করতে পারে? খুকীটার যে পিত্তি বেরিয়ে যাবে? তার পেটে একটু দুধ পড়ে নি শুধু মাই খেয়ে আছে—মা কাকীমার যেমন কীষ্টি কচি ছেলের ওপর ধর্ম ফলাচ্ছেন! আমি সিদ্ধান্ত মশাইকে ডেকে আনিগে।” পুরুতকে পুরুতের প্রাপ্য হইতে বঞ্চিত করিয়া গোলমালকে আরো জটীলতর ভাবে পাকাইয়া তোলার যে সম্ভাবনা বেশী তা ভোলানাথ বুঝিল ও ভাইপোকে বুঝাইল। বিজয় কোন কেয়ার না করিয়া চলিয়া গেল। ভোলানাথ ভাজ ও ভাইপোর এইসব একগুঁয়েপনায় মনে মনে বিরক্ত হইয়া “যা ইচ্ছে করগে সব” বলিয়া বিরক্তভাবে বাড়ী ফিরিল।

সিদ্ধান্ত মহাশয়ের চণ্ডীমণ্ডপে উঠিয়া বিজয় কাহাকেও দেখিতে পাইল না। কেবল পাশের কুটারী হইতে একটা কিশোরী কোমলকণ্ঠনিঃসৃত সংস্কৃত শিবস্তোত্রধ্বনি শুনিল। বিশুদ্ধ উচ্চারণের ছন্দ বোধে এবং ললিত কণ্ঠের মাধুর্যে বিজয় মোহিত হইয়া স্থিরভাবে শুনিতে লাগিল। হঠাৎ ছন্দ কাটিয়া গেল, সঙ্গে একটা পরিচিত যুবা-পুরুষ কণ্ঠ শোনা গেল। শেষোক্ত কণ্ঠস্বর বালিকার উচ্চারণ শুধরাইয়া দিতেছে—“ম—হেশ মীশ—” ইত্যাদি বালিকাও তদনুকরণে হ্রস্ব দীর্ঘ মাত্রায় পুনরুচ্চারণ করিল—

বিজয় তখন ভরসা পাইয়া পা টিপিয়া টিপিয়া ঘরের দ্বার পর্যন্ত আসিয়া বলিল—“পঞ্চ বাবু আছেন।” পঞ্চ ও উমা দুজনেই থামিয়া গেল। পঞ্চ বিজয়ের কণ্ঠ চিনিয়া আর্গাইয়া আসিল—উমা—পালাইতে উত্তত। পঞ্চ তাহাকে থাম্ ঘাসুনি বলিয়া নিরস্ত করিয়া বিজয়কে সর্ধন্ধনা করিল—“পঞ্চ বাবু নেই কেহ পঞ্চ ভট্টাচ্ছি আছেন বটে—তার পর অসময়ে কি মনে করে বন্ধ?” বিজয় ধরে ঢুকিল। উমা অপরিচিত যুবাকে দেখিয়া পলাইতে উন্মত্ত পঞ্চ ডাকিয়া বলিল—‘যাচ্ছিন্ যে অসময়ে মেয়ে।’

তিরস্কার শুনিয়া সে সন্তোষে সলজ্জ চাহনি মাটীতে বন্ধ করিয়া ন বসে ন তহৌ হইয়া দাঁড়াইয়া রহিল। বিজয় হাসিয়া বলিল—“কি হচ্ছিল? ওই বোন নাকি?”

পঞ্চ। মাষ্টারী মশাই মাষ্টারী—সে দিন একটা শিবস্তোত্র শিখিয়ে গেছি আজ তাকে ভুলে পুড়িয়ে খেয়ে বসে আছে—শিবস্তোত্র শুলে পড়ে এই হয়েছে। অপরিচিত যুবা-পুরুষের কাছে নিজের অকর্মণ্যতার নিন্দাঘটিত তিরস্কারে উমা যেন নিবিয়া গেল। লজ্জায় তার অলঙ্কার কপোল ও কর্ণমূল লাল হইয়া উঠিল—সে ঘামিতে লাগিল।

বিজয়। কেন মশাই নিন্দে করছেন—যতটুকু আর্জিত শুনছি তা অতি চমৎকার লাগলো, আমি এমন মধুর কণ্ঠ আর উচ্চারণ শুধু মেয়েছেলের মুখে শুনি নি—তা সত্য বলছি।

যে অপরিচিত এমন করিয়া প্রশংসা করে এত অকৃত্রিম আবেগে, তাকে প্রশংসিত ব্যক্তি না দেখিয়া থাকিতে পারে না—প্রশংসাকারী যদি অজানা স্মদর্শন যুবা-পুরুষ হয় আর প্রশংসিত যদি কুমারী কিশোরী হয় তবুও না। উমা তার অচঞ্চল দেহ যষ্টিটাকে স্থির নিবন্ধ রাখিয়া শুধু কালো বাঁকা চোখের চঞ্চল তারকা ছটীকে অপাঙ্গে ফিরাইয়া নিমেঘের তরে বিজয়কে দেখিয়া লইল। বিজয়ও মুগ্ধনেত্রে তাহাকে সন্ত্রম সহকারে দেখিতেছিল। উমাকে চলতি মতে স্তম্ভরী বলা যায় না কেন না তার রং দুধে আলতাও ছিল না, গড়নও অপরূপা কিশোরীর মত নিখুঁৎ ছিল না, তবু যা ছিল তাহার উপর নেশার চোখের রং পড়িলে তাকে স্তম্ভরী না বলিয়া কেহ থাকিতে পারে না। স্বানান্তে সে একটা চেলির কাপড় পরিয়া, কালো চুল পিঠে ছড়াইয়া, কপালে চন্দনের টিপ পরিয়া ফুলের সাজি হাতে শিব পূজা করিতে যাইতেছিল এমন সময় পঞ্চুর পরীক্ষা! “কেমন শিবস্তোত্র মুখস্থ হয়েছে দেখি!” হাজাম বটে! ঠিক এই বোশে এই অবস্থায় যখন শুচি দেহ সজ্জাকে লজ্জা দিয়া তাহার ভিতরের গুণপনা স্তোত্র আর্জিতের ভিতর দিয়া ফুটিয়া উঠিতেছিল সেই সময়ে বিজয় তাহাকে দেখিল। এই রকম একটা শুভলগ্নে কিশোর কিশোরীর দৃষ্টি বিনিময় হইলেই হৃদয় বিনিময় হয়—তা রূপ দু'জনের যেমন হোক—এই লগ্ন উপস্থিত না হইলেও অপর্ধ্যাপ্ত দেহ সৌন্দর্য বা চিত্ত মাধুর্য কোন মতেই দৃষ্টার মনে বিন্দুমাত্র চাঞ্চল্য ঘটাইতে পারে না।

বিজয় বলিল—“ওকে ছেড়ে দেন না?—”

প। নাঃ—একবার আমাদের ছুজনের সামনে ও আত্মিক্তি করুক তারপর ছুটা—

বি। কেন বিড়ম্বনা আর? না হয় একটু ভুল হ'ল—

প। না মশাই! শিবস্তোত্র ভুল উচ্চারণ হলে ভারি বিপদ—বিশেষ আইবুড়ো মেয়ে—

যুগপৎ বিজয় ও উমার দৃষ্টি পঞ্চর মুখের উপর পড়িল। পঞ্চ কৃত্রিম গাঞ্জীর্যের সঙ্গে বলিল—“বিপদ কি জানেন—শিব চটলে ওর শিবের মত বড়ো বর ঘটয়ে দিতে পারে—।” বলিয়া পঞ্চ মুহু হস্ত করিল।

বিজয় উচ্চ হস্ত করিয়া বলিল—“শিব এমন কুকীর্তি করবেন কেন?

প। বলা যায় কি মশাই! তাং সিদ্ধি থেকে মেজাজ—নিজেই তো ওই কাজ করে বসেছিলেন!

বি। হ্যাঁ, এক উমার ভাগ্যে যা ঘটেছিল—এ উমার ভাগ্যে—না সে ভয় নেই, দেবতাদের দিন গিয়েছে—”

এর পর কোনো মেয়ের এমনি ভাবে ওইরূপ স্থানে দাঁড়াইয়া থাকা সম্ভব? পাথরের মেয়ে হইলেও ছুটিয়া পলায়। গুরুবাক্য অমাত্য মাত্য বোধাবোধ কিছুতেই থাকে না—

বাড়ীর ভিতর উমাকে সেভাবে ছুটিতে দেখিয়া তাহার মাসী জিজ্ঞাসা করিল—কিলা উমি অমন করে ছুটছিন্ যে?” উমা কতকটা আপনমনে কতকটা উত্তরছিলে বলিল—“দাদা কি ছুট মাসীমা—” বলিয়া ছুটিমির হেতু বা প্রকার ব্যাখ্যা না করিয়া ঠাকুর ঘরে ঢুকিল।

উমার পলায়ন দেখিয়া বিজয় একটু ক্ষুণ্ণ হইয়া সে ভাব চাপিয়া বলিল—“খাসা মেয়েটার গলার সুর আর উচ্চারণ বোধ—”। পঞ্চ সে কথায় কাণ না দিয়া বলিল—“তারপর কি মনে করে বলুন তো?” বিজয় তাহার আগমন হেতু জানাইল। পঞ্চ শুনিয়া বলিল—“তার আর কি বেশতো চলুন না?” অল্প সময় হইলে পঞ্চ হয়তো ওজর আপত্তি করিয়া ইতস্ততঃ করিত কিন্তু সে দিনের সেই তরুণী দর্শনের মোহ তাহাকে টানিয়া আনিল। পথে আসিতে আসিতে পঞ্চ এ ও তা কত কথাই কহিতে লাগিল। বিজয় মধ্যে মধ্যে স্থানে অস্থানে ‘ছ’ ‘হাঁ’ ‘না’ বলিয়া উত্তর সারিয়া দিল। পঞ্চ বন্ধুর আলাপকুণ্ডার হেতু হয়তো আন্দাজ করিয়াছিল।

পঞ্চকে লইয়া বিজয় বাড়ীর ভিতর ঢুকিল এবং মাকে ডাকিয়া বলিল—

“এই নাও মা, এক আনাড়ী পুরণ্ডাকুর এনে হাজির তো করলাম—”। যজ্ঞেশ্বরী বাহিরে আসিয়া হাসিয়া বলিলেন—“এইত ঠিকই এনেছি— আনাড়ী কেন? হ্যাঁ বাবা পূজা করতে জাননা?” পঞ্চ বলিল “জানি বৈকি মা? তবে চালকলা বাঁধতে এখনো তৈরি হয়ে উঠিনি।” বিজয়ের কণ্ঠস্বর শুনিয়া তরু ও নলিনীও আসিয়া গড়িয়াছিল; তাহারা ভাবিয়াছিল দাদা কাকে না কাকে ধরিয়া আনিয়াছে। পঞ্চকে দেখিয়া তরু লজ্জাকুণ্ঠিত হইয়া পলাইয়া গেল।

পঞ্চ পূজায় বসিল। যজ্ঞেশ্বরী আয়োজন উপকরণ পুষ্প চন্দন প্রভৃতি সব দেখাইয়া দিয়া তরুকে ডাকিয়া বলিলেন—“তরি এই খানে থাক তোরা যা দরকার হয় যোগাড় করে দিবি—তরু অক্ষুটকণ্ঠে বলিল “আমি তো কিছু জানিনি মা—”। মা বলিল “শিখতে হবে না ওসব? কেবল ফ্যানসন করে চুল বাঁধা আর স্নতো পশমের ছান্দ করাই শিখবি?” সছ বলিল “থাকনা দিদি নলি যাগ না!” যজ্ঞেশ্বরী বলিলেন—“না ওকেই যেতে হবে, বড়ো খেড়ে মেয়ে সব বিবিয়ানাই শিখতে মজবুৎ হবে?” তরু আর কি করিবে? মাকে সে চেনে, বিনা বাক্য ব্যয়ে নলির হাতটায় একটা টান দিয়া ছুজনে গিয়া ঘরে ঢুকিল। নলিনী পঞ্চকে দেখিয়াছে, স্বগ্রামবাসীতো বটেই, তাছাড়া এক পাড়ারই বাসিন্দা, শৈশব হইতে তাহাকে দেখিতেছে, তার লজ্জা করিবার কোনো হেতু নাই; করিলওনা; সে বেশ সপ্রতিভভাবে কথা কহিতে লাগিল। তরু একটা কাজের অছিল। কত্বেয়া একপাশে সঙ্কুচিত হইয়া চোখ ফিরাইয়া বসিয়া রহিল। একেবারে নির্ঝাঁক। পঞ্চ পূজায় বসিল। দুই একবার তাহার প্রবল লোভ হইয়াছিল সেদিনের সেই নীরবভাষিনী লজ্জাকুণ্ঠিতা কিশোরীটিকে আর একবার দেখে। প্রথম দিন সে তাহাকে ইঙ্গিত করিয়া ছ একটা রহস্য রঙ্গ করিয়াছিল। আজ আর তাহা পারিল না। বেশ বুঝিল তার একটা ভাবান্তর হইয়াছে। ঠাকুর পূজা করিতে আসিয়া এরূপ ভাবান্তরের পরিচয় দিতে তার বড় লজ্জা বোধ হইল। তবু মানুুষের মন, প্রকৃতি প্রবলা; সে একটা দরকারী দ্রব্যের অছিল। করিয়া দুই বোনকে ডাকিয়া বলিল দুর্কী চন্দন কই নলিনী? দুই জনেই চাহিল। তরু চোখে চোখ পড়িতেই চোখ নামাইয়া লইল। নলি বলিল—“বা পঞ্চ দা স্নমুখেই রয়েছে দেখতে পাওনি?” দেখিতে পায় নাই বা দেখে নাই একথা যে মিথ্যা তা পঞ্চ জানিত তবু নিজের চোখের দোষ না মানিয়া সে বলিল ও হরি! এই বুঝি দুর্কী এ যে ঘাস! নলিনী বলিল

তরুণীদি তুলেছে আমি জানিনি। তরু তারি মুষ্টিলে পড়িল। ছুঁকা ও ঘাস যে একজাতিয় তৃণ নয়, উহাদের মধ্যে একটা ভেদ আছে এ সে জানিত না; জানিবেই বা কি করিয়া? সে নিজের অজ্ঞতা ও অপটুতার আভাষ এমনি করিয়া ওই ব্যক্তির কাছ হইতে পাইয়া তারি অপ্রস্তুত হইল। নলিনী তার সে অবস্থা দেখিয়া একটু হাসিয়া নিজের অভিজ্ঞতার পরিচয় দিতে বলিল “তুমি থামো পঞ্চদা আমি এনে দিচ্ছি ভাল ছুঁকা।” এই বলিয়া সে ছুঁকা বাহির হইল; তরুও সেই ওজরে তার সঙ্গে পলাইয়া লজ্জা বাঁচাইবার মতলবে উঠিয়া যেমনি যাইবে অমনি তার অঞ্চলের বাঁতাসে ঘৃত প্রদীপ নিবিয়া গেল। পঞ্চ লক্ষ্য করিতেছিল সে বলিল “বেশ দীপ নিবিয়ে দিলে?” বিড়ম্বনা আর কাকে বলে? ব্যাচারী যেন কাঠালের আঠায় জড়াইয়া গেল। সে দেশলাই লইয়া দীপ জালিতে বসিল। দীপ জালিয়া কম্পিত অঙ্গুলি যোগে সলিতাটা অকারণে উল্লাইয়া দিতে লাগিল। যজ্ঞেশ্বরী দরজার কাছে আসিয়া দাঁড়াইলেন।

পঞ্চ তখন চোখ বুজিয়া শ্বাস করিতেছিল। তরু অপাঙ্গে তাহাকে মুদিত নয়ন দেখিয়া উঠিয়া পড়িয়া আস্তে আস্তে পা টিপিয়া বাহিরে গেল। সঙ্গে সঙ্গে নলিনী ছুঁকা লইয়া ঘরে ঢুকিয়া হাঁপাইতে হাঁপাইতে বলিল “এই নাও ছুঁকা কত নেবে পঞ্চ দা।” পঞ্চদার ধ্যান ভাঙ্গিল চোখ মেলিয়া দেখিল দীপ ধারিণীর নিক্রান্তা, ছুঁকাদায়িনী প্রবিষ্টা। কোনো মতে সে পূজা সারিয়া উঠিল। বিগ্রহশিলার অন্তরস্থ চিত্রায়ঙ্গু সর্বজ্ঞ এই ছুঁকাই প্রভাত শিশিরের মত ফুল ও পবিত্র তরুণ হৃদয়ের মধ্যে নিজের অনন্তলীলার প্রথমোন্মেষ দেখিয়া হাসিয়া প্রসন্নচিত্তে পঞ্চর পূজা লইলেন। তারপর নানী মুখের হাঙ্গাম সাসিয়া পঞ্চ বাহির হইয়া আসিল। রিক্ত হস্তে তাকে ঘরে ফিরিতে প্রস্তুত দেখিয়া যজ্ঞেশ্বরী বলিলেন—“ও কি নৈবিজ উপকরণ ও সব নিয়ে যাও বাবা—?” পঞ্চ বলিল—“না মা ওতে আমার অধিকার নেই। মাণিক কাকা ও সব নিয়ে যাবেন বা সেখানেই পাঠিয়ে দেবেন। এসব তাঁরই প্রাপ্য।” যজ্ঞেশ্বরী ও সহ তখন প্রণাম করিয়া দক্ষিণা দিতে গেল। পঞ্চ লাফাইয়া সরিয়া গিয়া উচ্চকণ্ঠে বলিয়া উঠিল “ও কি করছেন সর্বনাশ! কি মহাপাতক! আপনি মার বয়সী আমি ছেলের মত করছেন কি আপনারা!” যজ্ঞেশ্বরী হাসিয়া বলিলেন “সে অল্প সময়, এ সময় তুমি পুরোহিত দেবতার পূজারী তোমার এখন ব্রহ্মার মান।” “না খুড়ীমা ও সব বুঝনি রেখে দেন শাজ্জ মাজ্জ অত বাড়াবাড়ীতে নেই— মহাতারত—!” এই বলিয়া সে উপুড় হইয়া প্রণাম করিয়া যজ্ঞেশ্বরীর পায়ে

ধুলা লইয়া ছুঁটিয়া পালাইবে এমন সময় দেখে মাণিকরাম স্বয়ং উপস্থিত। তার মুখে চোখে ও ঠোঁটের কোনে বিরক্তির আভাষ। মাণিক চাপা ব্যঙ্গ স্বরে বলিল “পূজা করলে বাবাজী তুমি আর আমি নেবো চালকলা? তা কি হয় হে—”।

প। তোমার প্রাপ্য তুমি নেবে; আমি তো এ বাড়ীর পুরুষ নই, তোমার বিলম্ব দেখে এঁরা ব্যস্ত হন তাই কাজ সেরে দিয়ে গেলাম। বাউনে বাউনের সাহায্য করে না কি? খড়োর বুকি ভয় হয়েছে আমরা যজমান ভাঙ্গলাম?

মা। ভাঙ্গালেই হেলো বাবাজী! তোমরা হলে কালেজে পড়া পণ্ডিত মহামহোপাধ্যায়ের ভায়ে আর আমরা টুলো বাউন! আমাদের কাজকর্মে কি আর যজমানের মন উঠবে?

পঞ্চ প্রত্যুত্তর না দিমা হাসিয়া চলিয়া গেল।

মাণিক একটু এদিক ওদিক তাকাইয়া ভোলানাথকে লক্ষ্য করিয়া বলিল, “তা হলে ভোলা দা—তবে কি তর্কসিদ্ধান্ত মশাই এবার হতে এ বাড়ীর যজমানি আরম্ভ করেন?” ভোলার উত্তর দিবার আগেই যজ্ঞেশ্বরী সক্রোধে বলিয়া উঠিলেন—“কাকে কি বলছ ঠাকুর? অতবড় একজন মহা-মহোপাধ্যায় পণ্ডিত কি দায় ছুঁতে আমার বাড়ী যজমানি করতে আসবেন? চালকলা কুড়োবার ব্যবসাদার আলাদা ধাতের—!” যজ্ঞেশ্বরীর দেখিয়া শুনিয়া মেজাজ তিক্ত হইয়া গিয়াছিল, তিনি আর সহ করিতে পারিলেন না। মাণিক মুখের মত উত্তর পাইয়া নিরুত্তর হইয়া চলিয়া গেল। যজ্ঞেশ্বরী অত্যন্ত বিরক্তির সহিত বলিলেন—“না মন্দ বিল্লাট নয়—”।

ভোলানাথ দূরে বসিয়া নূতন হুকুর জল সংস্কার করিতেছিল—মুখ না ফিরাইয়া বলিল ‘জানি এই রকমটা হবে।’ যজ্ঞেশ্বরী শুনিয়া বলিলেন “কি হবে জানতে?” “এই আমার ছান্দ—” বলিয়া একটু চূপ করিয়া চাপা কণ্ঠে বলিল—“জানিইতো, মেয়েমানুষের আনু বলতে টানু সয় না—একেতো বাউনরা রেগে আছে একটা অছিলে পেলে হয়—যাগু কথায় কাজনি—” বলিয়া সে রান্না বাড়ীর দিকে চলিয়া গেল। যজ্ঞেশ্বরী বুঝিলেন একটা অনির্দিষ্ট আশঙ্কায় ভোলানাথ ভোর হইতেই বিমনা হইয়া আছে। পাছে কথা কাটা-কাটিতে কার্য্য বিল্লাট ঘটে সেই ভয়ে তিনি চূপ করিয়া গেলেন। মনে মনে কেবল নিজেকে ধিক্কার দিতে লাগিলেন যে, কেন এ নোংরা কাজে হাত দিতে গেলেন। লজ্জাও হইল এ সময় হঠাৎ উষ্ণ মেজাজের পরিচয় দিয়া ফেলিলেন।

হারা-মণি

[কাজী নজরুল ইসলাম]

এমন করে অঙ্গনে মোর ডাক দিলি কে স্নেহের কাঙালী ?
কে রে ও তুই কে রে, আহা ব্যথার সুরে রে, এমন চেনা স্বরে রে,—
আমার ভাঙা ঘরের শূন্যতারি বুকের পরে রে —
এ কোন্ পাগল স্নেহ-সুরধুনীর আগল ভাঙালি ?
কোন্ জননীর ছললে তুই কোন্ অভাগীর হারা-মণি,

চোখ-ভরা তোর কাজল চোখে রে
আহা ছল ছল কাদন চাওয়ার সজল ছায়া কালো মায়া সারাধনই
উছলে যেন পিছল ননী রে !

মুখ-ভরা তোর ঝর্ণা-হাসি
শিউলি সম রাশি রাশি

আমার মলিন ঘরের বুকে মুখে লুটায় আসি রে !
বুক জোড়া তোর ফুক স্নেহ দ্বারে দ্বারে কর হেনে যে যায়,—
কেউ কি তোরে ডাক দিল না ? ডাকলো যারা তাদের কেন
দলে এলি পায় ?
কেন আমার ঘরের দ্বারে এসেই আমার পানে চেয়ে এমন থমকে দাঁড়ালি ?

এমন চমকে আমায় চমক লাগালি ?
এই কিরে তোর চেনা গৃহ, এই কিরে তোর চাওয়া স্নেহ হায় ?
তাই কি আমার হৃদয়ের কুটীর হাসির, গানের রঙে রাঙালি ?
হে মোর স্নেহের কাঙালী !!

এ-সুর যেন বড়ই চেনা, এ-স্বর যেন আমার বাছার,
কখন সে যে ঘুমের ঘোরে হারিয়েছিল হৃদয়না মনে রে,—
না চিনেই আজ তোকে চিনি আমারি সেই বুকের মাণিক
পথ ভুলে তুই পালিয়েছিলি সে কোন্ ক্ষণে সে কোন্ বনে রে !

ছুঁওরে, চপল ওরে, অভিমানী শিশু !

মনে কি তোর পড়েনা তার কিছ ?

সেই অবধি যাহ কত শত জনম ধরে

শেষ-বিশেষে ঘুরে' ঘুরে' রে

আমি মা-হারা সে কতই ছেলের কতই মেয়ের মা হয়ে বাপ খুঁজছি তোরে
দেখা দিলি আজকে ভোরে রে !

উঠছে বুকে হাহা ধ্বনি
আয় বুকে মোর হারা-মণি,

আমি কত জনম দেখিনি যে ঐ মুখানি রে !
পেটে-ধরা নাই বা হলি, চোখে ধরার মায়াও নহে এ,
তোকে পেতেই জন্ম জন্ম এমন ক'রে বিশ্ব-মায়ের কাঁদ পেতেছি বে !
আচম্কা আজ ধরা দিয়ে মরা-মায়ের ভরা স্নেহে হঠাৎ জাগালি,

আহা গৃহ-হারা বাছা আমার রে !

চিন্‌লি কি তুই হারা-মায়ে চিন্‌লি কি তুই আজ ?

ওরে আজকে আমার অঙ্গনে তোর পরাজয়ের বিজয়-নিশান ঠাই কি টাঙালি ?
হে মোর স্নেহের কাঙালী !!

নির্বাসিতের আত্মকথা

[শ্রীউপেন্দ্রনাথ বন্দ্যোপাধ্যায়]

দ্বাদশ পরিচ্ছেদ ।

রাজনৈতিক মতামত লইয়া মাঝে মাঝে সুপারিটেণ্টেণ্টের সহিত আমাদের তর্ক-বিতর্ক হইত। বলা বাহুল্য ইংরেজ গবর্নমেন্টের মহিমা প্রচার করাই তাঁহার উদ্দেশ্য। স্ত্রীলোক ও রাজপুরুষের সহিত তর্ক উপস্থিত হইলে হারিয়া যাওয়াই ভদ্রসঙ্গত; কিন্তু সে কথা জানিয়াও আমরা মাঝে মাঝে দুই চারিটা অপ্রিয় সত্য কথা বলিয়া ফেলিতাম। যেখানে গায়ের ঝাল মিটাইবার উপায় নাই, সেখানে জিহ্বা সঞ্চালন ভিন্ন আর কি করা যায় ?

কসিয়াম তখন বিপ্লব আরম্ভ হইয়া গিয়াছে, একদিন জেলার আমায় ডাকিয়া জিজ্ঞাসা করিলেন—

“সুপারিটেণ্টেণ্ট যে তোমাদের সঙ্গে অতক্ষণ ধরিয়া তর্কবিতর্ক করেন, তা'র কি কারণ বলিয়া মনে হয় ?”

আমি বলিলাম—“কি জানি, সাহেব ? স্বজাতির গণগণন করা ছাড়া আর যদি কোন্ গুণ উদ্দেশ্য থাকে ত বলিতে পারি না।”

জেলার বলিলেন—“এ কথা বোধ হয় জান যে ছয় মাস অন্তর ইণ্ডিয়া গবর্নমেন্টের কাছে তোমাদের প্রত্যেকের সম্বন্ধে এক একখানি করিয়া রিপোর্ট যায়। তোমরা সুপারিন্টেন্ডেন্টের কাছে যে মতামত প্রকাশ কর তিনি সেগুলি নোট করিয়া রাখেন, আর তাহার উপর নির্ভর করিয়াই রিপোর্ট প্রস্তুত হয়। চারিদিকে বেরুগ ছলছল কাণ্ড বাধিয়া গিয়াছে, তাহাতে ইংরেজ যদি হারে, ত ল্যাঠা চুকিয়া গেল; আর যদি জয়ী হয় ত আনন্দের প্রথম ধাক্কায় তোমাদের ছাড়িয়াও দিতে পারে। ইংরেজ রাজত্বটা যে কি, তাহা আমি আইরিশ, স্ততরাং ভাল করিয়া বুঝি। জেলখানার ভিতর সব সময় পেটের কথা মুখে আনিয়া লাভ নাই।”

ভাবিয়া দেখিলাম, কথাগুলো ত ঠিক। জেলখানাটা ঠিক বড়তা দিবার জায়গা নয়। শত্রুর মুখ হইতেও উপদেশ শাস্ত্রমতে গ্রাহ্য; স্ততরাং জিহ্বাটা সেই সময় হইতে অনেক কষ্টে সংযত করিয়া ফেলিলাম।

সুপারিন্টেন্ডেন্ট মাঝে মাঝে যুদ্ধের বিষয় লইয়া আলোচনা করিতেন। জার্মানী যে কি ভীষণ রকম পাজি তাহাই তাঁহার প্রতিপাত্ত। আমরাও এক বাক্যে জার্মানীর পাজিত্ব স্বীকার করিয়া লইয়া তাঁহাকে জানাইয়া দিলাম যে, মরিবার পর জার্মানী নিশ্চয় নরকে যাইবে। দেবলোকে ইংরাজের পার্শ্বে স্থান পাইবার তাহার কোনই সম্ভাবনা নাই।

ইংরাজচরিত্রে একটা কেমন সঙ্কীর্ণতা আছে—সে কোন জিনিষের নিজের দিক ছাড়া পরের দিক সহজে দেখিতে পায় না। তেজিশ কোটি ভারতবাসী যে চিরদিনই ইংরেজের আশ্রয়েই থাকিতে চায়, এ কথা বিশ্বাস করিবার জন্ত ইংরেজের প্রাণ একেবারে লালায়িত। ভারতে ইংরেজ রাজত্ব যে আদর্শ শাসনব্যবস্থার খুব কাছাকাছি এ বিষয়ে তাঁহাদের বড় একটা সন্দেহ নাই।

কিন্তু এ বিশ্বাস সুপারিন্টেন্ডেন্ট সাহেবের শেষ পর্যন্ত ছিল বলিয়া মনে হয় না। যুদ্ধের সময় ত বেচারী প্রাণপণ করিয়া পরিশ্রম করিলেন, কয়েদীর খরচ কমানাইয়া সরকারী তহবিলে অনেক টাকা জমা দিলেন; কিন্তু যুদ্ধ শেষ হইবার পর নিজের একমাত্র শিশু কন্যাকে বিলাতে রাখিয়া আসিবার জন্ত যখন ছয় মাসের ছুটি চাহিলেন তখন ছুটি আর মিলিল না! আবেদনের পর আবেদনের যখন কোনও উত্তর পাওয়া গেল না, তখন তিনি বলিতে আরম্ভ করিলেন—
“All governments are bad. I am an anarchist” শেষে চটিয়া গিয়া তিনি চাকরী ছাড়িয়া দিবার প্রস্তাব করিয়া বলিলেন—“The gods of Simla

are incorrigible”। কিছুদিন পূর্বে মণ্টেগু সাহেবের রিফর্ম বিলের খসড়ায় যখন ইণ্ডিয়া গবর্নমেন্টকে একেবারে সর্বময় প্রভু করিয়া খাড়া করা হইয়াছিল, তখন :ঐ সুপারিন্টেন্ডেন্টই একদিন কথাপ্রসঙ্গে বলিয়াছিলেন—
“তাহাতে কোন দোষ হইবে না। The government of India are sensible people.” নিজের লেজে পা না পড়িলে কেহ পরের দুঃখ বুঝিতে পারে না।

যাক—এ দিকে যুদ্ধ ত শেষ হইয়া গেল। যুদ্ধের পূর্বে যখন ছাড়া পাইবার আশা ভরসা একেবারে ছাড়িয়া দিয়া মরণের প্রতীক্ষায় বসিয়াছিলাম, তখন দুঃখের মুখখানে দিন একরূপ কাটিয়া যাইতেছিল; কিন্তু যুদ্ধের পর আবার কয়েদী ছাড়িবার কথা উঠিল। তখন আশা ও আশঙ্কায় দিন কাটান ভার হইয়া উঠিল। একদিন সংবাদ আসিল যে, যে সমস্ত যাবজ্জীবন দণ্ডে দণ্ডিত রাজনৈতিক কয়েদী পিনাল কোডের ৩০২ ধারা অনুসারে অপরাধী নয় তাহারা জেলখানায় যদি সাত বৎসর কাটাইয়া থাকে ত তাহাদিগকে মুক্তি দেওয়া হইবে। আমাদের সাত বৎসর ছড়িয়া দশ বৎসর হইয়া গিয়াছে স্ততরাং প্রাণে একটু আশার সঞ্চার হইল। কিছুদিন পরে গুনিলাম যে, যে সমস্ত কয়েদীর মুক্তির জন্ত ইণ্ডিয়া গবর্নমেন্টের কাছে নাম পাঠান হইয়াছে তাহাদের সঙ্গে আমাদের নামও গিয়াছে; এখন বেঙ্গল গবর্নমেন্ট তাহা মঞ্জুর করিলেই মা কি আমরা নাচিতে নাচিতে দেশে ফিরিয়া যাইতে পারি।

এ পর্যন্ত কোনও যাবজ্জীবন দণ্ডে দণ্ডিত রাজনৈতিক কয়েদী পোর্টব্লের হইতে বাঁচিয়া, ফিরে নাই। ১৮৫৮ সালে যাহারা সিপাহি বিপ্লবের পর পোর্টব্লের গিয়াছিল তাহাদের সকলকেই সেখানে একে একে মরিতে হইয়াছে। শিবর সহিত যুদ্ধের পর যে সমস্ত ব্রহ্মদেশীয় কয়েদী আসিয়াছিল তাহারাও কেহ ছাড়া পায় নাই। আজ আমাদের জন্ত যে ইণ্ডিয়া গবর্নমেন্টের ইতিহাসে নূতন অধ্যায় আরম্ভ হইবে একথা সহসা বিশ্বাস করিতে সাহস হইল না। কিন্তু না বিশ্বাস করিয়াই বা করি কি? প্রাণ যে ফুলিয়া ফুলিয়া হাঁপাইয়া উঠিতেছে।

ক্রমে জন্মগীর সহিত সন্ধিপত্র-স্বাক্ষরিত হইল। ইংলণ্ডের বিজয় উৎসব ফুরাইয়া গেল। কিন্তু কই, কয়েদি ত ছাড়িল না। যুদ্ধ বন্ধ হইবার পর হইতেই দিন গণনা আরম্ভ করা গিয়াছে; দিন গণিতে গণিতে সপ্তাহ, সপ্তাহ গণিতে গণিতে মাস, ক্রমে মাস গণিতে গণিতে বৎসর ফুরাইয়া গেল; কিন্তু বিড়ালের

ভাগ্যে শিক। ছিঁড়িল না। খবরের কাগজে পড়িয়াছিলাম যে অক্টোবর মাসে ভারতবর্ষে বিজয় উৎসব হইবে সুতরাং মনের কোণে একটু আশাও রহিয়া গেল।

ভারতে যখন বিজয় উৎসব ফুরাইয়া গেল তখন মনটা ছটফট করিতে আরম্ভ করিল—খবর বুঝি এই আসে, এই আসে! শেষে ইণ্ডিয়া গবর্নমেন্টের নিকট হইতে খবরও একদিন আসিল। সুপারিন্টেন্ডেন্ট আমাদের আফিসে ডাকাইয়া শুনাইয়া দিলেন যে সরকার বাহাছর রূপা-পররশ হইয়া আমাদের বৎসরে একমাস করিয়া মাফ দিয়াছেন।—ব্যোয় ভোলানাথ! এত দিনের আশা এক ফুৎকারে উড়িয়া গেল।

তখন দেখিলাম যে পোর্ট ব্লেয়ারে জীবনের বাকী কয়টা দিন কাটান ছাড়া আর উপায়ান্তর নাই। তাই যদি করিতে হয় ত ভুক্তর বেগার আর খেটে মরি কেন? চিফ কমিশনারের নিকট আবেদন করিলাম যে সমস্ত মাফ লইয়া যখন আমাদের ১৪ বৎসর পূর্ণ হইয়াছে তখন সরকারী প্রতিশ্রুতি অনুসারে আমাদের জেলের কাজকর্ম হইতে অব্যাহতি দেওয়া হোক। কিন্তু সে আবেদন পত্র যে চিফ কমিশনারের দপ্তরে গিয়া কোথায় ধামা চাপা পড়িয়া গেল তাহার আর কোন উত্তরই পাওয়া গেল না।

এই সময় জেল কমিটি পোর্টব্লেয়ারে আসিবার কথা ছিল। আমি স্থির করিলাম যে আমাদের যা কিছু বক্তব্য সমস্ত জেল কমিটির নিকট গায়ের ঝাল ঝাড়িয়া বলিয়া দিয়া তাহার পর কাজকর্ম ছাড়িয়া দিয়া বসিয়া পড়িব। কিন্তু রাখে কক্ষ মারে কে? জেল কমিটি চলিয়া যাইবার অল্পদিন পরেই একদিন প্রাতঃকালে সুপারিন্টেন্ডেন্ট আসিয়া আমাদের সংবাদ শুনাইয়া দিলেন যে, বেঙ্গল গবর্নমেন্ট আমাদের আলিপুর জেলে পাঠাইয়া দিবার আদেশ দিয়াছেন; সেখান হইতে আমাদের মুক্তি দেওয়া হইবে।

অল্পদিনের মধ্যে গবর্নমেন্টের মতিপ্রতি কি করিয়া পরিবর্তিত হইল সে ব্রহ্মা উদ্ঘাটন করিবার কোতুল মনের মধ্যেই চাপা পড়িয়া রহিল। লম্বা হইয়া মেজের উপর পড়িয়া স্মৃতিতে কেহ চীৎকার করিতে লাগিল, কেহ হাত পা ছুঁড়িতে লাগিল, কেহ বা গান জুড়িয়া দিল। একজন বিজ্ঞ বন্ধু সকলকে শাস্ত করিবার জন্ত বলিলেন—“একটু স্থির হও, দাদারা; এ বাড়ীতে ফলার করতে এলে না আঁচানো পর্য্যন্ত বিশ্বাস নেই। শেষে মাঝ দরিয়ায় না জাহাজ ডুবিয়ে দেয়।”

জাহাজে চড়িবার আর দুই দিন বাকী। রাত্রে চোখে নিজা নাই; আহায়ে প্রবৃত্তি নাই। কল্পনার শত চিত্র চোখের সামনে ভাসিয়া উঠিতেছে। বহুদিন বিশ্বৃত সুপরিচিত মুখগুলি আবার মনের মধ্যে ফুটতেছে। যাহাদের সহিত ইহকালের সব বন্ধন কাটিয়া গিয়াছিল তাহারা আবার স্নেহের শতভোরে বাঁধিতে আরম্ভ করিয়াছে।

দুই দিন কাটিয়া গেল। দল বাঁধিয়া ২৬ জন জেল হইতে বাহির হইলাম। তখনও কাহারও কাহারও পায়ে বেড়ী বাজিতেছে। জেলের বাহির হইয়াই শিখেরা আকাশ পাতাল কাঁপাইয়া চীৎকার করিয়া উঠিল—“ওমা গুরুজী কি ফতে!” তাহার পর গান আরম্ভ হইল!—

“ধন্য ধন্য পিতা দশমেশ গুরু

মিম চিড়িয়াসে বাজ তোড়ায়ে—”

(হে পিতঃ, হে দশম গুরু! চটক দিয়া তুমি বাজ শিকার করাইয়াছিলে তুমি ধন্য!)

আজ আবার চটক দিয়া বাজ শিকার করিবার দিন আসিয়াছে তাই ঐ সঙ্গীতের তালে তালে আমাদের প্রাণও নাচিয়া উঠিল। মনে মনে বলিলাম—“হে ভারতের ভাবী গুরু, হে ভগবানের মূর্ত্যপ্রকাশ, সমুদ্র পার হইতে তোমার দীন ভক্তের প্রণাম গ্রহণ কর!”

তাহার পর জাহাজে চড়িয়া একবার পোর্টব্লেয়ারের দিকে শেষ দেখা দেখিয়া লইলাম। Wordsworthএর কবিতা মনে পড়িল—

“What man has made of man.”

জাহাজ তিন দিন ধরিয়া ছুটিয়াছে; মনটা তাহার আগে আগে ছুটিয়াছে। ঐ সাগর দীপে বাতি জলিতেছে, ঐ রূপনারায়ণের মোহনা! আজই খিদিরপুরের ঘাটে জাহাজ গিয়া পৌঁছবে!

নাঃ—জাহাজ ত কৈ ডুবিল না! এ যে সত্য সত্যই ঘাটে আসিয়া লাগিল। পুলীশ প্রহরী আমাদের সঙ্গে লইয়া আলিপুরের জেলের দিকে চলিল।

আবার আলিপুরের জেল—কিন্তু সে চেহারা আর নাই! আমাদের শুভাগমন বার্তা সুপারিন্টেন্ডেন্ট সাহেবের কাছে গেল। আমাদের কাছে যা কিছু জিনিষ পত্র ছিল প্রহরীরা আসিয়া তাহা বুঝিয়া লইল। বড় বিশেষ কিছু ছিলও না। পোর্টব্লেয়ার হইতে আসিবার সময় বইটাই সমস্ত নতুন

নূতন শ্বেলেদের মধ্যে বিলাইয়া দিয়া আসিয়াছিলাম। স্থির করিয়াছিলাম দেশে ফিরিয়া আর মা সরস্বতীর সহিত কোন সম্বন্ধ রাখা হইবে না। চূপ করিয়া শুধু ছুটি ভাত খাইব আর পড়িয়া থাকিব।

ষষ্ঠী খানেক জেলে থাকিবার পর সুপারিন্টেণ্ডেন্ট আসিয়া উপস্থিত হইলেন। সেদিন শনিবার। আমরা ভাবিয়াছিলাম সেদিন ও তাহার পরদিন বুঝি আমাদের জেলেই থাকিতে হইবে। কিন্তু কিছুক্ষণ পরেই সুপারিন্টেণ্ডেন্ট ঘর হইতে বাহির হইয়া আসিয়া জিজ্ঞাসা করিলেন—“তোমরা বোধ হয় আজই বাহিরে যাইতে চাও? কলিকাতায় তোমাদের থাকিবার জায়গা আছে?” বাহিরে যাইবার নাম শুনিয়া আমরা লাফাইয়া উঠিলাম। মুখে বলিলাম—“জায়গা যথেষ্ট আছে, আর মনে মনে বলিলাম—“জায়গা না পাই রাস্তায় শুয়ে থাকবো, একবার ছেড়ে ত দাও।”

সে রাত্রে হেমচন্দ্র, বারীন্দ্র ও আমি ছাড়া পাইলাম। কিন্তু যাই কোথায়? শ্রীযুক্ত সি, আর, দাশের বাড়ী গিয়া দেখিলাম তিনি বাড়ী নাই; তখন সেখান হইতে ফিরিয়া হেমচন্দ্রের বন্ধু হাইকোর্টের উকিল শ্রীযুক্ত সাতকড়িপতি রায়ের বাড়ীতে গিয়া আতিথ্য গ্রহণ করিলাম। হেমচন্দ্র ও বারীন্দ্র সে রাত্রে সেই-খানাই রহিয়া গেল আর আমি চন্দননগরে বাড়ী যাওয়াই স্থির করিলাম। ভাবিলাম রাত ১০।০ টার সময় হাবড়ার ষ্টেশনে গিয়া ট্রেন ধরিব।

কিন্তু বাহির হইয়া দেখিলাম যে কলিকাতার রাস্তাঘাট সব তুলিয়া পিয়াছি। ঘুরিতে ঘুরিতে যখন হাওড়া ষ্টেশনে আসিয়া হাজির হইলাম, তখন ট্রেন ছাড়িয়া গিয়াছে। ভবানীপুরে ফিরিয়া যাইবার আর প্রবৃত্তি হইল না। শ্রামবাজারে খন্ডুর বাড়ী—ভাবিলাম সেইখানে গিয়া রাতটা কাটাইয়া দিব। শ্রামবাজারে যখন পৌছিলাম, তখন রাত বারটা বাজিয়া গিয়াছে। বাড়ীর দরজা বন্ধ। দুই চারিবার কড়া মাড়িয়া যখন কোন সাড়া পাইলাম না, তখন ভাবিলাম “কুচ পরোয়া নেহি; আজ রাতটা কলিকাতার রাস্তায় না হয় ঘুরিয়া ঘুরিয়া বেড়াইব।” প্রাণে একটা নূতন রকম আনন্দের দেখা দিল। আজ বার বৎসর পরে খোলা রাস্তায় ছাড়া পাইয়াছি! সঙ্গে জেলার নাই, পেট অফিসার নাই, একটা ওয়ার্ডার পর্যন্ত নাই! অতীতের বন্ধন কাটিয়া গিয়াছে, নূতন বন্ধন এখনও দেখা দেয় নাই। আজ সংসারে বাস্তবিকই আমি একা। কিন্তু এই একাকিত্ববোধের সঙ্গে কোন বিয়াদের কালিমা জড়িত নাই, বরং একটা শান্ত আনন্দ উহার তালে তালে ছুটিয়া উঠিতেছে।

শ্রামবাজার হইতে সাকুলার রোড ধরিয়া শিয়ালদহ ষ্টেশনের দিকে রওনা হইলাম। বার বৎসর জুতা পরা অভ্যাস নাই, স্তবরাং আজ নূতন জুতায় পা একেবারে ক্ষত বিক্ষত হইয়া গেল। জুতা খুলিয়া বগলে পুরিয়া চলিতে লাগিলাম। বগলে পুটুলী দেখিয়া রাস্তায় এক পাহারাওয়াল ধরিয়া বসিল—কোথা হইতে আসিতেছি কোথায় যাইব ইত্যাদি ইত্যাদি। একবার মনে হইল সত্য কথা বলিয়া দিই যে আমি কালাপানির ফেরত আসামী; তাহা হইলে আর কিছু না হোক, থানায় একটু মাথা গুঁজিবার জায়গা পাওয়া যাইবে। তাহার পর ভাবিলাম আর সত্যনিষ্ঠার বাড়াবাড়ি করিয়া কাজ নাই। একবার সত্য কথা বলিতে গিয়া ত বার বৎসর কালাপানি ঘুরিয়া আসিলাম। শেষে বলিলাম—“আমি কালীঘাট হইতে আসিতেছি, শিয়ালদহ ষ্টেশনে যাইব।” কনষ্টেবল সাহেব আমার বগলের পুটুলি পরীক্ষা করিয়া অনেকক্ষণ আমার মুখের দিকে চাহিয়া জিজ্ঞাসা করিলেন—“তুমি কি উড়ে?” বহু কষ্টে হাত সঞ্চরণ করিয়া বলিলাম—“হাঁ”। তখন তাঁহার নিকট হইতে যাইবার অনুমতি পাইয়া তাঁহাকে একটা দীর্ঘ সেলাম দিয়া আবার রওনা হইলাম। সেই রাত্রে রাত একটার সময় গাড়ী চড়িয়া যখন শ্রামনগরের ষ্টেশনে আসিয়া পৌছিলাম, তখন রাত দুইটা বাজিয়া গিয়াছে। নৌকায় গঙ্গাপার হইয়া যখন নিজেদের পাড়ায় ঘাটে আসিয়া নামিলাম, তখন রাত প্রায় তিনটা; রাস্তা-ঘাট একেবারে জনশূন্য; টিম টিম করিয়া রাস্তার মোড়ে মোড়ে এক একটা কেরোসিনের বাতি জ্বলিতেছে। বাড়ীর সম্মুখে গিয়া দেখিলাম, বাড়ীর চেহারা সম্পূর্ণ পরিবর্তিত হইয়া গিয়াছে। জানালায় ধাক্কা মারিয়া ভায়াদের নাম ধরিয়া ডাকিতে ডাকিতে একটা জানালা খুলিয়া গেল আর ভিতর হইতে হর্ষোৎসেপ-চকল একটী সুপরিচিত বামা-কণ্ঠে প্রশ্ন হইল—“তুমি কে?” সঙ্গে সঙ্গে আর একটা জানালা খুলিয়া মা ঐ একই প্রশ্ন জিজ্ঞাসা করিলেন। যাহার আশা সকলেই ছাড়িয়া দিয়াছে, সে যে আবার ফিরিয়া আসিয়াছে, এ-কথা বিশ্বাস করিতে যেন কাহারও সাহসে কুলাইতেছে না।

বাড়ীর ভিতর চারিদিকে একটা ছুটাছুটি পড়িয়া গেল। এক পাল ছেলে আসিয়া চোখ মুছিতে মুছিতে আমার চারিদিকে ঘিরিয়া দাঁড়াইল। কান্না এয়া? ইহাদের কাহাকেও যে তিনি না। একটু ছোট ছেলে একটু দূরে দাঁড়াইয়া হাঁ করিয়া আমার মুখের দিকে চাহিয়া ছিল। আমার আত্মপুত্র তাহার সহিত আমার পরিচয় করাইয়া দিয়া বলিল—“এই

আপনার ছেলে।” যাহাকে দেড় বৎসরের রাখিয়া গিয়াছিলাম, সে আজ তের বৎসরের হইয়াছে।

আবার নূতন করিয়া সংসারের খেলা-ধর পাতিয়া বসিলাম।
ওগো খেয়াপারের কর্ণধার! এবার কোন্ কূলে পাড়ি দিবে?

স্বরাজ

[শ্রীমতী লীলা দেবী]

প্রাণের মাঝে যে প্রেম জাগে ফুরায় না তা ফুরায় না,
চোখেই শুধু যে প্রেম জ্বালা জুড়ায় না তা জুড়ায় না।
সবার স্মৃতি যে স্মৃতি শোভে শেষ নাই তার মরণেও,
নিজের যে স্মৃতি, অসীকতায় হারায় মেঘের মরণেও।
সবার লাগি বিলায় যে ধন বিভব যে তার অফুরণ,
নিজের তরে রাখলে পরে অভাব চিরই অপূরণ।
আপন জনেই বাসলে ভালো মৃত্যু আসে অনূত,
ভুবনকে যে বাসে ভালো প্রিয় যে তার অমৃত।
ছড়িয়ে দে'ভাই, ছড়িয়ে দে'ভাই, নিজের বলে রাখিসনে,
কাপাল হ'য়ে হ'না রাজা,—স্ব—রাজকে আর ডাকিসনে !!

আইরিস জাতি-শিল্পীর একজন

[শ্রীবারীন্দ্রকুমার ঘোষ।]

“The Nation & The Athenæum” কাগজের মে মাসের সংখ্যায়
আয়র্লণ্ডের “টেলিগ্রাফ”, কবি ও দেশনেতা জর্জ রাসেলের (George Russell) জীবন-কথা
বেরিয়েছে। আইরিশ জাতির জীবনবেদ যে কল্পজন বাণীর
বরণপূত্র মিলে উদ্ধার করেচেন কবি জর্জ রাসেল তার একজন। তিনি (A.E.) এ,
ই এই ছদ্ম নামে কবিতা লিখে মরা আয়র্লণ্ডে জীবনের সাড়া ও আইরিশ কাল-
চারের লুপ্ত জ্ঞান ফিরিয়ে এনেছিলেন। “He belongs to no party ; he
is not a leader of revolt ; he has no political following.”—“এ, ইর
কোন নিজের দল নাই ; তিনি যে কোন বিশেষ বিপ্লবের নেতা তা নন ;
তঁার পেছনে তঁার মতে সায় দেবার পক্ষপালও নেই।” অথচ আজ আয়র্লণ্ডের
জাগরণের দিনে এ, ইকে ভক্তি না করে এমন মানুষ ওদেশে নেই বললেই
হয়,—“Just because he is so far removed from all extremes,
except the extremes of passionate love for his country and
persistent reasonableness about it ; “মতের ও দলাদলির কচকচি
থেকে এমনতর মুক্ত মানুষ বলেই তঁার ওপর দেশবাসীর এত শ্রদ্ধা, তিনি
অসীম দেশপ্রেমের আধার হয়েও বুদ্ধিতে কতই না ধীর, কতই না সাবধানী”।

জর্জ রাসেল বক্তৃতা দিয়ে হট্টগোল বাধাবার ধার বড় একটা ধারেন না,
কিন্তু ডাবলিনে মার্কিন ধর্মঘটের সময়ে তঁার একটি বক্তৃতায়ই দেশ টলে
উঠেছিল। রাসেল কবি, চিত্রশিল্পী, ভাবুক অথচ পাকা অর্থনীতিবিৎ ও
কাগজের মানুষ। আইরিশ জীবনের গভীর সত্য তলিয়ে দেখে তঁার ছবিতে
কবিতায় এই আত্মহারা জাতীর আত্মধন ও আত্মবল খুঁজে পেয়েছেন ও
তঁারই স্পর্শে আয়র্লণ্ড আজ অজেয়। শুধু কি তাই? কো-অপারেটিভ প্রণা-
লীতে এই কবি-কর্মী সমস্ত দেশ জুড়ে হুধ মাখম স্কীর নবনীর ব্যবসায়
(creameries) গড়ে তুলে অন্নহীন চাষার ঘরে শ্রী ফিরিয়েছিলেন, তার
ফলে দেশের যে শ্রীবৃদ্ধি, যে শক্তিলভ ঘটেছিল তা' সমস্তটা বিপ্লব যুগ ধরে
পুলিশ ও পণ্টন লেলিয়ে ইংরাজরাজ ভেঙে ভেঙেও নিঃশেষ করে উঠতে
পারেনি। আপন জীবনে সত্যদর্শন ও কর্মগতুতা এক আধারে অপূর্ণ

অল্পমতায় ফুটিয়ে এই অসাধারণ মানুষ দেখিয়েছেন, যে, কবি ও কৰ্মী একই আধারে কি করে হয়, ইংরাজ সাহিত্যিক John Masefield বলেন মানুষ দুই রকমের আছে, শক্তির মানুষ ও আনন্দের মানুষ "capable of energy and those capable of ecstasy. But to A. E. belongs the joy of both. By energy he has sought to save his country; by ecstasy he continually saves himself" এ, ই নিজে আনন্দ ও শক্তির সমান আধার; তার অন্তরের শক্তিতে তিনি দেশকে মৃত্যু থেকে বাঁচিয়েছেন এবং সেই অন্তরের আনন্দ ধারায় স্নান করে তিনি নিজে অমর।

এ, ইর আকৃতি দেখেই বোঝা যায় তাঁর শক্তি বহুমুখী, সে আধারে যেন সবই সম্ভব। সেই দীর্ঘচ্ছদ দেহ শত্রু ও কেশে ঢাকা প্রকাণ্ড মাথা, সমস্ত দেহখানির গাভীর্য ও সংযম, সে নীল আকর্ণ চক্ষুর তেজ ও কল্পনা, সব কিছু যেন কেবলি এই কথাই বুঝিয়ে দেয়, যে, এ মানুষে অনেক বিপরীত ব্যাপারই কেমন করে যেন সামঞ্জস্য পেয়েছে; এ মানুষ যেন রুদ্রের তেজ ও দেবতার কল্পনায় গড়া। আয়র্লণ্ডে গত ছয় মাসের ব্রিটিশ অত্যাচারের সম্বন্ধে টাইমস্ কাগজে তাঁর পত্রগুলির ছত্রে ছত্রে অর্থনীতির কি গভীর জ্ঞান, কত ক্রোধ অথচ কত সহিষ্ণুতা মাথান! স্বন ডাবলিন, কর্ক, লিমারিক, গ্যালওয়ে, ট্রলিতে পুলিশ ও পণ্টনের পৈশাচিক উৎপীড়নে ইংরাজের মাথাও হেঁট হয়েছিল, তখন এ, ই শান্ত ধৈর্যে বলেছিলেন, "প্রত্যেক মানুষের মাঝে এমন কোন দেব অংশ লুকান আছে যাতে আঘাত দিলে সে আধারেও দয়া ধর্ম জাগে; মানুষে সেই দেবতা খুঁজে বার করাই হলো আসল কাজ।" সেই পাশব উৎপীড়নের কাল-সন্ধ্যায় যে মানুষ এমন কথা ভাবতে ও বলতে পারে সে আবার বিপ্লববাদী! জর্জ রাসেল আলষ্টারম্যান; কবি রুডিয়র্ড কিপ্লিং আলষ্টারকে গালাগালি দিয়ে কবিতা লেখায় তার উত্তরে এই তিনি লেখেন, "তুমি এই দেশের সম্বন্ধে মুখ, আর আমার সারা জীবন দিয়ে আমি আলষ্টারকে চিনি, এবং তাই থেকে আমি বলছি তুমি তোমার প্রতিভার এই অপব্যবহারে আয়র্লণ্ডের বিশেষ ক্ষতি করতে প্রয়াস পেয়েছ। পথে মারামারি দেখে যেমন গুণ্ডা পক্ষাপক্ষ বিচার না করে শুধু গুণ্ডামীর উত্তেজনার লোভে একটা যাহোক দলে যোগ দেয়, তোমারও এ ব্যবহার ঠিক সেই রকম। জগত তোমার কথা শোনে, আর, তুমি কিনা জগতের কানে বিষাক্ত অজ্ঞানের বাণী ঢেলে দিলে! ভগবান তোমার হাতে বাণীর হাতের বাণী তুলে দিয়েছিলেন, তুমি সে বাণী চিরদিন শব্দের

পক্ষ হয়ে ছুর্কলের অহিতে বাজিয়েছ। তুমি আপন শক্তি দিয়ে তাকেই ব্যথায় জর্জর করেছ, যে জগতে দুঃখী ও ছুর্কল কিন্তু ভগবান যার বল ও ভরসা, তুমি আঘাত করেছ কল্পনা, সত্য, স্থায় ও স্বর্গের বিকল্পে; তাই ভগবানও তাঁর দিব্য দর্শনের জ্যোতি তোমার হৃদয় থেকে সরিয়ে নিয়েছেন। তাই তোমার এ কবিতা তুচ্ছ প্রচারে সংবাদপত্রে খেলা কথা ছাড়া আর কিছুই হয় নি। তোমার কবির আসন ভগবানের আদেশে যুটে গেছে।"

এ, ইর প্রকৃতিতে শক্তি ও আনন্দের খেলা যেন ছায়াবাজির মতই ঘুরে ফিরে হয়। Imaginations and Reveries নামে তাঁর নতুন বইখানির ভূমিকায় রাসেল এই কথাই নিজে বলেছেন, "কলা শিল্পের আনন্দে ডুবে থেকেও আমি যেন সুখ পাইনি। কিসে যেন আমায় ভাঙা আইরিস জীবন গড়ে তুলতে জোর করে সেই কাজে টেনে নিয়ে গেছে। যতক্ষণ না আইরিশদের সঙ্গে ছুটে আয়র্লণ্ডের জীবন নতুন করে গড়তে কাজে না নেমেছি ততক্ষণ আমার বিবেক জ্ঞান যেন আমায় এই প্রেরণা দিয়ে দিয়ে জাগিয়ে রেখেছিল, ক্রমাগত এই পথেই ঠেলেছিল। এই দেশের মাটিতে আমার জন্ম, তাইতো আমায় দেশ প্রেমিক করেছে; কিন্তু যে পরমসম্মত ভগবানের অংশ এই দেহে বর্তমান সে ক্রমাগতই বুকের মাঝে যেন বলেছে, অনন্তের রাজনীতিই তোমার জীবনবেদ, সকল জাতির মানুষ যার সন্তান সেই বিশ্বরাজ তোমার রাজা। কোন একটা আন্দোলন জাগাতে গেলে গৌড়া না হয়ে উপায় নেই। আমার প্রকৃতিতে শক্তিই গড়েছে কিন্তু জ্ঞান কালাপাহাড় হয়ে যেন ক্রমাগত ভেঙেছে।"

জর্জ রাসেলের এই "Imaginations & Reveries" ১৯১৮ সাল অবধি গত পঁচিশ বৎসরের আইরিশ জীবনের অন্তর ও বাহিরের ইতিহাস। "We are shown once more the material value of those poets, scholars, essayists who began to infuse a new spirit into their nation about thirty years ago—the men who rescued old history and legend, the founders of the Gaelic League, the creators of the Irish Drama, the singers of lyrics most beautiful in the world, and the originators of Sinn Fein." এই বইখানি পড়লে চোখের সামনে আবার যেন দেখতে পাই তাঁদেরই, যে কবি ও চিন্তাশীল লেখকেরা ত্রিশ বছর আগে এই মরা আইরিশ জাতির মধ্যে জীবন সঞ্চার কর

ছিলেন, যারা লুপ্ত আইরিশ ইতিহাস ও পুরাণ পুনরুদ্ধারের বৃহৎ জীবন-ব্রত করেছিলেন, যারা গেলিক লিগের প্রতিষ্ঠাতা ও সিনফিনের মূল।

আইরিশ দেশমাতার স্মরণের মহিমা দেখাতে গিয়ে, রাসেল স্তুতিও করেছেন, আবার দেশের মেকি লেখকদের নিন্দারও ক্রটি করেন নি। কৃষি-যৌথ কারবারে দেশকে শ্রীবৃদ্ধিতে বড় করেও এ কবিপ্রাণ যেন স্মৃতি পায়নি—
“I hate to hear of stagnant societies who think because they have made butter well that they have crowned their parochial generation with a halo of glory.” “পূর্ণ জীবনে পক্ষুর মত এই সব কৃষি সমবায় সমিতি ভাল মাখমা তৈয়ারী করেই যখন ভাবে যে গ্রাম্য জীবন তারা যশের আলায় সার্থক করেছে, তখন আমার মনে স্বপ্নের উদয় হয়।” জর্জ রাসেল এ কথা বলতে পেরেছিলেন বলেই তিনি এত বড়; বিধাতা একটি গাছের মাঝে কত রূপ কত রস কত বর্ণগন্ধের ঐশ্বর্য দিয়েছেন, কিন্তু বিশ্বকবির প্রাণ তাই গড়ে যদি স্মৃতি পেত তাহলে এ বসুধা এমন অল্পপম করে তুলতো কে বল দেখি? সেই অমৃতত্বের আশ্বাদ বুক ভরে পেয়ে জর্জ রাসেল কর্ম করেও কর্মের অতীত। তাই তিনি আর এক জায়গায় লিখেছেন, “the end of life is not comfort, but devine being”. “জীবনের অর্থ ঐহিক স্মৃতি নয়, ভাগবত সত্যই জীবন।”

মহানুভূত

[অধ্যাপক শ্রীমোহিনী মোহন মুখোপাধ্যায়]

সতীর মরণে ব্যথিত ভুবন,
স্তুভিত মহাকাল,
স্নান হ'য়ে গেল স্নান আকাশে
রবির কিরণজাল।
স্পর্শ-স্বভগ বাতাস ভরিল
ভৈরব কালানলে,
মুচ্ছিত-তনু দিগ্‌বধুগণ
পড়িল সাগর-জলে।

২

লক্ষ্য বিহীন রবি শশি তারা
মরণ-বিষণ-গানে,
ছুটে উচ্ছল অতল-সলিল
তাণ্ডব সেই তানে;
পাণ্ডুর নভে ছুটে ধুমকেতু—
বজ্রের বিভীষিকা,
ধরণীর গায় কে মাখালে, হায়,
শোণিতের ললাটিকা!

৩

বিদ্যুত-হাসি ধ্বংস-আহবে
ফুটিছে ভীষণ হয়ে,
ত্রিভুবন বুঝি ভেঙ্গে খসে পড়ে
পাতাল-গর্ভে গিয়ে!
বাসুকীর ঘুম ভাঙিল আজি কি,
তাই কি নৃত্য আজ?
টুটিল আজি কি প্রকৃতির চির
শান্ত মধুর সাজ?

৪

গগন পবন ভরিয়া উঠিল
 প্রলয়ের 'হাঁহ'-রবে,
 ভূতপ্রেত আর দানব যক্ষ
 যোগ দেয় সে আহবে ।
 বিশ্বভুবন শৃঙ্খলা-হারা,—
 কোথা বিষ্ণুর জ্ঞান!—
 সতীর মরণে ভেঙ্গেছে আজিকে
 মহেশের মহাধ্যান !

৫

তাই বুঝি সেই ধ্যান-প্রশান্ত
 দুইটি নয়ন দিয়া
 তাপনীর তাপ-গৈরিক-জ্বালা
 বেয়ে চলে ফাটি হিয়া ?
 চারু জটাবার অস্ত শিখিল,
 কোথায় বাঘের ছাল !
 কোথা সে তৃপ্ত হৃথের গর্ভ
 ফণী-বিভূষণ-মাল ?

৬

ত্রিশূল-শিখরে চারু সতীদেহ—
 মধুমালতীর মালা,
 পাষণ কাটিয়া ধারা হয়ে ছুটে
 মহেশের মহাজ্বালা ।
 ক্ষেপা নটেশের প্রতিপাদক্ষেপে
 সারা ত্রিভুবন কাঁপে,
 প্রলয়ের কোলে ডুবিবে সকলি
 দক্ষের মহাপাপে !

৭

তাই তেঁ তাই প্রলয়োন্মত্ত
 রুদ্র-বিনাশ-বাণী,

স্বপ্ন-হুয়ারে স্তম্ভ দেবতা
 করে সবে কানাকানি ।
 শক্তি যে ছিল ধ্যানের আসনে
 জীবনের নিঃশ্বাস,—
 বিচ্ছেদে তার ব্যর্থ সকলি—
 কোথা মিলে আশ্বাস ?

৮

ধ্যানের সঙ্গে মিশেছিল কি সে
 শান্তি-আশীষ সম ?
 ভুবনে ভুবনে ছিল কি ভরিয়া
 তরুণ স্বপ্ন কম ?
 নয়নে ছিল কি অমৃত-বর্ষি
 হৃদয়ের রসায়ন,
 শশানচাঙ্গীর সংসার-দেবী—
 দেবতার উপায়ন ?

৯

শ্রিলোচন শিব হে মহাজ্ঞান !
 ফুরাল শশান-লীলা ?
 শেষ হ'ল তব হৃৎক-সাধন—
 জীবনের প্রেম-খেলা
 জীর্ণ গলিত শব দেহ—তবু
 বেঁধেছ বুকের মাঝে,
 নৃত্য-দোহল অঙ্গে অঙ্গে
 ঘোর উল্লাস রাজে !

১০

প্রেম বিনা বুঝি জ্ঞান নাই, ওগো,
 জ্ঞানের অভাবে লয় ?
 তাই কি জাগালে সতীর মরণে
 ধ্বংসের মহাভয় ?

একপল যারে ছাড়োনি জীবনে
মরণেও তারে নিয়ে—
উদার বিশ্বে ছুটিয়া চলিলে
ধ্বংসের গান গেয়ে ?

নারায়ণের পঞ্চ-প্রদীপ

সহজিন্দা

[শ্রীবিভূতিভূষণ ভট্ট]

যমুনা

হ্যাঁ—ভারী চালাকী, না?—জগৎশুদ্ধ লোকের বুদ্ধি আছে কেবল আমারই নেই—না? আমি মোটে হাসি, আর সবাই দেব দেবী, ঋষি মহর্ষি ছাই ভঙ্গ কত কি! আমার সঙ্গে কথা কইবার সময় কারুরই সমিহ করার দরকার নেই, লজ্জা করার দরকার নেই, যা ইচ্ছে বলেই হ'ল, যেমন করে ইচ্ছে হুকুম করলেই হল। আর আমি হইছি খেকী কুকুর, কাজও নেই অবসরও নেই। কেবল তু করে ডাকলেই ছুটে যাব। 'এঁর খোজ নাও,' 'এঁ কাজটা করবার জন্ত হুকুম নিয়ে এস,' 'এই ব্যাপারে যাতে এষ্টেট থেকে টাকা বেরোয় তার জন্ত দয়া করে বল'—আমি বুঝি তোমার আর সংসারের মধ্যকার টেলিগ্রাফের তার? না আমি তা নই।

কেন তা হব? আমি চিরদিন স্বাধীন, কেন আমি তোমার ছলভরা হুকুম মেনে চলব? দেখাও যেন কতই পরের হুকুমে চলছ, পরের দরকারে খাটছ, কিন্তু আমি তোমার মুখের কাপড় উঠিয়ে দেখে নিয়েছি—তা তুমি যতই তোমার ফটোই গোপন কর, আর যতই চাপকান চোগা লাগিয়ে আঁর্দালি সেজে বেড়াও। আমি তোমায় চিনিছি মশায় চিনিছি। ও সব চালাকী আর যার কাছে হয় কর গিয়ে, আমার কাছে ও সব চলবে না।

আমি ত' আর কোনো রকম চশমা চোখে দিয়ে বসে নেই, যে কাছে কিছুই দেখতে পাব না, শুধু দূরের দিকে চেয়ে দূর দেখবার আশায় বসে থাকব—আর নিকটের যা কিছু হাত ফসকে পালিয়ে যাবে? ও গো মশায় তা হবে না—আমার কাছে তা হবে না। আমি ধর্ম মানিনে, কর্ম মানিনে, শাস্ত্র মানিনে, মন্ত্র মানিনে। আমি শুধু মানি এই আমার বাইরের চোখ

ছুটোকে আর আমার অন্তরের চোখকে। এই তিনটেতে যা ধরা পড়বে তাই আমার কাছে সত্য, বাদ-বাকি সমস্তই মিথ্যা মায়া ভোজবাজী।

ঐ যে দিদির সন্ন্যাসী ম'শায় আজ কতদিন হতে না'সাগ্র বন্ধদৃষ্টি হয়ে বসে আছেন, মনে করছেন যে ওঁর ঐ চোখ ছুটো যে মাঝে মাঝে ইদিক-উদিক নড়ছে, এ বুঝি কেউ দেখতে পায়নি! হায় রে বোকা মানুষগুলো! বিশেষতঃ ঐ সব একাগ্র মানুষগুলো! ওরা যতই একাগ্র ওরা ততই যে বোকা—ততই যে স্বচ্ছ, এটা ওরাই সবচেয়ে কম জানে। ঐ যে আমার দিদিটা যিনি মনে করেছিলেন যে পরীক্ষা না করে কাউকে তিনি তাঁর অন্তরের মধ্যে, বিশ্বাসের মধ্যে, স্থান দেবেন না, তিনি যে আজ একাগ্র বিশ্বাসে ঐ সন্ন্যাসীকেই আশ্রয় করেছেন, এটাই ওঁর চোখে পড়ছে না। এমনি অন্ধ এই সব যোগী মানুষগুলো!

কিন্তু সবারই যোগ ভাঙছে! আমি ধীরে ধীরে দেখতে পাচ্ছি সবাই বিয়োগের মধ্যে দিয়ে গুণে পৌঁছছেন এবং শেষে ভাগে পৌঁছে আপনাকে খণ্ড খণ্ড করে বিলিয়ে দিতে পথ পাবেন না, এও আমি দিব্যচক্ষে দেখতে পাচ্ছি।

আর তুমি—তুমি যে কেঁচে গুপ্ত করতে এসেছ, তুমি মনে করেছ: যে বুঝি তোমার অন্তরের সন্ন্যাসীটা বুঝি তোমায় ছেড়েছে—তোমার বৈরাগ্যের ভূত বুঝি তোমার ঘাড় থেকে নেমেছে? নামেনি মশায় নামেনি—

কিন্তু সেইটেই ত' হুঃখ! কেন সে ভূত ছাড়ছে না তোমায়? কি চাও তুমি? কাকে চাও তুমি? কি মর্হী সত্য তোমার কাছে এখনো: অপ্রকাশিত আছে? ওগো তোমার মনের ঝুলির মধ্যে এখনো কোন মহাভিক্ষা এ সংসার এজগৎ দেয় নি? যে সত্যের লোভে তুমি তোমার ধর্ম কর্ম, যাগ যজ্ঞ, কৃচ্ছ বৈরাগ্য সব ছেড়ে দাসত্বের মিথ্যাকে অবলম্বন করেছ? সে কথা কি বলবে না—কখনো বলবে না, কাউকে বলবে না?

কিন্তু না বললেও ত' আমি ছাড়ব না। আমিও তোমারই চার পাশে ভ্রমরের মত ঘুরব; দেখি তোমার মুদিত মন-পদ্মের গোপন মধুটুকু চুরী করতে পারি কিনা। আমিও ছাড়ব না, এমনি করে আমার সমস্ত চেষ্টা, সমস্ত শক্তি নিয়ে তোমার মনের দ্বারে আঘাত ক'রব। দেখি সে হ্রয়ার কতদিন বন্ধ থাকে।

ব্যথাকে দেখিনে বলে, পিসীমা আমায় বকছিলেন, কিন্তু ব্যথাকে নিয়ে দিগন্ত দেখছি খুবই ব্যস্ত হয়ে পড়েছেন, তা হলে আর আমার দরকার কি? সংসারের কাজ? সেও ত' বেশ চলছে, কৈ কারুর পাতে কিছু পড়ে নষ্টও হচ্ছে না?—আর কেউ কিছু পেলেনা বলে কান্নাকাটিও ত' করছে না। যে সত্য-সত্যই কান্নাকাটি করছে, সে যদি তার এই ছায়াবিশ বছরের একটানা দুর্ভিক্ষ হৃদনের জন্তে মেটাবার চেষ্টা করে, তা হলেই এত কথা উঠবে? সংসারের এ কেমন বিচার!

না আমি এতদিন ধরে পেরেছি—আর যদি না পারি? তাতে তোমাদের এত কলরব কেন উঠবে? পাঁচজন কাণাকানি করছে? ককক গে, কবে সে কাণাকানিতে তোমরা কাণ দিয়েছ? তোমরা যে স্থপ্তিছাড়া অন্ধুত একটা সংসার গড়ে তুলেছ, এই যে তোমাদের ভারতছাড়া এই শ্রুতি-স্মৃতি-পুরাণ-ছাড়া বাড়ীটা, এই মনু-যাজ্ঞবল্কের দেশের বৃকের ওপর প্রতিষ্ঠা করেছ এর জন্ত কার মুখের দিকে তোমরা চেয়েছ? কবে চেয়েছ? কখন না।—তবে এই বাড়ীরই একজন হয়ে আমিই বা কার মুখ চেয়ে নিজেকে নিয়মের মধ্যে বেঁধে রাখব?

না—তোমরা যখন কোনো নিয়ম মান নি, তখন আমিই বা মানব কেন? তোমরা যখন একটা ছায়ার পেছনে ছুটছ, তখন আমিই বা ছুটব না কেন?

ছায়া! মিথ্যে! মরীচিকা! হোক মরীচিকা তবু আমি যাব। সেই দিকেই যাব।

মিথ্যে নয় এ সংসারে কোনটা? সারা সংসারই যে মায়ায় পেছনে ছুটছে। আমিই কেবল চূপ করে থাকব? এ কেমন বিচার তোমাদের?

মিথ্যে নয় গো ম'শায়রা মিথ্যে নয়। এ যদি মিথ্যে হয় তা হলে গাছে ফুল ফোটাও মিথ্যে, আকাশে চাঁদ ওঠাও মিথ্যে, প্রভাতে সূর্য ওঠাও মিথ্যে, জগতের রূপ রস গন্ধ স্পর্শ সবই মিথ্যে।

মনে মনে সবাই জানে—কিছুই মিথ্যে নয়, তবু জোর করে বলবে মিথ্যে—মায়া—ভেঙ্কি—ভোজবাজী। এই মিথ্যের ধূয়োটাকে কোন মিথ্যেবাদী জগতে এনেছিল? তাকে যদি হাতের গোড়ায় পেতাম তা হলে তার মাথাটা ধরে দেয়ালে ঠুকে দিয়ে জিজ্ঞাসা করতাম, এই মিথ্যের আঘাতটা কেমন লাগছে?

কিন্তু তোমার আবার এ কি নূতন হুজুগ উঠল? তুমিও আবার কাজ-কর্ম ফেলে মাঝে মাঝে ঐ মিথ্যের রাজা সন্ন্যাসীজীতির কাছে ধরা দিতে আরম্ভ করলে কেন? আমার যে ভয় করছে।

ভয়? হ্যাঁ ভয় বৈ কি। নিজের কাছে গোপন করে দরকার কি? হ্যাঁ আমার ভয় করছে। তুমি অমন করে আজ আমার ঐ বুদ্ধদেবের ছবিখানার দিকে চেয়ে দাঁড়িয়েছিলে কেন? কি দেখছিলে ঐ অপটু হাতের অসম্পূর্ণ শিল্পটার মধ্যে? তোমার ঐ অমন সুন্দর উজ্জ্বল চোখছটা আজ অমন মরার মত আমার দিকে চাইলে কেন? আজ কেন কোনো আদেশ আমি পেলাম না? কেন আজ তোমার কথার মধ্যে তোমাকে পেলাম না! কোন দূর বন-বনাস্তরে তুমি আজ মুচ্ছিত হয়ে পড়ে আছ? তোমায় যে আজ কিছুতেই সেখান থেকে তুলে আনতে পারলাম না? কেন পারলাম না? কি আমাতে আজ ছিল না? কোন বস্তুর অভাবে আজ তোমায় আমার দিকে ফেরাতে পারলাম না? কি নেই আমাতে, তুমি যদি অমনি করে মুখ ফেরাও তা হলে সমস্ত জগৎ যে মুখ ফেরাবে—তা হলে কি নিয়ে থাকবো? আমি যে এখন সব হারিয়ে বসে আছি! শুধু একটা আশায় আমি যে সব আশা ত্যাগ করেছি। এখন মুখ ফেরাও—উঃ! না, তা যে ভাবেও পারি নে!

আমি ত' আশা করাই' ছেড়ে দিয়েছিলাম। দিদি যেদিন সব ছেড়ে আশা-কেই আশ্রয় করলে, সেইদিন হ'তে আমি সব ধরে আশাকেই ছেড়েছিলাম, কিন্তু তুমিই ত আশাকে জাগিয়ে দিয়েছ প্রভু! ওগো আমার না চেয়ে পাওয়া ধন, ওগো আমার অকালের মেঘ, আজ যদি তুমি আবার আকাশে মিলিয়ে যাও, তাহ'লে কি করে বাঁচব? না—না—তা পারব না, আমি তা পারব না। তোমায় ফিরতেই হবে। তুমি যখন এসেছ, যখন এ জীবনাকাশে আপনি এসে উদয় হয়েছ, তখন তুমি আমারই। তোমায় আর আমি গোপন হতে দেব না, কিছুতেই নয়। আমার যা কিছু আছে সব দিয়ে তোমায় আমার আকাশে বেঁধে রাখব। একবিন্দু জলও যদি ঐ মেঘ হতে না পড়ে যদি ক্রমাগত বিদ্যুৎ আর গর্জনই গুনতে হয়, যদি বজ্রাঘাতও নেমে আসে, তবু এ মেঘ আর মিলতে পাবে না। এ মেঘকে আমি আমার সমস্ত কেকা দিয়ে সমস্ত কলাপের বিস্তার করে, সমস্ত কদম্ব ফুটিয়ে ধরে রাখবই রাখব।

কিন্তু এত যে জোর করে কাল ঐ কথাগুলো লিখিছি এ জোর আমার থাকছে কৈ? মনে হচ্ছে যেন কোন অজানা দিক হতে কেমনধারা যেন হাওয়া বইছে। আমার মেঘমালাও যেন চঞ্চল হয়ে উঠেছে। তার নয়নে যে গভীর ছায়া দেখে এলাম, এ ছায়া কিসের? কার এ ছায়া? এ ছায়া কোথায় ছিল এতদিন?

কি জানি কোথায় ছিল—কিন্তু ছায়া যে জেগে উঠেছে, বাতাস যে লেগেছে আমার মেঘে! কোন দিগন্ত হ'তে অজানা আলো এসে আমার মেঘকে রাঙিয়ে তুলছে, ছলিয়ে তুলছে, ফুলিয়ে তুলছে? কিন্তু বর্ষণ হবে কোন দিকে, কোন উয়র দেশে, কোন মরুপ্রান্তরে? কদম বনের ঘনপাতার ওপরে না শুকনো নদীর বালুর চরে? কোথায় এ মেঘ সরে চল!

মন যে আমার কেঁপে উঠেছে—দূরে কি আবার চাতক ডাকছে নাকি? কোথায় গেল আমার কেকা, কোথায় আমার কলাপ! আনো—আনো—সব আন—বাত্ত আন, নৃত্য আন, আন গান, আন ফুল, আন হাসি, আন বাঁশী বা কিছু আছে সব আন—মেঘকে আমার বাঁধতেই হবে। [উপাসনা, ভাদ্র]।

নারায়ণের-নিকষ মণি

শ্রীশ্রীহৃদয় তত্ত্বসার--শ্রীরাধানাথ কাবাসী প্রণীত--১ম খণ্ড--১৯০ পৃষ্ঠা--মূল্য ২।০ টাকা। ইহা দ্বারা বৈষ্ণব জগতের একটা অভাব দূরীকৃত হইল। বৈষ্ণব ধর্মে এরূপ ধরণের পুস্তক আর একখানিও দেখিতে পাওয়া যায় না। ইহা গ্রন্থকারের এক অভিনব সৃষ্টি। এই গ্রন্থে বৈষ্ণব গণের ভজন সাধনোপযোগী নিত্য পাঠ্য, নিত্য স্মরণীয় ও নিত্য কীর্তনীয় অনেক বিষয় সন্নিবিষ্ট হইয়াছে এই পুস্তক বটতলা বা অস্ত্রস্থানের বৈষ্ণব গ্রন্থের স্থায় ভ্রম পরিপূর্ণ নহে। ইহা উৎকৃষ্ট কাগজে উত্তমরূপে মুদ্রিত। তিনি বিপুল পরিশ্রম করিয়া পূজ্যপাদ মহাজনগণের গ্রন্থ সমূহ হইতে রঙ্গ সকল সংগ্রহ করিয়া একত্রীভূত করিয়াছেন। প্রার্থনা, প্রেমভক্তি চন্দ্রিকা, মনঃশিক্ষা পাষাণ দলন, সূচক, পাণ্ডব গীতা, রাসগীতা, জন্মোপবাস ব্রত কথা, রাসপঞ্চা-ধ্যায়ী, বহু সংখ্যক অষ্টক স্তোত্র, ধ্যান ও প্রণাম মন্ত্র, 'দৌহাবলী, বৈষ্ণববাভিধান ইত্যাদি অনেক বিষয় সংগৃহীত হইয়াছে। প্রাপ্তিস্থান হিতসাধন মণ্ডলী, ধাত্তকুড়িয়া, ২৪ পরগণা ও বল্লভ এণ্ড কোং ১০১ নং কর্ণওয়ালিস স্ট্রীট শ্রামবাজার, কলিকাতা।

আর্ত

[শ্রীসাবিত্রীপ্রসন্ন চট্টোপাধ্যায়]

ভগবান ভগবান!
আর্ত পীড়িত হৃকল ভীত—
হৃঃহরে কর ত্রাণ;
কণ্টক বনে বঞ্চক মনে
লয়ে যায় বারে বার,
শ্মানি আর শ্মানি ঘরে তুলে আনি
কঙ্কর ভারে ভার;
বুকে তুষ জালি, গায়ে মাখি কালি
চরণে ক্ষতের রেখা,
চরণ চলে না, নয়ন গলে না
একি ভাগ্যের লেখা!
মোহ-মদিরায় প্রাণ যায় যায়
তবুও দীর্ঘ প্রাণ,
বুক চিরে চিরে, চিৎকারি ফিরে
জাগায় জীর্ণ জ্ঞান!

ভগবান ভগবান!
পারিনাক আর বহিতে এ ভার
জীবনের অবসান;
পলে পলে মরি অন্তর ভারি
উঠে মরণের ব্যথা,
কেমনে তুলিব চরণে দলিব
গত জীবনের কথা?
কালানল সম মনানল মম
তুলি লেলিহান শিখা,
ললাটে আমার লিখিল হাজার
মসি-কলঙ্ক লিখা;

নারায়ণ

কার মুখ চাব সাঙ্ঘনা পাব
কে এমন গরীয়ান,
পরশে তাহার জীবন আমার
ফিরে পাবে হত মান ?

ভগবান ভগবান !
কোথা পথ আছে শুধু আগে পাছে
গর্জিছে অপমান !
অঁধার অঁধার পথ দেখা ভায়
স্বন স্বন বহে বায়,—
নীরবতা মাঝে বড় বৃকে বাজে
কেঁপে কেঁপে ওঠে স্বায়,
প্রতি পায় পায় কঙ্কর ঘায়
রক্তের ধারা ছোটে ;
পায়ের তলায় মাটি সরে যায়,
হ্রস্বল দেহ লোটে ।
আপনার হাতে রজনী ও প্রাতে
হলাহল করি পান
কেবল যাতনা নাহি সাঙ্ঘনা
গেল—জলে গেল প্রাণ !

ভগবান ভগবান !
আজি চাহি তব হুর্জয় নব
ভৈরব অবদান ;
এস সম্মুখে দাঁও এই বৃকে
তব অস্ত্রের জালা,
তোমার গলার ওই ফণিহার
কার কঠোর মালা,
শেষ করি মোর যন্ত্রণা বোর
নারা জীবনের মানি,

জিউজিৎসু

তোমার হাতের দিবস রাতের
বেদনারে বড় মানি !
দাঁও দাঁও বৃকে সব হাসিমুখে
তব বজ্রের দান
চাহি নির্ভর, এই ভয়াতুর
জীবনের অবসান ।
ভগবান,—ভগবান !

জিউজিৎসু

[শ্রীহেম সেন]

অনেকেই জানতে চাচ্ছেন “জিউজিৎসুটা” কি ? ইহা একটা জাপানী
বিদ্যা । আড়াই হাজার বছরের অধিক কাল থেকে জাপানে এই বিদ্যার চর্চা
হয়ে আসতে ।

জিউজিৎসুর উদ্দেশ্য শরীরকে সুস্থ সবল এবং স্বাভাবিক অবস্থায় রেখে,
আকস্মিক অথবা অল্প রকমের লৌকিক বিপদ আপদে আত্মরক্ষার এমন
কতকগুলি কৌশল শিক্ষা দেওয়া, যাতে অপেক্ষাকৃত হ্রস্বল এবং ক্ষীণকায়ও
শক্তিশালী প্রতিদ্বন্দ্বীকে তাহারই শক্তি এবং স্বাভাবিক বা ইচ্ছাকৃত
অঙ্গসঞ্চালনের এবং শরীরের ভারকেন্দ্রের চ্যুতির উপর অতি সামান্য শক্তি
কৌশল প্রয়োগ করিয়া, এমন অবস্থায় লইয়া যাওয়া, যেখানে বা যে অবস্থায়,
সে সম্পূর্ণ অকর্মণ্য হয়ে যাবে, কিছু করবার শক্তি তার আদৌ থাকবে না ।
জিউজিৎসুর অনেক কৌশল এমনি দেখতে কিছুই নয়, মনে হয় বুঝি একজন
নিজে ইচ্ছা করেই অস্ত্রের কাছে ধরা দিয়ে থাকে, এবং ঐ অবস্থায় গিয়ে,
ইচ্ছা করেই নট নড়নু চড়নু হয়ে থাকে । কিন্তু একবার পরখ করেই বোঝা
যাবে যে ঐ অবস্থায় কেহ স্বইচ্ছায় যেতে চায় না ; এবং ঐ অবস্থায় গিয়ে পড়লে
কিরকম ভীষণ অকর্মণ্য দশা হয় তাও আর আয়াস করে বুঝতে হয় না ।
কখনও একেবারে কোণ ঠাসা অবস্থায় পড়লেও এমনি অদ্ভুত কৌশল
অনায়াসে প্রয়োগ করে শক্তিশালী আক্রমণকারীকে এমনই নিঃশক্তি ও
অভিভূত করা চলে, যে ফল দেখে বাস্তবিকই মিজের আশ্চর্য হ'তে হয় ।

কুস্তী সকলে শিখতে পারে না। কুস্তী শিখতে ভাল স্বাস্থ্য এবং যথেষ্ট শারীরিক শক্তি সামর্থ্যের প্রয়োজন হয়। তা'ছাড়া সকলের পক্ষে কুস্তীটা উপযোগীও নয়। কুস্তীতে গুরুতর শারীরিক পরিশ্রম হয়। যেখানে সেখানে তা শেখাও যায় না। জিউজিৎসুতে কখনও গুরুতর পরিশ্রমের সম্ভাবনা নাই, বিশেষ বিশেষ খাদ্য পেষেরও প্রয়োজন হয় না। জিউজিৎসু কুস্তী নয়।

জিউজিৎসু দুর্বল ব্যক্তি এবং স্ত্রীলোকেরাও অল্পায়াসে শিখতে পারেন। শরীরটাকে জিউজিৎসু শিক্ষার উপযোগী করবার জন্য যে প্রাথমিক ব্যায়ামাদির ব্যবস্থা আছে তাহা শরীরের পক্ষে মহোপকারী। এই ব্যায়াম প্রণালী সর্বত্র অভ্যাস করা চলে। শিশু হইতে বয়স্ক পর্যন্ত স্ত্রী পুরুষ সবাই ইহা অভ্যাস করিয়া, শরীরকে স্বাভাবিক সুস্থ অবস্থায় লইয়া যাইতে পারিবে। ইহা ভিতরে ভিতরে এমনই একটা পরিবর্তন ঘটাইয়া দেয় যে কখনও আলস্য জন্মিতে পারে না। আলস্যকে আমরা সাধারণতঃ, একটা স্বভাবদোষ বলে ধরে নিলেও উহা যথার্থতঃ শারীরিক রোগ বিশেষ। ঐ প্রাথমিক ব্যায়াম-প্রণালীটার অভ্যাসে শরীরের সকল মাংসপেশী, মায়ু এবং সকল আভ্যন্তরীণ যন্ত্র সকল সুস্থ ও সবল হয়ে, স্বাভাবিক অবস্থায় থাকে বলে, অর্শ ও অজীর্ণদোষমূলক নানা রোগ এবং সকল রকমের স্নায়বিক বিকারজনিত রোগের হাত থেকে সহজেই আত্মরক্ষা করা যায়। ইহা অভ্যাস আরম্ভ করে কয়েক দিনের মধ্যে শরীরে নূতন ক্ষুধা ও আনন্দ পাওয়া যায়। এই ব্যায়ামাভ্যাসেও আনন্দ আছে।

আমাদের জাতকে ভিতরে বাহিরে সুস্থ, সবল ও প্রবল করে তুলতে জিউজিৎসুও যথেষ্ট সাহায্য করতে পারে। আমাদের স্ত্রী পুরুষ, বালক বালিকা, শিশু সকলেরই ইহা শিক্ষা করা একান্ত আবশ্যিক। প্রত্যেক পরিবারে, প্রত্যেক বিদ্যালয়ে বা বিদ্যালয়বন্দী এই নির্দোষ, আনন্দদায়ক, মহোপকারী, সহজ ব্যায়াম প্রণালী শিক্ষার ব্যবস্থা করা উচিত।

জিউজিৎসু অভ্যাস করতে কোন যন্ত্রপাতি বা উপকরণের আবশ্যিক হয় না কিন্তু শরীরতত্ত্ব বিষয়ক জ্ঞানের দরকার হয়।

জাপানে স্থূল সমূহে প্রত্যেক বালক বালিকাকে জিউ জিৎসু শেখান হয়। জাপানে স্ত্রী পুরুষ প্রত্যেককে জিউ-জিৎসু শিখতে হয়। বর্তমান জাপান-সম্রাট যখন যুবরাজ, তখন তাঁকেও সাধারণ ব্যায়ামাগারে জিউ জিৎসু শিখতে হয়েছিল। মোটের উপর, জাপানীদের মত এমন সুস্থ আর কোন জাত? আর কোন জাতের মধ্যে স্নায়বিক দৌর্বল্য এবং বিকার জনিত রোগ এত বিরল?

ইহার মূল কারণ জিউ জিৎসু শিক্ষা। (Jiu-Jitsu) জিউ-জিৎসু ভাল করে শিখতে অন্ততঃ চারি-বৎসর সময় লাগে। তবে অল্পকালের মধ্যেই (যেমন তিন চারি মাসে) বাছিয়া বাছিয়া অত্যাবশ্যকীয় কতকগুলি কৌশল শিক্ষা দেওয়া যাইতে পারে। সঙ্গে সঙ্গে এমন কতকগুলি তত্ত্ব শিখাইয়া দেওয়া যায় যাহাতে নিয়মিত অভ্যাসে যথেষ্ট ফল লাভ হইবে।

শুধু হাতের ভিন্ন আর দুই-রকম জিউ-জিৎসু আছে, সচরাচর সেগুলির কোন প্রয়োজন হইবে না।

শুধু হাতেরটাই শ্রেষ্ঠ। জিউ-জিৎসু এমনই অদ্ভুত একটি বিদ্যা যে ইহার সম্বন্ধে সকল কথা পড়ে লেখা অসম্ভব!

অমর্কের বিদায়।

[অমর্ক]

দৈত্যপতি আমায় দিয়ে

চলবেনা এ পাঠশালা।

থাকলো পড়ে' বেজ রজু

থাকলো তোমার আটচালা।

খালি পড়ে' থাকবে কেন!

সমারোহে এবার বেন

খুলে দিও তায় শিশুপাল-

বধ নাটকের নাটশালা।

যে নাম শুনে শ্রবণ রুধে

দাক্ষিণ্যে কাঁপতে থাকে।

সে মধুর নাম গলা টিপে

বন্ধ করতে পারবে না কৈ।

কেবল আপন ভোবামোদী

শুনতে এত ব্যাকুল যদি

দেশের বত ভাট জুটিয়ে

না হয় খোলো আটশালা ॥

অহকারে মত্ত তুমি
 ভাবছ নিজে অমর বৃষি,
 বিশ্ব তরই নেইক মরণ
 এক হরিনাম বাহার পুঁজি।
 রুদ্রদেবের প্রথর নখর
 ছিঁড়বে ভোগায়তন জঠর
 সুরকি হয়ে উড়বে তোমার
 বালাখানা আট-তাল।

শিল্প ও স্বদেশী *

[শ্রীনারদরঞ্জন মজুমদার]

স্বদেশী যুগে স্বদেশীর শিল্পের মর্যাদা ও শিল্পের আদর্শ আমরা ঠিক বুঝি নাই স্বদেশীর শিল্পের পুনঃ প্রতিষ্ঠার প্রয়োজনীয়তা সম্বন্ধে আজ প্রকৃত দেশের অন্তরাঙ্গা সচেতন হয়েছে একথা নিঃসংশয়ে বলা যায়। ভারতীয় চিত্রকলার প্রতি ধীরে ধীরে ভারতবাসীর দৃষ্টি আকৃষ্ট হয়েছে; লুপ্তপ্রায় শিল্পের পুনরুদ্ধার-কল্পে দেশে শিল্পীও গড়ে উঠছে। তাই বড় আশা হয়, আমাদের ঊনবিংশ শতাব্দীর মোহ নিজা সত্য সত্যই টুটেছে, আমরা আবার লুপ্ত রত্নের সন্ধান উদ্যোগী হয়েছি। আমাদের হৃদয় এবার যথার্থ পথের সন্ধান পেয়েছে, তাই আর সেদিনকার সে অগ্নিময়ী জালা নেই, তৎপরিবর্তে আছে শান্ত, সুদৃঢ়, নির্ভীক কর্তব্যের স্নিগ্ধাঙ্কল আলোকস্তম্ভ! যদি আকস্মিক কোন প্রাকৃতিক বিপর্যয়ে ঊনবিংশ শতাব্দীর সভ্যতা পৃথিবীবক্ষঃ হ'তে অপসারিত হয়, তাহলে ঐ প্রস্ফলিত আলোকস্তম্ভই মনে হয় পুনরায় নবীন সভ্যতার পথ প্রদর্শক হবে।

দীর্ঘ শতাব্দীর অবহেলায় আমরা যা হারিয়েছি তা কেবল ভারতের শিল্পই

* কুমার আনার Art & Swadeshi শীর্ষক গ্রন্থের অন্তর্ভুক্ত লিখিত। লেখক।

নয়, ভারতের শিল্পী পর্যন্ত ইহাই আমাদের Double loss both physical and spiritual (Havell)। যে ভারত শতবর্ষ পূর্বে সৌন্দর্যের উপাসক ছিল, আজ সেই ভারত হতস্ত্রী। ভারতের শিল্প অবহেলায় নষ্ট প্রায় হয়েছে। প্রধাপতঃ আমাদেরই আত্ম-বিশ্বাসের অভাবে আমাদেরই মোহাবিষ্টতার কলে। সস্তা বলে ভারতীয় জিনিষ বাজারে চালাবার চেষ্টা ভারতবর্ষ কোনদিন করেনি। ভারতের মসলিন, ভারতের সামগ্রী যেদিন রোমে যেত সেদিন তার আদর ছিল সৌন্দর্যেরই জন্ত, সস্তা বলে নয়। মুসলমান শিখিঙ্গয়ী বীরগণ ভারত লুণ্ঠন করে ভারতের শিল্পই নিয়ে যাননি, ভারতের শিল্পীও স্বদেশে নিয়ে গিয়েছিল। সস্তার (cheapness) পরিবর্তে সুন্দর বলে (Beautiful) সব সামগ্রী দেওয়া নেওয়ার করার প্রয়োজনীয়তা বুঝতে হবে। সস্তাই কোন দ্রব্যের একমাত্র গুণ নয়! আমাদের মনে রাখতে হবে Industry without art is Brutality,—প্রতিযোগিতার ক্ষেত্রে কোন ভারতবাসী একথা বেন কোনদিন না ভুলে যায়। সুন্দর কি? চক্চকে যা, ক্ষণভঙ্গুর যা, তা সুন্দর নয়—সৌন্দর্যের জ্ঞান নেই যার, সেই ওরুপ সৌন্দর্যে ভোগে—কাঁচের বাসনের কারুকার্য খাগড়াই বাসনের কারুকার্যের সমতুল্য হয় না। যার প্রকৃত সৌন্দর্য-জ্ঞানের অভাব সে আবার ফ্যাসান্ বলে যা তা অহুকরণ করে, এখানে বিচার বুদ্ধির সম্পূর্ণ অভাব; বিলাতী অথবা তাহার অহুকরণে দেশী 'এসেক্স' উচ্চমূল্যে ব্যবহার করা চলে, অথচ আতর ব্যবহার করা চলে না! সুন্দর কি? দীর্ঘকাল স্থায়ী, ব্যবহারোপযোগী, হিতকারী এবং যা আমাদের জীবনের সঙ্গে প্রকৃত ঋণ খায়, তাই সুন্দর। মূল্যের ভারতম্য কোন দ্রব্যের একমাত্র দোষগুণের পরিচায়ক নয়। স্বদেশীয় শিল্পোন্নতি স্বদেশবাসীর পূর্ণসহায়-ভূতি ও যত্নে পুনরায় গড়ে উঠতে পারে। যারা স্বদেশীর শিল্পোন্নতির বিকল্পে 'সস্তা হওয়া চাই বলে এখনও ওজর আঁতি তোলেন ও ক্ষমতার অভাবে শিল্পের উন্নতি করতে পারেন না বলেন, তাঁদের কাছে আমার জিজ্ঞাস্য তাঁরা ক্ষমতা অর্জনের কতটুকু চেষ্টা করেন আর কেনই বা কলেজী পড়া ও কেরানীপত্তি করবার মোহ ছাড়তে পারেন না?

শত বর্ষ আমরা কেবল স্বদেশী বর্জন ও বিদেশী গ্রহণের মস্ত্রে যে দীক্ষা গ্রহণ করেছি সে বিষয়বস্তুর বিষফল একেবারে ত্যাগ করতে পারব কেন? মানুষ চোখ মেলে আজ যে কাজ করে বসে, কাল চোখ বুজে তা তোলবার যত চেষ্টাই করুক না কেন, কর্মফল একদিন না একদিন পূর্ণ হয়ে সুখখোর মধা-

জনের মত তার প্রাণ্য কড়ায় গণ্ডায় বুজে নেবে! আমরাও উনবিংশ শতাব্দীর মোহভঙ্গের পর স্বদেশী গ্রহণ ও বিদেশী বর্জনের ব্রত গ্রহণ করে ছিলাম— কিন্তু সহস্রা স্বদেশী ব্রতের মর্ম্ম দেশবাসী উপলব্ধি করতে না পারার (অথবা দেশের sentimentalism টুকু চতুর ব্যবসায়ী তার ব্যবসায়ের ভাঙিয়ে নেবার ফলে) “স্বদেশী” নাম নিয়ে এলুমিনিয়ামের বাসন’ থেকে মিলের কাপড় পর্যন্ত স্বদেশী প্রস্তুত করতে যত “লিমিটেড কোম্পানী” হয়েছে ততই তার সেমার কিনতে দেশের লোক সঙ্কিত অর্থ রূপান্তরে দেলে দিয়েছে—ঐ বিদেশী মত স্যাক্তরী করে, দেশের দরিদ্রকে কৃতদাস wage-slavs করে প্রচুর ডিভিডেন্ট লাভ করবার উদ্দেশ্যই তার মূল প্রেরণা ছিল এবং এখনও যে নাই একথা বলা চলে না। এর নাম যদি ‘স্বদেশী ব্রত গ্রহণ’ হয় আর নিরীচাদের ‘বিদেশী সত্যজ্ঞ’ গ্রহণ যদি ‘বিদেশী বর্জন’ হয়, তবে আমাদের Boycott এর আন্দোলন যথার্থই হাস্যকর এবং সে ‘স্বদেশী’ দীক্ষা গ্রহণ বিফল হয়েছে। এলুমিনিয়ামের ব্যবসায়ীর উচ্চ ডিভিডেন্ট লাভ দেখে আর স্বদেশী মিলের উন্নতি দেখে যদি স্বদেশীর উন্নতি বুঝতে হয়, তাহলে সে উন্নতিতে আমাদের হৃদয় আরও হীন হয়ে পড়েছে এবং সেই ভাবে স্বদেশীর উদ্দেশ্য ব্যর্থ হয়ে গেছে। এবং সেই জল্পাই মনে হয়, যে কারণেই হ’ক দেশের যতগুলি যৌথ কারবার ক্ষেত্র হয়েছে সেগুলি দেশের মাটিতে কোনমতে টিকে থাকতে না পারতেই বিনষ্ট হয়েছে—তাহাতে বিশেষভাবে প্রমাণিত হয়েছে যে, দেশের জনসাধারণ দরিদ্র ও মৃতকল্প হলেও ইউরোপীয় ফ্যাক্টরীর ক্ষমকরণে আজও কৃতদাস হয়ে ওঠেনি। তারা মাল্টিম, মাল্টিমের ডাকে আবার সাজা দিয়েছে, চাবুকের শাসন তারা গ্রহণ করেনি।

আমরা তে কোন মিলন বৃহৎ ভাবে চেষ্টা করিনি স্বদেশের তাঁতির উন্নতি কেমন করে হয়, কাঁটার বাসন ব্যবসায়ীর জাত-ব্যবসায় কেমন করে রক্ষা হয়; নিরীচাদের ‘বিদেশী গ্রহণের’ ফলে আজ প্রায়শ্চিত্তের দিন এসেছে, তাই নিত্যব্যবহার্য দ্রব্যও হারিয়ে বসেছি—দেশে আর শিশুর খাওয়া গোছক মেলে না, শিশুভরা ‘বিলিতি ফুড’ উচ্চমূল্যে কিনতে হয়; উচ্চমূল্যে বসন-চূষণ সবই কিনতে হয়—নইলে ‘ভদ্রতা’ রক্ষা হয় না। প্রতিকারের প্রথম উঠলে তাঁরা উপেক্ষা প্রদর্শন করেন আর প্রকৃত প্রায়শ্চিত্তের কথায় তাঁরা উপহাস করেন।

আমার মূল বক্তব্য এই যে, স্বদেশী শিল্পের উন্নতিকল্পে এমন কি ‘নিরীচাদের’

স্বদেশী গ্রহণ ও বিদেশী বর্জন ভাল নয় অর্থাৎ আমাদের যেটুকু গ্রহণ ও বর্জনের ক্ষমতা সেইটুকু বিচার করে নিতে হবে। নিরীচাদের ‘স্বদেশী স্বদেশী’ করে একটা উন্নাদনায় মেতে স্বদেশীর উদ্দেশ্য বিফল হয়েছে। ‘মিলের’ পরিবর্তে চরকা ও তাঁত যদি গত পনের বৎসর ধরে চলত, আমাদের বস্ত্রীভাব নিশ্চয়ই যুঁচত। আমাদের বস্ত্রীভাবই পূর্বাপেক্ষা বেশী হয়েছে এমন নয়, আমাদের আত্মবিশ্বাসের অভাবও পূর্বাপেক্ষা বেশী হয়েছে; তাই আজ ধারা বক্তৃতার জোড়ে মুখে বলেন, “বিলিতি কাপড় পরা অপেক্ষা উলঙ্গ থাকা ভাল” তার উত্তরে তাঁদের স্বয়ং সে ভাগের আদর্শটুকু প্রদর্শন করতে বলি না, আমার এই আক্ষেপ হয় “দেশের সে মনের জোর আজ কোথায়?”

স্বদেশীর জোয়ার-ভাটা আমাদের জীবন-নদীতে এমন বার বার আসবে; কিন্তু এবার এ ভাবের জোয়ারে তর্ক করে বিচার করে নৌকা ভাসাতে হবে। নিরক্ষর হয়ে বসে থাকলেও নিস্তার নেই কর্ম করতে হবে; কিন্তু তার পূর্বে পথের সন্ধান স্থনির্দিষ্ট হওয়া চাই।

অতএব আমাদের পারিপার্শ্বিক অবস্থার কথা সর্ব্বাঙ্গে স্মরণ করতে হবে। “No lovely things can be produced in conditions that are themselves unlovely.” আমাদের বর্তমান সব নগর Birmingham কি Paris এর suburb বলে নাকি অনেকের ধারণা হয়; অতরাং এরূপ ধারণার পরিবর্তে যাহাতে বাবাণসী অথবা যে কোন পবিত্র হিন্দু নগরীর আদর্শে পুনরায় ভারতীয় নগরের প্রতিষ্ঠা হয় তাহা সর্ব্বাঙ্গে আবশ্যিক। সেদিন দক্ষিণ আমেরিকার ব্রিটিশ গায়না হ’তে একটা ডেপুটেশন ভারতবর্ষে এসেছিল—তারা চার শিক্ত ভারতবর্ষকে সে দেশে নিয়ে যেতে; সেই ডাক পেয়ে শত শত ইংরাজ শিক্ত যুবক স্বদেশ ছেড়ে সে দেশে যাবার জন্ত ব্যগ্রতা প্রকাশ করে আবেদন করেছেন। তাতে East and West এর মিলন হয়েছে বলে ধারা উৎফুল্ল হতে চান, তাঁদের ‘কবির স্বপ্ন’ ভাঙতে আমি ইচ্ছুক নই। আমাদের একটা আত্মনির্ভরতার একান্ত অভাব এতে প্রকাশ হয়ে পড়েছে নাকি? কিন্তু আমার বিশ্বাস, দেশের মধ্যে নূতন নূতন Settlement গড়বার ডাক পড়লে আমরা প্রকৃত পথের সন্ধান পাব। যে ভুলে বিগত শতাব্দীতে ভারতবর্ষ তার শিল্প-বাণিজ্য হারিয়েছে, ভারতবর্ষের শিল্পী তার সাধনা, অধ্যবসায় ভুলেছে, সেই ভুল আবার বিংশ শতাব্দীতেও আমরা করব কি? আমরা স্বহস্তে পূর্বপুরুষদের সম্বন্ধে রোপিত বিষবৃক্ষের

ফল পেড়ে সেই বীজ কি আমাদের ভবিষ্যৎ বংশধরদের জন্ত পুনরায় রোপণ করে যাব? অতীত ভারতকে আদর্শ করে তার জ্ঞানবিকাশের ঐশ্বর্য বা উত্তরাধিকার সূত্রে পেয়েও আমরা আজ হারিয়ে বসে আছি, তাই পুনরুদ্ধার করার উপায় ভবিষ্যৎ ভারতকে আমাদের স্পষ্ট করে দেখিয়ে যেতে হবে। জগৎকে নিমজ্ঞণ করবে ভবিষ্যৎ ভারত; বর্তমান ভারত একমুঠা অল্পের কাঙাল, একখণ্ড বস্ত্রের অভাবে লজ্জাহীন—অতিথি সংকার ভারত করতে জানে কি না, হৃদয়বান অতিথি বন্ধুতার দেখেই আশা করি বুঝতে পারবেন। 'ভূখা ভারতের' বিশ্বের ক্ষুধা মেটাবার চেষ্টা প্রলাপ মাত্র। যদি তা স্বীকার কর, বল, 'বিশ্বকে দেবার ভারতের এখনও কিছু অবশিষ্ট আছে,' তা হ'লে স্পষ্ট করে বল কি আছে? বিশ্বের বিরুদ্ধে ভারত আজ বিদ্রোহ করবে, এক লাঞ্ছিত প্রাচীন জাতি কেন তার সহস্র সহস্র বৎসরের তপস্কার লব্ধ 'মৃত সঞ্জীবনী' জগৎকে ধরে ডেকে এনে অতিথি সংকার বলে বিলিয়ে দেবে? কোন অধিকারে তারা উপনিষদ নিতে আসবে? সেখানে তো তাদের Lewis gun, rifle এর অধিকার নেই! তবে সমস্ত ভারত অতিথিকে কি প্রত্যাখ্যান করবে? ভারতের কবি কি সমস্ত ভারতের সঙ্গে পরামর্শ করে বিশ্বকে নিমজ্ঞণ করতে গিয়েছিলেন? তবে তিনি স্বয়ং মুক্ত আকাশতলে অতিথিসংকার করুন—ভারতকে আর নূতন লাঞ্ছনা যেন না দেন!

আমাদের বর্তমান হীনাবস্থার জন্ত দায়ী আমাদের বর্তমান শিক্ষা ও আমাদের আশঙ্কির উপর অনাস্থা, অতএব আমাদের শিক্ষা নূতন আদর্শে গড়ে তুলতে হবে; আমাদের পাশ্চাত্য জ্ঞানবিজ্ঞানের মোহ যতদিন থাকবে আমাদের শিল্পবাণিজ্যের পুনর্গঠন ততদিন অসম্ভব থাকবে।

আমাদের শিল্পোন্নতির ইতিহাস বহুশতাব্দীর ক্রমবিকাশের ফল। সমাজের যে অবস্থায় তা সম্ভব হয়েছিল সে অবস্থা সত্য সত্যই আর নাই। কিন্তু ক্যান্টরী গড়ে এদেশে শিল্পোন্নতি করা চলবে না, গত পনের বৎসরের যৌথ-কারবারের ইতিহাস তার অশ্রুতম কারণ। এযুগে কেমন করে নূতন ভারতীয় নাগরিক জীবন ও সামাজিক গ্রাম্যজীবন পুনর্গঠিত করা যায়, আমাদের এই সর্বশ্রেষ্ঠ চিন্তা ও সাধনার বিষয়—স্বরাজ বা স্বাধীন রাষ্ট্রীয় জীবন সেই নব জীবনকে রক্ষা করবারই বাহিরের উপায় মাত্র। প্রথমটা আমাদের মতটা চিন্তার বিষয় দ্বিতীয়টা তত নয়, তার কারণ প্রকৃত পক্ষে যখন আমরা প্রথমটা লাভ করব দ্বিতীয়টা অর্থাৎ রাষ্ট্রীয় জীবনে স্বাধীনতা আপনা আপনি আসবে।

নূতন নাগরিক সভ্যতা গড়তে ভারতীয় শিল্পীর ডাক প্রথমেই পড়বে। সেই নূতন সৃষ্টির অন্তরালে যে শিক্ষা সমস্ত জাতিকে অনুপ্রাণিত করবে সে শিক্ষা সর্বপ্রায়ে হ'বে ভারতীয় শিল্পের প্রাণের কথা; সেই নষ্ট শিল্প উদ্ধারের জন্ত বীরের মত সাধক চাই—হুর্গম পথ, ধীরে সেই অন্ধকারাচ্ছন্ন পথে অগ্রসর হতে হবে। শতাব্দী পরে ভবিষ্যৎ ভারতে যে নূতন মন্দির নির্মিত হ'বে তা দেখতে ভারতের নিমজ্ঞণ পত্র পেয়ে কিন্তু সেই মুক্ত মন্দিরধারে অতিথি হবে। উৎসবের সেই দিন। সে কর্মের সফলতা প্রাপ্তির আশা আমাদের জীবিত কালে বর্তমান ভারতকে ত্যাগ করতে হবে। কর্মের পথে আমরা দলে দলে অগ্রসর হ'লে কর্মফল-ভগবৎরূপায় আসবেই আসবে।

আমাদের শিল্পের প্রাণের কথা কি? আমাদের সভ্যতার বিকাশ ও প্রচার যুগে যুগে, স্বদেশে ও দেশান্তরে ঐ শিল্পের ভিতর দিয়ে ঘটেছিল। শিল্পজ্ঞানই সৌন্দর্য্যজ্ঞান এবং শিল্পের অভাবে সৌন্দর্য্যহীন মানুষের জীবন দিনে দিনে শুকিয়ে যায়—ভারতবর্ষের মত মহাদেশে একটা মহাজাতির জীবন এমনই করে একটা শতাব্দীতে শিল্প-সৌন্দর্য্য হারিয়ে শুকিয়ে গেছে। সর্বপ্রায়ে সেই মূর্খপ্রাণে এই সৌন্দর্য্যজ্ঞানের উন্মেষ হওয়া চাই। ভারতীয় শিল্পের অবেষণের পূর্বে ভারতীয় শিল্পীর অবেষণ আবশ্যক। স্বজাতীয় শিল্পের যত্নের অভাবে আজও তারা বিজাতীয় শিল্পের চর্চা নিয়ে আছে অথবা জীবিকা নির্বাহের কৃষিকর্মাদি অবলম্বন করে বেঁচে আছে। অতএব নূতন ব্রতী যারা তাদের ঐ ভারতের যে সমস্ত শিল্পী আজও জীবিত, যারা বরোদা প্রভৃতি হিন্দু রাজ্যেও পাশ্চাত্য অনুন্নত শিল্পের অনুকরণে হিন্দুরাজার নগরের প্রাসাদ নির্মাণ করে অথবা অল্প উপায়ে কোনরূপে জীবিকানির্বাহ করে সেই সব শিল্পীকে ডাক দিতে হবে; লুপ্তপ্রায় ভারতের গৌরব সেই উন্নত শিল্পের পুনর্গঠন করতে এই সব পাশ্চাত্য সভ্যতার নিকৃষ্ট শিল্পের কেন্দ্রে অসুন্দর সহরগুলি হ'তে স্থানান্তরে সরে যাওয়া চাই। আমাদের জ্ঞান বিজ্ঞানের শিল্প ঐরূপ নূতন কেন্দ্রে সৌন্দর্য্যের মধ্যে স্থাপিত না হ'লে সে শিক্ষার ফলও সুন্দর হবে না। সেই দিন আচার্য্য জগদীশচন্দ্র বসুর মত একাধিক বিজ্ঞানমন্দির এই অসুন্দর নগরের পরিবর্তে 'সুন্দর' নগরে প্রতিষ্ঠিত হ'য়ে নব নব শিল্পী ও সাধকের পথ নির্দেশ করবে। কবির 'বর্ধামঙ্গল' সেই সুন্দরের মধ্যে যথার্থ সুন্দর হ'য়ে ফুটে উঠবে। আমার দৃঢ় বিশ্বাস, যে সভ্যতা আমাদেরই আশ্রয় করে আজ বলদৃপ্ত হয়েছে, সেই সভ্যতা আমাদের সহযোগিতা হারিয়ে inferior environments এর

মধ্যে ক্রমশঃ একটা শতবর্ষব্যাপীকালের মুর্শিদাবাদের মত সমস্ত বাণিজ্যগৌরব নিয়ে অচিরে বিলুপ্ত হয়ে যাবে।

এ যুগে East and Westএর অর্থাৎ প্রাচ্য ও পাশ্চাত্যের মিলন হ'ক বা না হ'ক, সে আমাদের বড় চিন্তা নয়। এও রুজ সাহেব সেতার বাজান কিনা আর রবিবাবু হারমনিয়ম বাজান কিনা সেটা এযুগের বড় স্মরণীয় ঘটনা নয়। আমাদের চিন্তা এই, আমাদের জাতীয় জীবনের সৌন্দর্যের আরাধনা অর্থাৎ লুপ্তপ্রায় শিল্পগৌরবের পুনঃপ্রতিষ্ঠা করা—মানুষকে শুধু 'lever of art' হ'লে চলবে না, 'art of living'ও শিখতে হবে। বাঁচার মত বেঁচে থাকতে হ'লে জীবনের মাঝে সৌন্দর্যের সাধনা চাই। মানুষ মানুষের সঙ্গে প্রাণ খুলে মিশতে শিখলে, তার অপর কোন শিক্ষার আবশ্যকতা আছে কিনা জানি না।

আমাদের জীবিতকালে যে কর্মমন্দিরের ভিত্তি স্থাপন করে যেতে হবে তা পূর্ণ করতে যুগযুগের সঞ্চিত বিশাল চিন্তা, অসম্ভব স্বপ্ন ও বিজ্ঞের উপেক্ষিত Sentimentalism নিয়ে বহু artist বহু শিল্পী চাই; সহস্র সহস্র বৎসরের সঞ্চিত ভারতীয় কল্পনা সৌন্দর্যের পুনঃপ্রতিষ্ঠাকল্পে আমাদের এই নূতন সাধনা, নূতন চিন্তা, নূতন স্বপ্নসৃষ্টির অন্তরালে যে আদর্শ নিয়ে কর্মমন্দির রচিত হবে, কত যুগযুগান্ত পরে ঐ কল্পনার সৌন্দর্য্য নব নব আদর্শে রূপান্তরিত হয়ে শত শত অজন্তা; সহস্র সহস্র তাজমহল, লক্ষ লক্ষ সাধক-শিল্পী ভারতবর্ষে আঁকার গড়ে তুলবে। ভারতবর্ষ সেদিন আবার যথার্থ সৌন্দর্যের সাধক হয়ে "সোনার ভারত" বলে জগৎবিদিত হবে।

নারায়ণ

৮ম বর্ষ, ১ম সংখ্যা]

[অগ্রহারণ, ১৩২৮ সাল।

ভারতের আহ্বান

[শ্রীচিন্তরঞ্জন দাশ]

ভারতের যে বাণী—সে বাণী সমস্ত পৃথিবীর। ভারতে যে নবীন জাতি গড়ে উঠছে, তারা সে বাণী পৃথিবীর মধ্যে প্রচার করবে—তার জন্ম ভারতের ইতিহাস অপেক্ষা করছে, তার জন্ম যুগশঙ্খ বেজে উঠেছে। তারি জন্ম বুঝি স্পষ্ট করে দেখতে পাবে কি না পাবে সকলে আজ ছুটে আসছে। আমাকে ভারতের ইতিহাস ডেকেছে। যুগশঙ্খ বেজে উঠেছে—সে শঙ্খধ্বনি তোমার প্রাণকে স্পর্শ করেছে, তাই তুমি ছুটে এসেছ। আমি কেহ নই। আমি কে? আজ আমি সামান্য কর্মমাত্র—তোমাদের সেবক,—তার বেশী অহঙ্কার আমার নাই। তোমাদের সেবায়—আমার স্বদেশবাসীর সেবায়—আমি আজ কর্মে নিযুক্ত। কাল হয়ত ভগবৎ কৃপায়—এমন অবস্থা হবে—আমি আর সে কর্মে নিযুক্ত থাকতে পারবো না। আমাকে এখনই হয়ত তিনি অথ কোন জায়গায় সরিয়ে নেবেন; নয়ত আমাকে মরণের দেশে যেতে হবে।

এই যুগধ্বনি তোমাদের প্রাণে বেজেছে! একবার ধ্যান কর—একবার চোখ বুজে মনের মধ্যে চক্ষুকে তাড়িত কর—দৃষ্টিকে পাতিত কর, তখন দেখতে পাবে কি? দেখতে পাবে শুনতে পাবে কি? যা দেখবে তাই শুনতেও পাবে। মনের মধ্যে যে স্বাধীনতার আলোক ধীরে ধীরে জলে উঠছে—সেটা দেখবার জিনিষ—সেটা শুনবার জিনিষ—সেটা বুঝবার জিনিষ।